

ANG SELYO SA PASKO SA PAGKABANHAW



Usa gayud ka pribilihiyo nga mahianhi niining buntaga, sa niining kaadlawan sa sanga sa Full Gospel Business Men dinhi sa Phoenix, ug ang mahibaloan nga gihatagan ako sa Ginoo og diyutay'ng bahin niini, nga mahimong kabahin sa niini nga pagpakig-fellowship. Gusto kong pangumostahon si Igsoong Carl Williams ug ang iyang asawa, si Igsoong Stromei, og ang tanang uban pa nga ania sa entablado, si Igsoong Shores, si Igsoong Outlaw, ang mga ministro, ug kamong tanan nga mga butan'ng tawo.

² Kabalo mo, ako—nagsaulog ako sa akong adlaw'ng-natawhan niadtong miaging semana, usab. Ug medyo magwang lang ko gamay kay sa niining maong sanga. Nagtoo ko nga miingon siya, “Lima na ug . . . ang pangidaron, sa maong sanga.”

³ Adunay miingon, niadtong miaging adlaw, ingon, “Pila na ba ang imong edad, Igsoong Branham?”

⁴ Ingon ko, “Baynte-sais.” Ug ingon ko, “Gipapas ko lang ang unang baynte-singko ka tuig. Wala ko man gud Siya naalagaran og ayo niana nga mga tuig.” Ingon ko, “Nagalaum ko nga Iyang pagapapason, usab.” Ang pabuhaton Siya niana lahi na pud kana nga butang.

⁵ Apan pagkaanindot nga maania dinhi. Ug karon ayaw natong gamiton og ayo ang inyong panahon. Tungod kay atong . . . ako—nabalaka ako, human nga madungog ko ang pipila niining maayo nga mga testimonyo, ug maong mga butang nga nagakahitabo, nga akong . . . ug ang mga alawiton, basin man gud makabuhat ko og usa ka butang nga makadaut niana. Ug gusto kong modugang niana, kung adunay unsa mang butang nga akong ikadugang. Kining mga igsoong babaye . . .

⁶ Kanang igsoong lalaki nga mikanta sa maong awit niining buntaga, ang itum nga igsoon, nagpasalamat ako niana, *The Eye On The Sparrow*.

⁷ Ug ang mga igsoong babaye usab nga mikanta niini nga awit, nga usa sa akong mga tabang sukad nga mianhi ako dinhi sa unang higayon. Aduna ko niana. Aduna ko'y rekord niana, ug bag-ohay ko lang nga gipatukar kana, *I'd Like To Talk It Over With Him*. Ug gihangyo ko si Igsoong Dawson Riley dinha, nga akong higala, kung mahimo niya, nga ang pipila kanila, kung mahimo nilang pakigkitaan og kung makumbinsi nila kadtong mga babaye, kung ania pa man sila sa yuta, aron mokanta niini pag-usab niining buntaga. Ug nagalaum ko nga narekord kana

ni Terry. Ug nagtoo ko nga narekord gyud niya. Gusto ko nga kopyahon kana gikan dinha, siguro, sa usa ka pag-rekord o ingon niana, tungod nga gusto ko gayud kana nga awit. Ug mao kana ang akong. . . akong tinguha nga estoryahon Siya bahin niini. Siguro kitang tanan usab gustong buhaton kana. Mao kana'y hinungdan kon nganong ania kita dinhi niining buntaga.

⁸ Bueno, aduna diay umaabot nga mga panagtigum, sunod semana. Okey lang ba nga hisgotan ko? [Nagaingon ang usa ka igsoong lalaki, "Oo."—Ed.] Ako—mouli ako niining moabot nga semana, sa tabernakulo, sa sunod Domingo, alang sa panerbisyo sa Pasko sa Pagkabanhaw; Sabado sa gabii, Domingo, ug Domingo sa gabii. Ug dayon mabalik na pud ko sa California. Kaninyong tanan nga taga-California, malipayon gayud kami nga makauban kamo sa panagtigum didto. Ug sa hunahuna ko nasayup lang si Billy sa paghatag og pahibalo. Nga. . . Ingon siya, "Sa Biltmore Hotel," siguro, "igapahigayon kana sa." Kana'y. . . [Adunay nagaingon, "Dili na nato maabangan kana."] Dili na diay nato maabangan. Ug kana'y sa Eastmont na lang? ["Embassy."] Embassy, sa Embassy Hotel. Busa ipahibalo ra kaninyo ni bisan kinsa man sa mga Full Gospel nga atua didto, kung taga-didto mo.

⁹ Ug dayon pagmakabalik na kami gikan didto, ug moadto na pud ko sa South Africa pagkahuman. Usa na lang ka bulan sukad karong adlaw, mobiyahe na kami pa-South Africa, nagalaum og usa ka halangdon nga kahigayonan diha sa Ginoo, uban ang mga tulo ka nasud didto. Busa among—among ginahangyo gayud ang inyong mga pag-ampo. Tingali'g dili pa ako makabisita kaninyo, kon ugaling papadayonon kami sa Ginoo nga mobiyahe, hangtud nga makabalik ako. Ug nagalaum ko nga aduna unta ko'y maayong mga balita pagmakabalik na kami.

¹⁰ Niadtong ulahing higayon nga atua ako didto, sa hunahuna ko gihatag gyud sa Ginoo kanako ang pinakadakung panagtigum nga aduna ako sukad-sukad. Ug sa usa ra ka higayon, alang sa usa ka pagtawag sa altar. . . Bueno, mga lumad kadto nga nakatapis ra og habol. Kutob sa nahibaloan ko, adunay traynta ka libo nga midawat kang Cristo sa usa ra ka higayon. Ug abi namo nga tingali'g pisikal nga kaayohan ra ang gusto nila, tungod kay aduna man didto og halos bayntesingko ka libo nga mga nangaayo sa usa ra ka higayon. Ug pagkasunod adlaw, ang mayor sa—sa Durban, nga mao si Sidney Smith, miingon, "Dungawa sa imong bintana, tan-awa ang mga nagalakaw sa dalan." Ug adunay mga sakyanan nga puno og mga karga, nanaglaray nga puno og mga karaang sungkod ug mga ingon niana, nga gipangkamada gayud; nanagsunod sila, ang mga lumad, nga kaniadto magkaaway sa usa'g usa, nanaglakaw sa kadalanan sa maong siyudad, nga nanag-awit og *Only Believe* sa kaugalingon nilang pinulongan.

11 Sultihan ko kamo, nalipay gyud ang akong kasingkasing. Sama sa . . . Pagmakita mo ang usa ka butang nga sama niana, Igsoong Shores, mabati mo gayud nga dili kawang ang imong pagpamuhat kung ingon-ana. Nakita n'yo, naningkamot ka man. Ug nagalaum ko nga buhaton kana pag-usab sa Dios, dili tungod nga—nga moadto na pud kita didto, kondili tungod kay nagahulat kita sa Pag-abot sa Ginoo.

12 Ug sama sa giingon sa maong awit, ginapangita nato kanang gamay'ng, nahisalaag nga karnero, nga, nga. . . Siya— Siya dili una moabot hangtud nga makasulod na kanang karnero. Ang matag usa kinahanglan man nga maanaa na sa panon. Dili Niya pagasirhan ang pultahan hangtud nga makasulod na kanang kaulahiing usa. Busa, igsoong mga ministro, kauban gayud ko ninyo, niining buntaga, sa pagpaninguha nga mapangita kanang kaulahiing karnero. Tingali'g anaa ra kini sa Phoenix, niini nga buntag. Wala ako masayod. Apan pagmakasulod na gani kanang kaulahiing usa, nan pagasirhan na sa Magbalantay ang pultahan.

13 [Nagaingon ang usa ka igsoong lalaki, “Igsoong Branham?”—Ed.] Oo? [“Mahimo ba akong mosulti og usa ka pulong?”] Mahimo mo. [“Aduna ko'y nalimtan. Naghisgot kami mahitungod sa . . .” Blangko nga bahin sa teyp.] Maayo man kana. [“Ug nasayod ko, ang tanan aduna gyu'y mahikalimtan, usahay.”] Dili man ko nagakalimot. [“Oh!”]

14 Ako mismong ginasulat kung unsay akong ipanulti, halos. Ako. . . Sugod nga nagakatigulang ko, malisud na kanako ang pagdumdum, mao nga ginapangsulat ko na ang akong mga Kasulatan, ug uban pa. Sa una, masaulo ko ang halos singkwenta ka Kasulatan sa akong hunahuna, ug dili gani. . . madumduman ko kini mismo, apan taastaas na usab ang mga kalisud nga akong gipanaw niadto nga mga adlaw.

15 Busa, nagahulat kita sa Pag-abot sa Ginoo. Ang Ginoo magapanalangin kaninyong tanan!

16 Ug dayon pagmoabot ka na dinhi, ug maghunahuna ka. . . Pagnakalingkod ka na dinhi ug madungog kining mga tawo nga nagapamatuod. Maghunahuna ka, “Bueno, pag ako na ang motindog, aduna gyud ko'y isulti mahitungod niana.” Bueno, daghan kaayo ang angay'ng isulti, aduna ka'y tibuok adlaw aron sa pagsulti niini. Apan, ginapasalamatan ko gayud kamong tanan. Hinaut nga kining gamay'ng sanga padayon nga magatubo. Hinaut nga ang matag iglesia sa Phoenix padayon nga motubo hangtud nga moabot si Jesus, mao'y akong kinasingkasing nga pag-ampo.

17 Karon, siguro, aron makapahulay kita sa makadiyut, manindog kita samtang mag-ampo kita. Mahimo n'yo ba?

18 Dios nga Makagagahum-sa-tanan, ang Amahan sa among Ginoong Jesus Cristo, Nga nagbanhaw Kaniya gikan sa mga

patay, ug naghatag Kaniya nganhi kanamo ingon nga halad, ug ingon nga Ginoo ug Manluluwas. Mapasalamaton kaayo kami Kanimo tungod niining pribilihiyo nga aduna kami niining buntaga, aron mobarug diha sa Imong Presensiya, uban ang Imong mga tawo nga tinubos na ug nagahulat sa Iyang mahimayaon nga ikaduhang Pag-abot, aron dawaton kami ngadto sa Iyang Kaugalingon. Kung aduna ma'y sala nganhi kanamo, Ginoo, limpyohi kami sa Imong hisopo. Ug ginaampo namo, Langitnong Amahan, nga Imong ayohon ang tanang masakiton nga tawo nga ania sa among taliwala.

¹⁹ Ug kung aduna man, tingali, og mga wala pa nakaila Kanimo, sa niining halangdon nga bautismo sa Balaang Espiritu nga amo gayud gipakiglimbasogan sa pagpanalipod, ug ginaingon kon unsa Kini ka importante, sumala sa Kasulatan alang niining kaulahiing adlaw, ginaampo namo, Dios, nga mokunsad Siya nganhi kanamong tanan, karong adlaw, ug bautismohan kami pag-usab pasulod ngadto sa Lawas, ug pasudlon ang mga anaa pa sa gawas, usab, Amahan.

²⁰ Panalangini kami sa diha nga magabasa kami sa Imong Pulong ug paningkamotan nga isulti ang Kamatuoran sa Imong Pulong. Sirhi ang among mga baba sa nianang dilitinood, ug ablihi ang among mga kasingkasing ug mga baba diha sa Kamatuoran, samtang ginatugyan namo ang among mga kaugalingon nganha Kanimo. Gamita ang among mga baba aron sa pagsulti, ug ang among mga dalunggan aron sa pagpatalinghug, ug ang among mga kasingkasing aron sa pagdawat. Kay amo kining ginapangamuyo sa Ngalan ni Jesus, nga Mao'y nagtagana-nang-daan niini nga mahitabo kini. Amen.

²¹ Gusto ko nga mobasa gikan sa Balaang Pulong, og tulo ka bahin diha sa Biblia. Ug kung gusto n'yong isulat kini, ug gusto n'yong subayon kini, aron mabasa kini para sa dugang kahibalo, malipay gayud ako kung isulat ninyo kini. Ang mga bahin nga akong pagabasahon mao ang Mateo 28:1-10, ug dayon ang Pinadayag 1:17-18, Mga Taga-Roma 8:11. Ug isulti ko kini pag-usab. Ug karon Mateo 28:1 hangtud 10, Pinadayag 1:17 hangtud 18, ug Mga Taga-Roma 8:11.

²² Bueno haduol na kita sa Pasko sa Pagkabanhaw. Ug samtang ginapangita n'yo ang mga bersekulo, ug ginasulat kana. Nahunahuna ko nga kining moabot nga semana mao ang pinakamahinungdanon ug ang pinakahalangdon og makasaysayon nga semana sa tanang mga semana sa tuig. Nagtoo ko nga ang pinakahalangdong butang nga atong saulogon niining semana, niining moabot nga semana, mao ang pinakadakung panghitabo nga nahitabo sukad sa yuta. Wala na siguro'y unsa mang butang nga molabaw pa niana. Moingon mo, "Bueno, halangdon man ang—ang pagpalansang." Apan daghang mga kalalaken-an ang namatay, daghang mga

kalalaken-an ang gilansang, gani sa mao gihapon nga mga adlaw sa atong Ginoo. Apan aduna lamang og Usa kanila Nga nabanhaw gikan sa mga patay. Mao kadto ang nag-selyo niadto.

²³ Karon magabasa na ko. Ug medyo usa ra kini ka hamubo nga mensahe sa dili pa ang Pasko sa Pagkabanhaw, kon itugot sa Ginoo, mga kuwarenta minutos ra. Karon magbasa kita gikan sa Ebanghelyo ni San Mateo, sa ika-28 nga kapitulo, sa pinakasugod.

Sa tapos sa adlaw nga igpapahulay, sa pabanagbanag sa nahauna nga adlaw sa semana, miabot si Maria Magdalena ug ang usa ka Maria sa pagtan-aw sa lubnganan.

Ug, ania karon, miabot ang usa ka dakung linog: kay dihay manulonda sa Ginoo nga mikunsad gikan sa langit, ug miabot ug iyang giligid ang bato sa pultahan, ug milingkod niini.

Ang iyang dagway sama sa kilat, ug ang iyang bisti maputi maingon sa nieve:

Ug tungod sa kahadlok kaniya nagakurog. . . ang mga bantay (pasayloa ko) nanagpangurog, ug nahimong daw mga patay.

Ug ang manulonda mitubag ug miingon sa mga babaye, Ayaw kamo kahadlok: kay nasayod ako nga ginapangita ninyo si Jesus, ang gilansang sa krus.

Wala na siya dinhi: kay siya nabanhaw, sumala sa iyang giingon. Umari kamo ug tan-awa ninyo ang dapit nga nahimutang sa Ginoo.

Ug dumali kamo pagpanglakaw, ug suginli ninyo ang iyang mga tinun-an nga nabanhaw siya gikan sa mga patay: ug, tan-awa, moadto siya nga magaua kaninyo sa Galilea; didto igakita ninyo siya: ania karon, gibalitaan ko na kamo.

Ug sila midali pagpahawa sa lubnganan uban sa kahadlok ug dakung kalipay; ug nanagdalagan ug sa pagbalita sa mga tinun-an.

Ug sa nanagpangadto sila sa pagbalita sa iyang mga tinun-an, tan-awa, gisugat sila ni Jesus, nga nagingon, Maglipay kamo. Ug sila miduol ug gigakus nila ang iyang mga tiil, ug ilang gisimba siya.

Unya si Jesus miingon kanila, Ayaw kamo kahadlok: lumakaw kamo ug ingna ninyo ang akong mga kaigsoonan aron nga managpangadto sila sa Galilea, ug didto igakita nila ako.

²⁴ Ug sa Pinadayag usab, sa unang kapitulo, ug sa ika-17 ug ika-18 nga bersekulo.

Ug sa pagkakita ko kaniya, natumba ako nga daw patay diha sa iyang tiilan. Ug gitapin-an niya ako sa iyang too nga kamot, nga nagaingon kanako, Ayaw kahadlok; Ako mao ang sinugdan ug ang katapusan:

Ako mao ang buhi, ug namatay; ug ania karon, buhi ako hangtud sa kahangturan, Amen; ug ania kanako ang mga yawi sa kamatayon ug sa hades.

25 Ug diha sa Basahon sa Mga Taga-Roma, sa ika-8 nga kapitulo, ug magsugod sa ika-11 nga bersekulo.

Apan kung nagapuyo sa sulod ninyo ang Espiritu sa nagbanhaw kang Jesus gikan sa mga patay, ang nagbanhaw kang Cristo gikan sa mga patay magahatag usab og kinabuhi sa inyong mga lawas nga may kamatayon pinaagi sa iyang Espiritu nga nagapuyo sa sulod ninyo.

26 Karon nagasalig ako nga igadugang ni Ginoong Jesus ang Iyang mga panalangin para sa pagbasa niini nga mga Pulong. Ingon nga makita, ang Pasko sa Pagkabanhaw, gitatak ko na kini sa kasingkasing ko mismo ingon nga mao ang pinakahalangdon nga panagtigum, o ang pinakahalangdon nga panghitabo sa—sa tuig.

27 Gusto ko kamong hangyoon nga pagpasensyahan sa ko ninyo sa makadiyut. Dili ba kana medyo kusog ra dinha kaninyo, nga mora'g nagadahunog? Okey lang ba kana? Madungog n'yo ba kini og maayo nga sama niana? Oh! Dili diay ninyo madungog kini. Mas arang-arang na ba kana, mismo nga sama niana? Ayaw ko man gud nga magpaduol kaayo.

28 Karon, ang hinungdan nganong ginasulti ko kini, tungod kay sa, Pasko sa Pagkabanhaw, gipamatud-an man Niya kung unsay gisulti sa Biblia. Ang tanang Kasulatan nga nahisulat mahitungod sa Iyang pagabuhaton, giselyohan Niya ang Iyang pagka-Mesias sa diha nga nabanhaw Siya gikan sa mga patay, ang selyo sa Pasko sa Pagkabanhaw. Daghan kaayo og ingon niini sa karon nga atong ginahisgotan, kining, pagpamalit og mga selyo nga pang-Easter. Bueno, gusto kong hisgotan niini nga buntag ang mahitungod sa: *Ang Selyo Sa Pasko Sa Pagkabanhaw*. Lahi kini nga selyo kaysa sa ginapalit nato sa atong kuwarta, sama sa usa ka selyo nga ginatatak diha sa mga surat, siguro, ang Tuberculosis Association o unsa ma'y tawag nila niana. Nagatoo ko—ko nga medyo lahi kini nga selyo. Ug ingon nga ang Pasko sa Pagkabanhaw mao ang halangdon nga adlaw sa tuig para kanato nga mga Cristohanon nga nagaangkon nga mga anak sa Dios, gusto kong hisgotan kini ug hibaloong kung unsaon nato pagpakig-fellowship sa niining halangdong butang nga gibuhath ni Cristo para kanato.

29 Ang Pulong sa Dios gilitok na sa daghan, og gatusan na ka mga katuigan sa wala pa ang Iyang Pag-abot, mahitungod

sa Iyang Pagkalansang, ug mahitungod sa Iyang pagkamatay, ug mahitungod sa Iyang pag-antus, ug mahitungod usab sa Iyang pagkabanhaw. Igapahigayon nato kining mga panerbisyo, tingali, sa sunod semana, samtang maminaw kita sa atong—atong mga tulumanon sa radyo; ug sa atong mga iglesia, sa atong mga pastor, ug uban pa, niining moabot nga semana.

³⁰ Apan sa tanang mga adlaw ug ang tanang mga butang nga gibuhat ni Jesus, ginapasalamatan ko gayud ang tanan Niyang pagpanghimatuod sa Pulong sa Dios ug kung unsay Iyang gibuhat aron tumanon Kini: pagpang-ayo sa mga may sakit, pagbanhaw og patay, paghingilin og mga yawa, pagwali sa Maayong Balita ngadto sa mga kabus, ug pagtuman sa matag Pulong nga giingon sa Dios nga Iyang pagabuhaton pagmoabot na Siya; ug dayon ang pag-antus Niya usab para sa atong mga sala, puli kanato, aron mahimong halad-pasig-uli para sa atong sala, didto sa krus, diin wala na’y bisan kinsa pa ang makabuhat niini gawas Kaniya. Apan labaw pa nianang tanan, nagatoo ko nga ang Pasko sa Pagkabanhaw mao ang nagselyo sa tibuok butang.

³¹ Tungod kay, aduna na ma’y mga propeta sa yuta kaniadto, nga nanagpropesiya sa wala pa Siya. Aduna na’y mga propeta sa yuta, nga nag-ayo og mga may sakit, nagbanhaw pa gani og mga patay, ug nanagbuhat sa mao gihapong mga ilhanan nga gibuhat ni Jesus.

³² Apan ang Pasko sa Pagkabanhaw mao’y nagpamatuod niana. Giselyohan Niini ang Pulong sa Dios hangtud sa kahangturan, para sa tinuod nga magtotoo. Ang tanang kaguol ug pagduhaduha nangawagtang gayud, didto niadtong mapanalanginong buntag. Nabilanggo na ang tawo, kaniadto, sulod sa bilanggoan, bisan pa gani ang relihiyosong mga tawo sa wala pa kini nga panahon, tungod kay sila . . . nakakita man og dagkung mga relihiyosong kalihokan, ug mga pagpamuhat sa Balaang Espiritu, ug uban pa. Apan sa dihang mamatay ang tawo, medyo kini tapos na. Apan pag-abot niining Usa, ug miingon, “May kagahum Ako sa pagtugyan sa Akong kinabuhì; may kagahum Ako nga bangonon Kini pag-usab,” ug dayon gipamatud-an mismo kung unsay Iyang gisulti, para kanako, kana—mao na mismo kana ang selyo niana, pag—pag adunay butang nga gisulti ug dayon gipahitabo ug gipamatud-an mismo.

³³ Kung miingon ang usa ka tawo, sama ni Columbus, nga nagtoo nga lingin ang kalibutan, ug iyang giobserbahan ang mga barko, sumala sa gikaingon kanato, kung unsa nga sa dihang nagaabot kini, ug makita na niya ang layag sa dili pa niya makita ang barko mismo. Ug para kaniya nagpamatuod kadto nga lingin gyud ang kalibutan. Wala mitoo niana ang mga tawo kaniadto nga panahon, apan usa siya ka tawo nga may panan-awon.

Naglayag mismo siya aron pamatud-an sa ingon ka eksakto kung unsa ang anaa sa iyang panan-awon, nga mao ang kamatuoran.

³⁴ Ug gituyo usab sa Dios nga pamatud-an ang Iyang Pulong, nga mao ang Kamatuoran. Busa Iyang... Aduna lamang og usa ka Tawo ang makahimo niana, ug mao kana si Jesus. Ug mianhi Siya ug gipamatud-an kana nga mao ang Kamatuoran. Giselyohan niini kana. Ug giwagtang niana ang tanang mga selyo sa kangitngit, ug gibalibag ang tanang mga—mga tuo-tuo sa ubang mga relihiyon, ug uban pa, kon diin nanagpanungha ang butugang mga kalalaken-an ug nanagsulti'g dagkung, kahibulongan nga mga butang; apan sila, ang matag usa kanila, anaa ra gihapon sa lubnganan. Apan ang atong Cristohanon nga relihiyon mao lang gyud ang usa nga adunay lubnganan nga walay sulod. Ug para kanako nagapamatuod kana nga Siya mao ang Dios sa mga patay, ug ang Dios sa mga buhi, nga mahimo Niyang bangonon ang patay, og mabuhi kini pag-usab. Ug ako... kining gahum nga nagahatag og kinabui, og Iyang Espiritu nga nagahatag og kinabuhi, nagpamatuod gayud sulod sa daghang mga katuigan nga Siya ang maong Usa Nga makapabuhi sa patay, pag-usab.

³⁵ Ug sa dihang gipamatud-an Niya pinaagi sa Iyang saad, kining dakung gahum nga nagapangdaug nga anaa Kaniya, niadtong Pasko sa Pagkabanhaw Iyang gipamatud-an nga mahimo Niyang buntogon ang kamatayon, impiyerno, ug ang lubnganan. “Ako Mao ang namatay, ug nabuhi pag-usab, ug buhi hangtud sa kahangturan; ug adunay mga yawi sa—sa kamatayon, impiyerno, ug sa lubnganan.” Pagkamaanindot nga pahayag nga mahimong isulti ni bisan kinsa man. Ug dili lang nga gipahayag Niya kana, kondili napamatud-an Niya mismo nga anaa gyud Kaniya—Kaniya kung unsa ma'y Iyang gipahayag nga aduna Siya.

³⁶ Ug nahunahuna ko, dalion na sa Dios ang adlaw sa diha nga kita, ingon nga mga Cristohanon nga nagatoo niining Biblia, makapamatuod usab sa kung unsay atong ginahisgotan. Kita n'yo? Mao kana, sama sa gikasulti kaganina, “Ang asin sa kalibutan,” nga giingon sa igsoong babaye. Husto kana. Ginapangita sa kalibutan kini nga asin. Ug sa dihang mapamatud-an na nato pinaagi sa atong mga kinabuhi, ug pinaagi sa Biblia, nga ang atong mga kinabuhi nagapanghimatuod nga ang Pulong buhi gayud sa karong panahon, mao kana ang adlaw nga atong ginahulat.

³⁷ Ang Pulong... “Kining Espiritu,” Mga Taga-Roma 8 dinha sa ika-11 miingon, “Kung nagapuyo sa sulod ninyo kining Espiritu nga nagbanhaw kang Jesus Cristo, magahatag usab Kini og kinabuhi sa inyong may-kamatayong mga lawas.” Dili lang nga gipamatud-an Niya Kaniya, nganhi kanato, nga Siya mao si Jehova'ng-Manunubos ug may kagahum sa kamatayon, impiyerno ug lubnganan, kondili gihatagan Niya usab kita og

katungod sa pagduol ngadto sa mao ra nga Espiritu, nga kita mismo makaangkon og kasiguradohan nga kita usab gihatagan na og kinabuhi niana nga Espiritu. Kay kon nagapuyo sa sulod ninyo ang Espiritu nga nagbanhaw kang Jesus gikan sa mga patay, magahatag usab Kini og kinabuhi sa inyong may-kamatayong lawas. Bueno, ang pulong nga *maghatag-og-kinabuhi* nagakahulogan og “aron pagabuhion human sa pagkamatay.” Human nga mamatay kini, nan pagabuhion kini.

³⁸ Gibilanggo sa pagduhaduha ang kalibutan, sulod sa daghang mga panahon hangtud niadtong panahona. Gipamatud-an kini, dili lang nga gihisgotan, kondili gipamatud-an usab. Nagatoo ko nga ang unsa mang butang nga puedeng . . .

³⁹ Sama sa gisulti ni Jesus, “Busa panglakaw kamo, tudlo-i ang tanang gahasuran; ug pamatud-i kanila, pinaagi sa pagpadayag sa gahum sa Dios ngadto kanila. Kini nga mga ilhanan maganunot kanila nga nagatoo.” Kanila nga nanagsaad ug nanagsulti nga nagatoo sila, gihatagan Niya kita og klarong pagsabot mahitungod niini, nga, “Kini nga mga ilhanan maganunot kanila nga nagatoo.” Kini mao ang mamahimong kapanghimatuoran sa ilang testimonyo. Karon, mahimo man natong isulti nga nagatoo kita. Apan gawas nga anaa na kanato ang gipamatud-an nga ilhanan nga Iyang gisulti nga mamaania kanato, kung ingon-ana kita’y mga *nagasugid* lamang nga mga magtotoo, ug wala *kanato* ang pagka-magtotoo.

⁴⁰ Kay, hinumdumi . . . Pipila pa lang ka adlaw ang milabay, naminaw ako sa usa—usa ka tulumanon sa radyo nga KAIR didto sa Tucson. Ug kini nga ministro mibatok kanato, nga kono, “Ang relihiyong pentecostal walay lain kondili usa lamang ka pagpakaaron-ingnon. Dihay . . . Ayaw mo pagpatalinghug niana. Dili kana kasaligan.” Ug miingon pa, “Ang si kinsa mang tawo nga nagasulti og laing mga dila, ug ingon niini nga mga butang, ug nagaangkon nga, nagapang-ayo sa mga may sakit, ug uban pa, pinaagi sa pag-ampo, kinahanglan magpahilayo kamo niana. Ug nagaampo para sa mga makaluluoy’g nagmaluyahon na nga mga tawo, tungod kay anaa man sila sa usa—usa ka ilusyon, nga aduna pud kono og problema kanila.” Oh, daw sa unsa ko unta ka gusto nga maistorya kadto nga igsoon bisan sa makadiyut lang! Ug miingon siya nga kono ang . . . “Nga, gikahatag kana para lang sa mga apostoles sa Adlaw sa Pentecostes kaniadto, ug para lang gyud niadto.”

⁴¹ Nahibaloan ko nga, human sa traynta ka tuig, gi-ordena ni Pablo kining mga gasa sa Iglesia. Sa Unang Mga Taga-Corinto 15, nga, “Nagpahimutang Siya sa Iglesia og gasa sa pagsulti og laing mga dila, nga mga milagro. Ug ang tanang uban pa niini nga mga gasa gipahimutang na sa Iglesia.”

⁴² Gisulti kana ni Jesus. “Lumakaw kamo sa tibuok kalibutan ug iwali ang Maayong Balita sa tanang binuhat.” Hangtud

asa man? “Sa tibuok kalibutan.” Para kang kinsa? “Sa tanang binuhat.” Wala pa gayud nila madawat Kini. “Ug kini nga mga ilhanan maganunot kanila nga nagatoo.” Hangtud asa man? “Sa tibuok kalibutan.” Para kang kinsa? “Sa tanang binuhat. Kini nga mga ilhanan maganunot kanila, sa tibuok kalibutan, ug sa tanang binuhat. Kini nga mga ilhanan maganunot kanila: sa Akong Ngalan pagahinginlan nila ang mga yawa; magasulti og mga bag-ong sinultihan; kung makakupot sila og butang nga makahilo, o bitin, o makainom og butang nga makahilo, dili kini makadaut kanila; pagapandongan nila sa ilang mga kamot ang mga masakiton, ug mangaayo sila.” Mao kana ang Iyang kaulahi ang sugo ngadto sa Iglesia, Marcos ang ika-16 nga kapitulo.

⁴³ Gi-ordena ni Pablo kini nga mga gasa ngadto sa Iglesia, traynta ka tuig human niadto. Ug miingon, diha sa Mga Taga-Galacia 1:8, “Kung ang usa ka Manulonda nga gikan sa Langit magawali kaninyo og lain nga Maayong Balita gawas Niini nga inyo nang nadawat,” kita n’yo, nga gikawali na, “ipatunglo siya.” Nagatoo ko nga misugod ang pentecostes nga walay pagkatapos. Nagatoo ko nga para kini sa tanang binuhat, sa tanang panahon, sa tanang dapit, nga ang pentecostes kinahanglan gayud nga magpabilin kanunay. Ang pentecostal nga mga panalangin kinahanglan nga mamaana sa mga tawo.

⁴⁴ Ug karon, unsa man kining pentecostal nga panalangin? Kini mao ang kapanghimatuoran sa pagkabanhaw. Dili ikatingala nga ang Ebanghelyo Mismo nagakahulogan og “maayong balita.” Maayong balita mahitungod sa unsa? Nga Siya’y nabanhaw gikan sa mga patay. “Ug tungod kay Ako buhi, kamo usab mabuhi.” Kamo nga mga patay kaniadto tungod sa sala ug mga kalapasan, gihatagan kita og kinabuhi sa Dios, pinaagi sa Espiritu nga nagbanhaw kang Jesus gikan sa mga patay. Ug kita karon nagalingkod sa mga Langitnong dapit uban Kaniya, nagapakig-fellowship Kaniya, og nagapakig-estorya Kaniya. Daw sa unsa nga kalipay nga masuginlan og niini nga estorya ang mga tawo, nga nagatoo niini nga mao ang Kamatuoran!

⁴⁵ Nahunahuna ko, sa karon. Ingon niini na man gud ang nagakahitabo. Ginadala ba gyud kaha nato ang mga tawo ngadto sa Dios, o ginadala lang nato sila ngadto sa iglesia? Angay gyud nga kang Cristo nato silang dalhon, kon diin anaa kining gahum nga nagahatag og kinabuhi. Maayo man ang magsimba. Oo. Pero kung ingon niana lang ka halayo ang atong naabot, nan dili pa kana ingon ka halayo ang angay natong maabot. Pagmosimba ka, maayo man kana; apan diretso ka kang Cristo, gikan sa iglesia, tungod kay kinahanglan man nato nga madawat kining gahum nga nagahatag og kinabuhi, kung nagalaum gyud kita nga mahiapil nianang pangkinatibuk-an nga pagkabanhaw, tungod kay mao lang kana ang bugtong butang nga makapabanhaw kanato gikan sa mga patay. “Kay

kung nagapuyo sa sulod ninyo kining Espiritu nga nagbanhaw kang Jesus gikan sa mga patay, magahatag usab Kini og kinabuhi, himoong, buhi ang inyong may-kamatayon nga mga lawas.” Pagkaanindot nga saad para kanato!

⁴⁶ Karon matikdi. Ang pinaka-katuyoan niining pagkabanhaw mao ang pagsulti ug pagpakita, ug aron pamatud-an nga nabanhaw mismo si Jesus gikan sa mga patay. Dili Siya patay. Siya’y buhi. Ania Siya karon dinhi. Ania Siya sa sulod nato. “Ako magauban kaninyo, bisan sa sulod ninyo. Sa diriyut lamang panahon ug unya ang kalibutan dili na makakita Kanako. Apan, kamo makakita Kanako, kay Ako magauban kaninyo, bisan sa sulod ninyo, hangtud sa katapusan sa kalibutan.”

⁴⁷ Karon, ingon nga mga Cristohanon, ginapahayag nato nga Siya’y buhi, o gibuhi na kita gikan sa—gibuhi gikan sa kinabuhi nga . . . gikan sa kamatayon ngadto sa Kinabuhi, pinaagi sa Iyang Espiritu. Ug kung wala pa kita gihatagan og kinabuhi, nan wala pa pud kita gihimong buhi.

⁴⁸ Karon atong isaysay kini nga hilisgotanan, kon itugot sa Ginoo, ug medyo itudlo kini sulod sa pipila ka minuto, kung daw sa unsa nga: gibuhi kita, ug makasigurado kaha kita nga Tinuod gyud kini?

⁴⁹ Bueno, imo kining kinabuhi mismo, akoa kining kinabuhi usab. Dinhi kon diin ang . . . Kung dili Kamatuoran kining, akong ginaandam nga isulti, nan ako na ang usa sa pinakahangal nga mga tawo sa kalibutan. Ginatugyan ko lang diay ang akong kinabuhi para sa usa ka butang nga walay kapuslanan, ug kamo usab. Apan kung Kamatuoran kini, nan utang ko ang tanan-tanan kung unsa ako. Utang ko ang tanan-tanan kung unsa ako, ngadto sa maong butang, nga atong ginabarugan. Ug nagatoo ko nga dili gyud nato angay’ng walaon ang atong kadasig.

⁵⁰ Ug ingon nga hingsayran nato nga nagakahaduol na ang Pasko sa Pagkabanhaw, aduna gyu’y butang kini nga ginabuhat sa kinasuloran ko, tungod ako—ako nasayod nga mao kana ang adlaw nga gikaselyohan ang maong butang hangtud sa kahangturan, sa atubangan sa Dios.

⁵¹ Karon, matikdan nato, nga mao gihapon kana nga Espiritu nga nagbanhaw Kaniya gikan sa lubnganan, ang nagapuyo sa sulod nato. Bueno, unsaon man pagkahimo niana? Nga ang Espiritu nga nagbanhaw, sa Dios, kang Jesus gikan sa mga patay, nagapuyo sa sulod nato.

⁵² Karon, bueno, kana mao ang Espiritu nga nagahatag og kinabuhi. Dili ang Pulong ang nagahatag og kinabuhi. Kondili ang Espiritu Kini ang nagahatag og kinabuhi sa Pulong, o nagahatag og Kinabuhi sa Pulong, nagahatag Kini og mga pako

aron sa paglupad, nagahatag Kini og alagianan. Ang Espiritu ang nagabuhat niana.

⁵³ Karon, ang trigo, kung siya ra, usa ra siya ka trigo; apan pagmakasulod kaniya ang nagapabuhi nga kinabuhi, pasulod mismo sa trigo, nan kini ang nagahatag og kinabuhi niini. Ug kita nga mga patay kaniadto, nga gibuhat diha sa dagway sa Dios, ug sa gihapon mga patay tungod sa sala ug kalapasan, aduna gyu'y paagi ang Dios nga siguradong mapasulod kining nagapabuhi nga Kinabuhi nganha sa inyong may-kamatayon nga mga lawas. Nagahisgot ako mahitungod sa inyong lawas.

⁵⁴ Bueno, si Jesus mao ang Pulong. Nagatoo kamo niana, dili ba? [Nagaingon ang kongregasyon, "Amen."—Ed.] "Sa sinugdan . . ." San Juan 1, "Sa sinugdan mao na ang Pulong, ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato."

⁵⁵ Karon, ingon nga mao ang gikasaad nga Mesias, gihimo Niyang buhi ang matag Pulong nga gipropesiya kaniadto nga Iyang pagabuhaton; ayohon ang mga may sakit, ug kung unsa nga matawo Siya sa usa ka ulay, ang tanan niana, nahitabo kana. Tinuod kana. Siya mao ang Pulong, nga napadayag dinhi sa yuta, apan dili Niya mahimo kini ingon nga usa lamang ka Tawo. Gikinahanglan ang Espiritu sa Dios, nga nagapuyo Kaniya, aron hatagan og kinabuhi kining mga saad ngadto Kaniya. Nagalaum ako nga nasabtan unta nato kini nga klaro gayud karon. Si Jesus, ingon nga usa ka Tawo, Siya Mismo, ang lawas, apan gikinahanglan nga maanaa ang Espiritu diha Kaniya, ang Espiritu. "Dili kini Ako ang nagabuhat sa maong mga buhat. Ang Akong Amahan kini nga nagapuyo Kanako. Siya Mao ang nagabuhat sa maong mga buhat." Kita n'yo? Si Jesus Mismo mao ang Pulong, tungod kay Siya man mao na kaniadto . . . Nga ang Dios wala pa . . .

⁵⁶ Dili kini maayong gamiton nga pulong, ug nagalaum ko nga inyo unta kining masabtan sa husto, sa atubangan sa daghang mga tawo. Apan Siya'y gipili-nang-daan pinaagi sa pagkahibalo-nang-daan sa Dios, kung unsa nga ang plano sa Dios mao, ang magpadala og usa ka Manluluwas, ug kini nga Manluluwas mao lamang ang Iyang Kaugalingong Anak. Busa, kung ingon-niana, mao diay kana ang saad sa Dios, gikan pa sa tanaman sa Eden, nga maania si Jesus. Ania Siya nga usa ka Tawo, nga natawo sa usa ka ulay, apan gikinahanglan ang Espiritu sa Dios aron buhion kanang Pulong ngadto Kaniya. Ug Siya mao ang Pulong, nga gihatagan og kinabuhi, ang Pulong nga nahimong buhi alang niadto nga panahon. Miabot ang panahon nga gikinahanglan mo na og Manluluwas. Napakyas man ang kasugoan. Napakyas usab ang uban pang mga butang. Busa, magkinahanglan gyud og usa ka Manluluwas, ug Siya mao ang gikasaad nga Manluluwas. Gihatagan Siya og kinabuhi pinaagi sa Pulong sa Dios.

⁵⁷ Ug karon kung kanang mao ra nga Espiritu nga atua Kaniya ingon nga Manluluwas niadtong panahon, nga atong nadawat karon ingon nga saad alang niining kaulahiing mga adlaw, nga mamahitabo; kung nahimo ka nga kabahin nianang Pulong, nan gitubos ka na uban Kaniya, tungod kay ang mao ra nga Espiritu nga nagapuyo kang Cristo nagapuyo man kanimo, nga nagapabuhi sa imong kinabuhi sa niini nga kapanahonan. Ug Kini usab, sa katapusang panahon, magahatag og kinabuhi sa inyong may-kamatayon nga mga lawas, pagabanhawon kini, bangonon kini pag-usab. Ginatangtang niana ang mga kaguol pag-ginatan-aw nato kana. Ug kana—ug mao kana ang Kamatuoran. Kita n'yo?

⁵⁸ Dinhi sa Mga Taga-Roma, gipamatud-an kana ni Pablo kanato. Kita n'yo? “Kung nagapuyo sa sulod ninyo ang Espiritu nga nagbanhaw kang Jesus gikan sa mga patay, pagahatagan usab Niini og kinabuhi ang inyong may-kamatayong mga lawas.” Kining mao gihapong Espiritu nga nagbanhaw Kaniya, ang naghatag og kinabuhi sa matuod nga magtotoo ngadto sa Kinabuhing Walay Katapusan. Ang Espiritu nga nagbanhaw kang Jesus gikan sa mga patay nga nagapuyo sulod sa magtotoo, mao'y nagahatag og kinabuhi sa magtotoo ngadto sa Kinabuhing Walay Katapusan.

⁵⁹ Aduna lamang og usa ka Kinabuhi, usa ka Espiritung Eternal, usa ka Kinabuhing Eternal, ug mao kana ang Dios. Ang Dios, lamang, mao ang Eternal. Ug dayon kita, ingon nga Iyang mga anak, kabahin Kaniya, nga, mga kinaiyahan sa Iyang panghunahuna. Ug gipahayag ang maong hunahuna ug nahimong pulong. Kung ingon-niana, ang matag indibiduwal nga ania dinhi, nga aduna niining Kinabuhing Walay Katapusan, anaa na diay sa panghunahuna sa Dios, sa wala pa ang pagkatukod sa kalibutan. Mao lang kana ang bugtong paagi nga mamahimong ingon niana, tungod nga usa ka man ka kinaiyahan. Ang pagpahayag sa hunahuna, mao nga nahimong Pulong; ug ang Pulong nakadawat og Kinabuhi, ug Eternal kini. Mao kana'y hinungdan nga aduna kita'y Kinabuhing Walay Katapusan. Sa mao gihapong prinsipyo sa halangdong Anak sa Dios, ang Manunubos; nahimo kiting mga anak nga lalaki ug mga anak nga babaye sa Dios, pinaagi nianang mao ra nga Espiritu, pinaagi sa mao gihapong pagkahibalo-nang-daan sa Dios.

⁶⁰ Matikdi n'yo ang minilyon ka mga tawo sa yuta nga wala midawat Niini kaniadtong ania pa si Jesus dinhi. Apan daw sa unsa kita ka angay nga magpasalamat niining buntaga, nga masayran nga aduna kita'y direktang ebidensiya ug mga kapanghimatuoran sa Biblia, nga kalakip kita nianang moabot nga buntag sa dakung pagkabanhaw, nianang halangdon nga Pasko sa Pagkabanhaw. Aduna na kita og patinga niini, karon mismo sa atong may-kamatayong mga lawas. Ang mga gipili-

nang-daan mao'y una, siyempre, nga pagabuhion, sa diha nga moabot ang Balaang Espiritu aron angkonon na ang mga Iyaha mismo.

⁶¹ Bueno, adunay halangdon nga pahayag, ug buut ko nga paninguhaon kining sabton sa mga igsoon kong ministro. Kita n'yo? Sa sinugdanan, ang Dios, ang halangdong Espiritu, Siya'y dili pa gani "Dios" kaniadto. Siya man ang Maong Eternal. Ang *Dios* mao'y usa ka "butang nga silimbahon." Wala pa Siya'y bisan unsa man kaniadto nga mosimba Kaniya. Walay—walay mga Anghel, wala gayu'y bisan unsa. Ang Dios lamang, Siya lamang, nga mao ang Eternal. Apan, aron nga mamahimong Dios, kinahanglan aduna gayu'y butang nga mosimba Kaniya, busa gilalang Niya ang mga Anghel, ug mga Linalang, ug mga Kerubin, ug uban pa, aron simbahon Siya. Hinay-hinay nga napadayag ang Iyang dakung plano.

⁶² Apan timan-i, ninyo, diha sa—sa kahimtang nga inyong nahimutangan, niining buntaga, kung wala kamo sa Iyang hunahuna kaniadto, nan dili kamo ingon niana sa karon. Tungod kamo, aduna ma'y usa ka bahin sa sulod ninyo, nga Eternal, ug ang pagka-Eternal iya lamang sa Dios. Ug ang Dios sa Iyang panghunahuna kaniadto magalingkod kamo diha mismo kon asa man kamo karon. Sa Iyang panghunahuna, magabarug ako sa pulpito niining buntaga, tungod kay wala man Siya'y kinutoban ug nasayod mismo sa tanang butang. Busa mahimo Niyang isulti ang katapusan gikan sa sinugdanan, tungod kay Eternal Siya. Ug ikaw, ingon nga usa ka anak nga lalaki sa Dios o usa ka anak nga babaye sa Dios, kung ingon-ana anaa ka na sa Iyang panghunahuna sa sinugdanan.

⁶³ Ug dayon pag-abot sa Balaang Espiritu, ug ania kamo sa yuta, nga nagakinabuhi dinhi ingon nga makasasala, pero sa kinasuloran sa inyong kinabuhi aduna gyu'y sa kung unsang butang. Wala kamo nasayod kung unsay nagakahitabo, apan nagakauhaw kamo. Nadungog ko ang igsoong Presbyterian; nadungog ko ang—ang Baptist nga nagahisgot, dinha sa likod, siya'y usa—usa ka Freewill Baptist, nga nagawali sa bisan asa nga mahimo niya. Igsoon ko, diha sa kinasuloran mo, aduna gyu'y butang diha kanimo, usa ka butang nga dili ikaw ang nagpahimutang dinha. Butang kana nga wala mo tinguhaa nga mamaanaa dinha. Butang kana nga sukwahi sa kaugalingon mong kinaiyahan. Kana mao ang pagkahibalo-nang-daan sa Dios, nga nagakahitabo, nga Pulong sa Dios.

⁶⁴ Sama ni Jesus nga natawo ingon nga Anak sa Dios, aron nga mamahimong Emanuel, ang bug-os nga kapahayagan sa Dios diha sa usa ka Tawo. Ug Iyang hingkaplagan Siya sa bug-os nga pagtuman, didto sa Suba sa Jordan, nga gibautismohan niadtong propeta. Ug sa dihadiha nga Iyang gituman Siya, ug mihawas na sa tubig, naabli ang mga Langit ngadto kang Juan. Ug nakita niya ang Espiritu Santo nga mikunsad gikan sa Langit,

nga nagaingon, “Kini mao ang Akong Anak nga hinigugma.” Kita n’yo? Tungod sa bug-os nga pagtuman, niadtong gipangita Siya sa Espiritu, nga atua sa pagtuman.

⁶⁵ Oh, nahisalaag nga lalaki o babaye, niining buntaga, kon ania ka man dinhi, ug adunay butang sa sulod mo nga nagaingon kanimo nga Kini’y husto, nan ang Balaang Espiritu kana nga nagapangita kanimo, aron dalhon ka ngadto sa kahibalo mahitungod sa Kamatuoran sa niining panahon nga atong gikinabuhian, dili sa kung unsa nga panahon nga miagi na, kondili ang sa karon nga panahon mismo.

⁶⁶ Adunay linibo kaniadto nga nanagtuman sa panahon nga milabay na. Apan aduna usab kaniadto og sa-karon nga panahon, mao kadto ang panahon nga mitungha si Jesus, ug atua mismo nagatindog ang Pulong. Atua usab didto ang mga tawo. Ug atua ang kapadayagan sa Dios nga nagakahitabo mismo, aron panghimatud-an nga mao kadto ang Kamatuoran.

⁶⁷ Ug ingon nga pentecostal nga mga tawo, sa karon, isulti ko kini, nga ania na kita sa niining kaulahiang mga adlaw diin gikasaad sa Dios nga igabubo Niya ang Iyang Espiritu sa tanang unod, ug ang Iyang mga anak nga lalaki ug mga anak nga babaye magapropesiya. Kay Siya miingon, “Kini nga mga ilhanan maganunot kanila nga nagatoo.” Mao na kini ang panahon. Mao kana ang nakapahimo nianang linalang sa sulod mo.

⁶⁸ Maingon sa ako nang gikasulti dinhi, dili pa lang dugay, medyo mapasipad-on kini; apan nagalaum ko nga dili unta, para kaninyo, niining buntaga. Adunay mag-uuma nga gipalumlum ang agila, o gipalumluman sa himongaon, ang usa ka itlog sa agila. Daghan kaninyo ang nakahinumdum sa maong sugilanon mahitungod sa agila nga nangitlog sa—sa niining...O, ang himongaon nga nakapapusa sa niining piso, o—o—o usa ka itlog sa agila nga gipalumlum sa ilalum sa mga balahibo sa manok. Kita n’yo? Tungod kana sa palibot nga kahimtangan.

⁶⁹ Ang iglesiang Presbyterian, iglesiang Methodist, iglesiang Baptist, ang si bisan kinsa kanila makapahimugso man niining mga agila. Oo. Ang palibot nga kahimtangan ang nagapahimo niana. Sama sa ginaingon kaniadto ni Dr. Bosworth, “Mahimo kang mokuha og usa ka itlog sa himongaon nga manok ug palumluman kana sa usa ka... ilalum sa usa ka itoy, ug ihigot ang itoy, ang maong itoy makapapusa gayud og sa ka manok.” Ngano man? Tungod kana sa palibot nga kahimtangan. Ug sa dihang ang unsa man nga iglesia o unsa man nga pundok nga magatigum sa ilang mga kaugalingon, ug mag-ampo hangtud nga isalikway na nila ang ilang mga kredo ug mga ingon-ana, ug direktso nga motan-aw sa nawong sa Dios, nan magpahimugso kana og mga agila sa ingon ka sigurado nga nagatindog ako dinhi.

⁷⁰ Ingon niana usab sa hunahuna ko ang ginabuhat niining grupo sa mga negosyante, nga ginapaninguhaang wagtangon ang maong kahimtangan. Naggrupo-grupo na man gud 'ta. Ang usa miyembro sa *ingon-ini* ug *ingon-ana*. Atong wagtangon ang maong kahimtangan ug dalhon kini nga kahimtangan ngadto sa usa ka Langitnong pagsimba. Pag husto gani ang kahimtangan, mahimugso gayud ang mga agila, gikan—gikan sa unsa mang iglesia, sa bisan asa.

⁷¹ Ug kining gamay'ng agila naglakaw-lakaw uban sa himongaan sa dugay nga panahon, apan ang—ang iyang pagkurokutok medyo lahi. Dili niya masabtan kung unsay buot ipasabot sa himongaan pagmagkakha kini diha sa—sa—sa nagkatipun—og nga mga hugaw sa—sa nataran. Ug dili man kana pagkaon, para kaniya. Ug nagakaon ang himongaan og mga insekto, ug uban pa, nga dili ginakaon sa usa ka agila. Busa medyo lahi gyud kanang, tanan, para kaniya. Ug siya ra ang lahi og hitsura; oo, dili ko ginasulti kini ingon nga pagpanamastamas, tingali'g usa siya ka Freewill Baptist, ug, basta mora'g ingon niana, o usa ka Presbyterian.

⁷² Apan, kabalo mo, usa niana ka adlaw nasayod gyud ang iyang inahan nga nakapangitlog siya og usa ka itlog. Siguradong aduna gyud siya'y usa ka piso sa kon asa man. Busa gibukhad niya ang iyang dagkung mga pako sa kahanginan, ug gipangita niya ug gipangita, nga nagasinggit sa makusog niyang tingog. Ug usa ka adlaw, nakalabay siya sa maong nataran. Ug sa dihang nadungog sa niining gamay'ng agila kanang pamilyar nga singgit, wala pa man niya kini nadungog sukad-sukad, apan nasayod siya nga mitukma gyud kini kaniya sama usa ka guwantes sa kamot. Ug nasayod gyud siya nga iya kadtong inahan. Nasayod pud ang inahang agila nga iya kadtong piso. Gipangita man niya kini.

⁷³ Ingon-niana usab ang Dios, sa matag kapanahonan, nagtagana-nang-daan Siya og Iyang Iglesia para nianang kapanahonan, og usa ka Mensahe para nianang kapanahonan. Ug mahimo nilang magbaton og mga kasugoan ug unsa mang butang nga gusto nila. Apan pagmoabot na ang takna, pagmoabot na ang Balaang Espiritu sa Dios, nga sa sinugdanan gihunahuna na ug gisulti na para nianang kapanahonan, pangitaon sa maong Espiritu kana nga itlog. Ug pagmadungog niya kanang Mensahe, walay iglesiang denominasyon ang makapugong niana. Molupad gyud kana ngadto sa kahitasan. Sigurado gayud. Usa man kana ka lahi nga langgam. Lahi kana nga linalang. Usa siya ka agila, ug dunggon niya ang maong singgit. “Ang Akong mga karnero nagapatalinghug sa Akong Tingog.”

Maingon sa gisulti sa usa ka tawo, ni Igsoong Williams, “Pagkaong pang-Karnero.”

74 “Ang Akong mga karnero nagapatalinghug sa Akong Tingog. Sa usa ka dumuloong dili sila monunot.” Bisan unsa pa ka maunongon ang iglesia, ug unsa pa ka bantugan kini. “Pag mapatalinghugan sa Akong mga karnero ang Akong Tingog,” nga mao ang Pulong, “sa usa ka dumuloong dili sila monunot.” Monunot sila diretso mismo nianang Pulong, ug mahimo niya kini. Sama kana sa usa—usa—usa ka magnet.

75 Usa ka adlaw, didto sa Indiana, nakabisita ako niadtong usa sa mga gamaanan og puthaw, ug adunay mitingog nga pito. Ug gihubo sa matag usa ang ilang mga tapis, ug gisugdan pagsilhihig ang. . . gikan sa ilang mga makinarya, ngadto sa tunga-tunga sa salog, ang mga tapyas nga ilang nahimo sa tibuok adlaw. Ug sa nagalakaw ako uban sa tawo nga naglibot kanako, ug miingon siya, “Tan-awa kana.” Ug gibutang sa matag lalaki ang iyang—iyang tapis sa ibabaw—ibabaw sa lamesa, og milakaw na.

76 Didto sa may pinakaluyo, gipindot niya ang usa ka gamay’ng pindotanan. Ug migula ang dakung magnet, ug gipang-magnet niini ang matag tipik sa mga puthaw nga natapyas niadtong mga makinarya, didto, ug mihawa na. Gikuha ang pang-magnet niini; og gipanghulog kadto sa usa ka cupola. Ug gipangtunaw kadto, para sa usa ka buok na usab nga—nga puthaw, para sa mao ra gihapon, nga mga ehe o kung unsa man ang ilang ginahimo.

77 Ug nagtindog ko didto ug nagtan-aw niadto, hangtud nga ako—nalinga na ako. Ug ingon ko, “Aduna ko’y nahunahunaan.”

Ingon siya, “Unsa man kana, sir?”

Ug ingon ko, “Akong namatikdan nga ang pipila niana wala nadala sa magnet.”

78 Ingon siya, “Aluminum man kana, ug dili man gud makabig sa magnet ang aluminum.”

79 Ingon ko, “Mao diay.” Ug ingon siya. . . Dayon miingon ko, “Bueno, matikdi, *aduna* man lagi usa ka buok nga puthaw ang nahibilin dinha.”

“Apan, nakita mo, sir, naka-tornilyo man gud kana.”

80 Ingon ko, “Okey.” Ug sa gikuha na niya kadto, ingon ko, “Karon unsa ma’y mahitabo, niana *dinha*?”

81 Miingon, “Ibalik kana ngadto sa gamaanan, ihulog ngadto sa cupola, ug ibalik na pud ug himoon og usa na usab ka ligid.”

Ingon ko, “Dalaygon ang Ginoo!” Ingon niana. Kita n’yo?

82 Aduna usab og usa ka dakung magnet diha sa kawanangan, nga usa ka adlaw pagagamiton sa Dios pinaagi sa Iyang mga tudlo. Walay tawong nasayod sa oras sa Iyang Pag-abot, bisan ang mga Manulonda sa Langit, wala gani nasayod. Ang Dios lamang ang nahibalo. Apan aduna na’y pipila ka mga gitapyas tungod sa Biblia, mga Biblianhong Cristohanon, og mga magtotoo niining panahona. Ang usa kanila tingali’g usa

ka ehe sa usa pa ka panahon kaniadto. *Kini* usab tingali lahi pud nga parte. Magapadayon kini sa pagporma hangtud ngadto sa dakung paghari na sa Dios. Apan pagahulmahon kini diha sa kulon sa dakung cupola sa Dios, ug igabubo pag-usab aron mamahimong mga dagway sa Dios. Ug kadto lamang mga madala sa magnet ang pagalalinon. Oh, daw sa... Pagkamaanindot nga pribilihiyo kini, ang masayran nga aduna gayu'y usa ka butang diha sa pagkabanhaw nga nakapahinungod kanato!

⁸³ Karon, matikdi, naila niya ang pagtawag sa Pulong sa Dios, diin siya'y usa ka kabahin na Niini. Ug kana'y agila ngadto sa usa pa ka agila. Bueno, kung misinggit kadtong inahang agila nga sama sa usa—usa ka buitire, nan wala gyud niya unta maila kadto. Tingali'g mas maayo pang magpabilin na lang siya didto sa nataran. Apan singgit man gud kadto sa usa ka agila. Aduna gyu'y butang sa sulod niadtong gamay'ng agila, nga hingsayran niya nga usa diay siya ka agila.

⁸⁴ Ug mao gihapon sa matag tinuod nga magtotoo. Pag-maiwali ang Pulong sa Dios, ug napanghimatud-an ug napamatud-an nga mao gyud kana ang Pulong sa Dios alang niining panahona, nan aduna gyu'y Butang sa kinasuloran sa maong magtotoo. Dili ko igsapayan kung unsa man ka madapigon ang iyang amahan ngadto sa usa ka iglesia, o kung unsa man ka madapigon ang iyang inahan, o kaha ang iyang mga apohan, ug kung kana nga iglesia nagatudlo og sukwahi niining sa karon nga takna nga Mensahe mahitungod sa bautismo sa Espiritu Santo. Aduna gyu'y butang sa sulod niya nga magasinggit. Pagabiyaan niya ang maong nataran. Siguradong buhaton niya kana. Tingali'g okey ra kanang manok para sa usa ka panahon, apan panahon na kini sa agila. Kita n'yo? Kini—lahi na kini. Adunay butang, nga, kinahanglan niyang biyaan ang karaang hawla ug molupad pataas ngadto sa kawanangan. Dayon pagabuhion kining yutan-ong lawas ug pagadalhon, sa Espiritu nga nagahatag og kinabuhi, ngadto sa pagtuman sa Pulong sa Dios.

⁸⁵ Bueno, sa diha nga kining Balaang Espiritu, nga girepresentar ingon nga agila nga nagalupad ibabaw sa yuta, ug nagapangita sa magtotoo. “Walay tawong makahimo sa pag-ari Kanako, walay tawong makahimo sa pag-ari Kanako sumala sa gusto niya. Ang tanan nga gikahatag Kanako sa Amahan magaari Kanako, apan walay tawong makahimo sa pag-ari pinaagi sa iyang kaugalingon mismo.” Dili kana sumala sa kaugalingon mong panghunahuna, sa kaugalingon mong pagbira. Ang Dios, mao ang nagabira. Kita n'yo? “Ang tanan nga gikahatag Kanako sa Amahan magaari Kanako.”

⁸⁶ Karon, ang Balaang Espiritu ania man sa yuta, nga ginapangita kadtong mga tawo niining kapanahonan nga gitagana na sa Dios ngadto sa Kinabuhi. Ug sa dihadiha nga

makaplagan na sila Niini, buhaton Niini ang sama sa gibuhit Niini kaniadto kang Jesus Cristo, ang labing halangdon nga Anak sa Dios Nga nagtubos kanatong tanan. Mokunsad Kini ug mopuyo sa dapit nga puloy-anan Niini sulod sa kinabuhi sa tawo, bueno, matikdi, og ginahatud ang gahum nga nagahatag og kinabuhi. Bueno, kadtong gahum nga nagahatag og kinabuhi nga mikunsad kang Jesus gibuhi Siya niadto aron mapadayag ang matag saad sa Pulong alang niadtong adlaw. Mao man usab ang Balaang Espiritu nga mianhi kanato sa niining panahon, dili nga sinundog-sundog lang nga balaang espiritu, dili yawa nga ginasundog-sundog lang ang Balaang Espiritu, kondili ang matuod, tinuod gyud nga Balaang Espiritu. Igapadayag Niini ang saad alang niining panahon.

⁸⁷ Kaniadtong mikunsad Kini kang Luther, gipadayag Niini ang saad para niadto nga panahon. Kaniadtong mikunsad Kini kang Wesley, gipadayag 'sab Niini ang saad para niadto nga panahon. Sa diha nga nagakunsad Kini sa niining adlaw, ginapadayag Niini ang saad alang niining panahon. Sa dihang mikunsad Kini kaniadto kang Moises, gipadayag Niini ang saad para niadto nga panahon. Kaniadtong mikunsad Kini kang Noe, gipadayag pud Niini ang saad para niadto nga panahon. Kaniadtong mikunsad Kini kang Jesus, gipadayag Niini ang saad alang niadtong panahon. Kita n'yo?

⁸⁸ Ang Balaang Espiritu Kini nga nagakunsad, aron hatagan og kinabuhi, buhion kadtong mga tawo nga gitagana-nang-daan sa Dios nga mahiuban sa Pagsakgaw. Matikdi. Kana, kung siya'y usa ka tinuod nga agila, masabtan niya ang Mensahe sa niining panahon kung siya'y usa ka tinuod gyud nga agila. Bueno, ang gamay'ng agila, diha sa nataran, okey ra nga nagakaon pa, apan nasayod siya—siya nga dili gayud kadto mao. Apan sa diha nga napatalinghugan niya ang Kamatuoran, nan gidawat niya kining Kamatuoran. Karon, diha sa Juan 14 . . .

⁸⁹ Juan 5:24, diay, miingon si Jesus, nga nagasulti nga ingon niini, “Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing walay katapusan, ug dili pagahukman sa silot, kondili miagi na gikan sa kamatayon ngadto sa Kinabuhi.” Palandunga lang ninyo kung unsa kana ka yano, “Siya nga nagatoo.” Bueno, ang husto gyud nga paagi sa pagsulti niana, “Siya nga nakasabot.”

⁹⁰ Karon, adto ka didto sa dalan ug sultihi kanang bigaon, “Nagatoo ka ba?”

“Oo.”

“Nagatoo ka ba nga Siya mao ang Anak sa Dios?”

“Nagatoo gyud.”

“Nabautismohan ka na ba?”

“Oo.”

⁹¹ Adto ka sa palahubog, og moingon, “Napatalinghugan mo ba Kana? Napatalinghugan mo ba kanang magwawali nga nagawali?”

“Oo.”

“Nagatoo ka ba Niana?”

“Oo.” Kita n’yo?

⁹² Apan, “Siya nga nakasabot, siya nga nahibalo sa iyang puwesto sa niining panahon, siya nga nagapatalinghug sa Akong Pulong ug nagatoo Kaniya nga nagsugo Kanako, adunay” (verbong pang-karon) “Kinabuhing Walay Katapusan. Dili pagahukman sa Silot, kondili miagi na gikan sa kamatayon ngadto sa Kinabuhi.” Dayon sa dihang nagapuyo na kining bag-ong Eternal nga Kinabuhi sa sulod ninyo, mao na mismo Kini ang potensyal, o ang imong patinga ingon nga gibuhi na gikan sa pagkaadunay-kamatayon ngadto sa pagkawala-na’y-kamatayon.

⁹³ Isulti ko kini pag-usab. Sa diha nga Kining Espiritu nakakaplag na kanimo, ingon nga indibiduwal, ug mikunsad na kanimo, mao na Kini ang patinga sa imong Eternal nga panulondon nga gihunahuna na sa Dios kanimo ug gihimo para kanimo sa wala pa ang pagkatukod sa kalibutan. Mao kana ang imong patinga.

⁹⁴ Sama lang kung mangayo ka kanako og usa ka kahoy’ng encina, ug hatagan ’ta ka og usa ka liso niini. Bueno, ang—ang—ang kinabuhi sa kahoy’ng encina anaa man sa liso niini, apan kinahanglan mo ’unang maghulat hangtud nga motubo kini.

⁹⁵ Mao usab kita. Sa diha nga nadawat mo na ang Balaang Espiritu sa Dios, patinga Kana sa Dios nga nagpaabot na kanimo, nga miila na kanimo. Ug naselyohan ka na sa Espiritu sa saad, sa Dios, pasulod ngadto sa Lawas ni Cristo. Kaniadtong midungaw ang Dios didto sa Kalbaryo ug nakita si Jesus nga himalatyon na, dili lamang Siya . . . namatay Siya alang sa Iyang Pangasaw-onon, ang Lawas, nga mao ang Iglesiang Pulong, ang Iglesia nga nagatoo sa Pulong sa Dios alang sa maong panahon, mga tiil man kini, lawas, ulo, o unsa man kini. Kita n’yo? Kini’y . . . Midagayday ang dugo ni Cristo ug namatay. Ug ang Dios, nga naglantaw Kaniya, nakita na ang Iyang pagkabanhaw, ug nabanhaw ang Iglesia uban Kaniya sa Pasko sa Pagkabanhaw.

⁹⁶ Karon, gusto ko nga sabton ninyo kining tanan, tungod aduna ko’y usa ka butang dinhi nga gusto kong isulti, pagkataud-taud, kon itugot sa Ginoo.

⁹⁷ Karon matikdi. Kini mao ang patinga, o ang potensyal. Ang gahum nga nagahatag og kinabuhi sa imong pagkabanhaw, pagmadawat mo na ang Balaang Espiritu, nan nagapuyo na sa sulod mo, ang potensyal niini.

⁹⁸ Matikdi, nagapadulong ka—ka na karon, nga nagatubo na paingon sa bug-os nga pagkabanhaw. Wala ma'y punoan nga nagatubo sulod sa usa ra ka gabii. Kinahanglan motubo kana, maingon nga nagatubo kita diha sa grasya ug kahibalo mahitungod sa Dios. Nabautismohan ka na pasulod ngadto sa Balaang Espiritu. Bueno, maingon nga ang pentecostal nga Iglesia, nabautismohan na pasulod ngadto sa Balaang Espiritu, hinay-hinay Kining nagatubo. Patay na ang mga sanga. Gipangputol man nila kini. Apan nagatubo sa gihapon ang maong Punoan, padayon sa gihapon nga nagatubo, tungod kay kinahanglan man Kining modangat ngadto sa pagkabanhaw.

⁹⁹ Gipangunahan sila sa Espiritu, aron hatagan og kinabuhi ang Pulong para kaninyo nga mga magtotoo. Padayon nga buhi ang Pulong, samtang nagapaingon kamo sa unang pagsanga, ikaduhang pagsanga, ikatulong pagsanga, paitaas. Padayon Kini nga nagahatag og kinabuhi aron magpatubo. Ang Espiritu sa Dios padayon nga nagahatag og kinabuhi para kaninyo.

¹⁰⁰ Himatikdi niadtong, Pentecostes, ang ilang mga lawas kaniadto gipangbuhi pinaagi sa bag-ong Kinabuhi nga ilang nadawat. Nagapabati gyud kana kanako og pagkarelihiyoso. Palandunga ninyo. Karon, kadto'y mga kalalaken-an, mga mangingisda, mga maniningil og buhis, og ang mga mapainubsanong kababayen-an sa...ug ordinaryo lamang nga mga asawa, og ulay nga mga batang babaye. Sila'y mga magtotoo. Nanagtoo sila nga mao kadto ang Kamatuoran. Nanagtoo sila nga, sa dihang namatay si Jesus (Nanagtoo sila Kaniya.) ug nabanhaw, gikan sa mga patay, gitoohan nila kadto ingon nga bug-os nga pagpamatuod sa Dios, nga gibuhi gyud Niya Siya.

¹⁰¹ Karon, miadto sila didto, sa Adlaw sa Pentecostes, aron dawaton ang ilang abstract. Nahibalo ba mo kung unsa ang abstract? Kini mao'y sa diha nga limpyo na gyud ang usa ka titulo. Nangadto sila didto aron dawaton ang ilang abstract. Ug nangadasig sila, o grabe ang ilang kalipay! Napalit na man gud nila ang yuta; gipalit para kanila. Nadawat na nila mismo.

¹⁰² Tinuod ba kini o dili? “Nakita namo Siya nga nabanhaw, apan karon unsa na man kami? Mga saksi kami. Nanagtindog kami didto ug nakita ang maong Tawo nga gilansang. Nakita namo ang mga panganod nga mitabon sa yuta ug nagpangitngit sa kalangitan. Ug ang—ang yuta milinog ug miuyog; miyukbo kini nga nahadlok. Dayon sa dihang...Gipahimutang nila Siya sa lubnganan. Gidughang nila Siya sa kasingkasing, gamit ang bangkaw, ug gikuha nila ang Iyang lawas ug gipahimutang kini sa lubnganan nga iya ni Joseph Arimathea.”

¹⁰³ Ug dayon hingsayran nila, nga, sa ikatulong adlaw, nabanhaw Siya. Ug sumala sa gisulti sa tinun-an, “Mga saksi

kami niini. Nakita namo Siya nga nabanhaw. Nasayod kami nga buhi Siya.”

¹⁰⁴ Bueno unsa ma’y nabuhat niana? Giwagtang niana ang tanang kahadlok. Dili ikatingala nga miingon si Jesus, “Ayaw kahadlok. Ako Mao ang namatay, ug buhi hangtud sa kahangturan.” Kita n’yo? Giwagtang niana ang tanang kahadlok, sa diha nga nasaksihan nila kadto.

¹⁰⁵ Bueno, apan sa diha nga mitungas sila ngadto sa Pentecostes, didto nila nadawat ang gahum nga nagahatag og kinabuhi, ang gahum nga nagpabuhi kanila.

¹⁰⁶ Karon dinha ko mahunahuna nga, kamong Presbyterian ug Methodist nga mga kaigsoonan, nadawat na man ninyo kini sa potensyal sa diha nga gitoohan n’yo ang Ginoong Jesus Cristo, apan wala pa miabot ang maong abstract. Ang paglimpyo sa titulo.

¹⁰⁷ Gihatagan sa Dios si Abraham kaniadto og usa ka saad. Gitoohan ni Abraham ang Dios, ug kadto giisip kaniya nga pagkamatarung. Apan giselyohan sa Dios ang maong pakigsaad pinaagi sa selyo sa sirkunsisyon.

¹⁰⁸ Ug gihatagan usab kamo sa Dios og usa ka saad, sa potensyal, nga madawat ninyo kini, ug pagabanhawon kamo, nga kini nga lawas pagahimayaon uban Kaniya sa katapusang panahon. Apan, nakita n’yo, kinahanglan malimpyohan ‘usa kana nga titulo. Ug ang paglimpyo niini mao’y sa diha nga maimbalido ang tanan nga mahimong may pag-angkon niana, ug naangkon mo na ang abstract sa nianang titulo. Anaa na kanimo ang selyo. Imoha na kana. Ang tanan nga anaa niana panag-iya mo na. Amen.

¹⁰⁹ Ug sa diha nga toohan nato si Jesus Cristo ingon nga atong Manluluwas, ug maghinulsol ug magpabautismo, ug moduol nga ginatoohan Siya; nan dawaton sa Dios ang atong paghinulsol ug ang atong pagtoo nganha Kaniya, ug ipadala Niya ang maong abstract. Ug ang abstract mao ang kasiguradohan. Garantiya kana nga, ang tanan nga gipasangil batok kanimo, bug-os mo na nga gihinulsolan. Alleluyah! Ug napalit na ang maong kabtangan, ug bitbit mo na ang abstract alang sa maong kasigurohan.

¹¹⁰ Bisan aduna pa’y mosulay sa pagpahawa kanimo gikan sa maong yuta, moingon nga panag-iya niya kono, ug samtang nga anaa sa imong kamot ang abstract. Bisan buhaton pa niya kana. Wala gyu’y ni usa ka balaod sa yuta ang makahimo niana, tungod anaa man kanimo ang abstract.

¹¹¹ Ug walay yawa, walay iglesia, o unsa mang teolohiya, nga mahimong molagpas sa mga utlanan sa kapanghimatuoran ug abstract sa Dios, nga ang bautismo sa Espiritu Santo miila na kanato diha kang Jesus Cristo. Ingon ka sigurado na kita

nga mabanhaw maingon nga Siya nabanhaw, tungod kay sa potensyal nabanhaw na man kita diha Kaniya. Amen.

¹¹² Ang mga butang nangagi na. Unsa ma'y ginahimo niana sa atong may-kamatayon nga mga lawas? Ginawagtang niini ang atong opinyon, ginausab ang atong mga ideya. Ginapatumong niini ang atong mga paghigugma ngadto sa mga butang nga anaa sa Itaas. Ug ang pagpanigarilyo, paghubog-hubog, pagsugal-sugal, ang mga butang nga ginabuhat ninyo kaniadto, patay na. Mga anaa na kana sa ilalum mismo.

¹¹³ Ug gihatagan kamo og kinabuhi. Ug gidala na niining gahum nga nagahatag og kinabuhi ang inyong lawas ngadto sa usa ka gisakgaw na nga kahimtang. Matikdi ang mga tawong pentecostal didto, kaniadtong nangadasig sila tungod sa Balaang Espiritu. Paminaw mo kanako. Sa dihang nadawat niadtong pentecostal nga pundok didto, sa Adlaw sa Pentecostes, ang ilang titulong abstract gikan sa Dios, oo, gihimaya niadto ang ilang mga kalag. Nanagsinggit sila. Nakita nila ang mga dila sa Kalayo nga gipang-apod-apod sa matag usa kanila. Ug gihatagan Niini og kinabuhi ang ilang lawas, hangtud nga dili na gani sila makasulti og bisan unsa nga yutan-ong pinulongan. Gihatagan Niini og kinabuhi ang ilang lawas para sa usa ka Langitnong pinulongan, ang Dapit nga ilang padulngan. Giuyog sa gahum sa Dios nga nagahatag og kinahubi ang ilang may-kamatayon nga mga lawas, hangtud nga ang tibuok nilang mortal nga pinulongan nabag-o, og nausab ngadto sa usa ka imortal nga pinulongan. Pagkagrabe nga gahum nga nagahatag og kinabuhi! Unsa? Butang nga panag-iya na.

¹¹⁴ “Kung ang Espiritu nga nagbanhaw kang Jesus gikan sa mga patay, nagapuyo sulod sa inyong may-kamatayon nga mga lawas, magahatag usab Kini og kinabuhi sa inyong may-kamatayon nga mga lawas.” Kung ingon niana gihatagan na kita og kinabuhi pinaagi sa gahum sa buhi nga Dios.

¹¹⁵ Mga sinultihan, nga giusab na ngadto sa usa ka bag-ong Langitnon nga pinulongan, aron ipamulong nila; usa ka pagsakgaw, nga gipaitaas na ngadto sa usa ka kahimtangan nga lahi na kaysa kaniadto. Usab, tungod sa bag-ong nagapabuhi nga Kinabuhi ngadto kanila, nga miabot kanila, giusab Niini ang ilang pinulongan. Nanagsulti na sila og bag-ong mga sinultihan. Oh, oo!

¹¹⁶ Karon matikdi sila. Gikatagana usab nga pagahatagan sila, pagkahuman niining abstract, gikatagana na nga igahatag kanila ang matag saad nga anaa sa maong yuta. Ang matag saad nga anaa sa yuta sa Pulong sa Dios, nga gikasaad diha sa Biblia, kanang gahum nga nagahatag og kinabuhi gihatag ngadto kanila, aron buhion ang maong saad para kanila. Busa, gipandongan nila og mga kamot ang mga masakiton, og nangaayo sila. Nanagsulti sila og bag-ong mga sinultihan.

Nanagbuhat sila og dagkung mga ilhanan ug mga katingalahan, tungod kay sumala man kana sa saad sa Dios. Ug sa diha nga namatay si Jesus, aron tubson kana pabalik kanila, ang maong mga yuta nga panag-iya sa mga anak sa Dios, og Iyang gipamatud-an kung unsa gayud ang Dios.

¹¹⁷ Grabe ka mapangahason nato nga ihilambigit kana ug ipahimutang kana ngadto sa usa ka organisasyon? Wala gyud kita'y katungod nga buhaton kana.

¹¹⁸ Ang Balaang Espiritu, karong panahona, ang mao'y nagapangita og matinuuron nga mga kasingkasing nga motoo niining Mensahe. Ang tanan diha sa Biblia, nga gikasaad, alang kana niana nga magtotoo. Ug sa dihang imo kining dawaton diha sa kahupnganan niini, ug nasayod man ang Dios nga dawaton mo gyud kini, nan ihatag Niya kanimo ang abstract niini. Ug kung ingon-ana ang matag saad nga gihimo panag-iya mo na, ug anaa ang Balaang Espiritu dinha aron buhion kana para kanimo. Oh, grabe! Unsa—unsa na kita nga matang sa mga tawo? Pagkamaanindot gayud nga makita ang halangdong Balaang Espiritu sa Dios nga ania dinhi aron buhaton kana nga gahum! Palandunga kana. Ingon nga, ania ang Espiritu Santo, aron magpamatuod mismo sa niining panahon. Mao kana ang giingon ni Jesus. Siya mao sa gihapon kagahapon, karon, ug hangtud sa kahangturan.

Kinsa man nga tawo ang mangahas nga papason kana Dinha?

¹¹⁹ “Ang mga buhat nga Akong ginabuhath inyo usab pagabuhaton,” Juan 14:12. “Kini nga mga ilhanan maganunot kanila nga nagatoo.” Mao kana ang kasiguradohan. Pagmakita nato ang usa ka pundok sa mga tawo nga magkauban nga nagalingkod, ug nahipadayag diha kanila kana nga mga ilhanan, nan mao kana ang kasiguradohan nga anaa dinha ang maong abstract nga nagapanghimatuod nga panag-iya kana sa Dios. Amen.

¹²⁰ Busa, kita mao ang Pagkabanhaw, usab. Amen. Anaa na kita karon sa atong Pagkabanhaw. Nabanhaw na kita, alleluyah, gikan sa mga butang nga iya sa kalibutan, ngadto sa mga butang nga saad sa Dios. Dili nga kita'y pagabanhawon pa; kondili nabanhaw na kita. Mao na kini ang potensyal.

¹²¹ Mao kini ang saad sa Dios. Igabubo Niya ang Iyang Espiritu sa kaulahiya nga adlaw, ug mao kana ang ilang pagabuhaton. Himatikdi, gipandongan nila og mga kamot ang mga masakiton; tanang butang sumala sa saad sa Dios. “Igabubo Ko ang Akong Espiritu sa kaulahiya nga adlaw, sa tanang unod. Ang inyong tigulang nga mga lalaki managdango og mga damgo. Ang inyong mga batan-ong lalaki makakita og mga panan-awon.” Ug tanan niining nagkalainlaing mga saad nga Iyang gihimo, ang tanan

niini anaa mismo diha sa saad sa Dios. Gitubos kini ni Jesus para kanato. Ug sa diha nga kita nahimong . . .

122 O, kita, kung gikatagana man kita diha niana nga luna, kung gikatagana kita nga maanaa diha niana nga lugar; sama sa agila nga nagalakaw-lakaw diha sa pugaran sa manok. Kung gikatagana ka diha niana nga lugar, anaa ang Balaang Espiritu aron pangitaon ka. Ug pagmakaplagan ka Niini, mailhan mo usab ang tawag Niini. Masayran mo ang panahon nga imong gikinabuhian. Masayran mo nga kining mga butanga kinahanglan nga magakahitabo. Sa gilayon pagasakgawon ka aron tagboon Kini, ug ikaw karon nagalingkod na sa Langitnong mga dapit diha kang Cristo Jesus. Oh, pagkamaanindot nga saad! Pagkahalangdon nga Langitnong Amahan, Nga mohatag kanato niining mga butanga!

123 Ginadasig usab sa Espiritu ang ilang pagpakig-fellowship sa Dios, aron mahimo nilang tawgon ang mga patay ngadto sa pagkabuhi, niadto nga adlaw. Pagnatapad ra ang ilang mga lawas ngadto sa mga patay; nagakabuhi ang maong mga patay. Paminaw og ayo. Gibuhat nila kaniadto ang mao gihapong mga butang nga gibuhat ni Jesus tungod kay ang mao rang Espiritu, nga atua Kaniya, atua man usab ngadto kanila. Kung ang usa ka Espiritu makapahimo sa usa ka tawo nga mamuhat og ingon niini, nan mahimo usab Niini nga mapabuhat ang usa pa og ingon usab niana. Kung ang usa ka . . .

124 Giunsa kaha pagkunsad Niini diha sa usa ka tawo, nga nagaingon nga anaa kono kaniya ang Espiritu sa Dios, pero ginapanghimakak man ang mga buhat sa Dios? Dili gayud kana mamahimo.

125 Himatikdi. Ang Kinabuhi sa Dios, nga sa Griyego gitawag og *Zoe*, nagapanglihok pinaagi kanila ug anaa kanila, og gihatagan og kinabuhi ang ilang mga hunahuna alang ngadto sa Iyang Pulong. Bueno, isulti ko kini sa ingon ka hapsay karon. Ang Espiritu sa Dios nga nagapanglihok taliwala sa mga tawo, ginadasig ang hunahuna sa tawo ngadto sa saad sa Dios. Kita n'yo? Ingon niana ang ginabuhat Niana. Matikdi. Ug gapaningkamot kong ipakita kaninyo ang—ang . . . ug ipaamgo kaninyo nga ang ginapahinungdan ko karon mao ang Iglesia, ug ingon nga gihatagan usab Kini og Kinabuhi, diha Kaniya.

126 Bisan pa, sila'y Iya lamang mga kinaiyahan, sa sugod pa lang. Apan kung miingon ang Dios, “Sa *niini* nga adlaw,” sa sinugdanan kaniadto, “Si John Doe mamahimong Akong alagad,” kaniadto pang minilyon ka mga tuig. Karon, si John Doe siya'y natawo sa sala, giuamol diha sa kadautan, mianhi sa kalibutan nga nagapanulti'g bakak, tungod kay usa man siya ka mortal. Apan, mahimong, mobati usab siya og pagkarelihiyoso diyutay. Siya'y mahimong magpamiyembro sa usa ka iglesia. Tingali'g magpamiyembro siya sa iglesiang Pentecostal. Wala

ako mahibalo. Tingali'g magpamiyembro siya sa bisan unsa. Apan tugoti siyang mapailalum sa kahimtangan sa Dios, sa makausa ra. Kita n'yo? Siguradong mailhan gayud ni John Doe kung Kinsa ang iyang Amahan, sama niadtong agila nga nakaila kung kinsa ang iyang inahan. Siguradong mailhan gyud niya kana. Kita n'yo? Tungod, si John Doe kinaiyahan man sa Dios nga nahimong pulong, gilitok, ug dayon gipangita sa Balaang Espiritu kana nga pulong. Ania na. Iya siyang gitawag, gihatagan og Kinabuhing walay katapusan, ug gidala siya ngadto sa Presensiya sa Dios, sa Pulong sa Dios.

¹²⁷ Matikdi. Mao gihapon ang gibuhat ni Jesus sa diha nga nakita Niya si Jesus. Kadto mao ang—kadto mao ang tapos na nga buhat nga gitapos sa Dios pinaagi ni Jesus, sa dihang miingon Siya, “Tapos na.” Tapos na ang tibuok plano.

¹²⁸ Ug pag moabot kanimo ang Espiritu sa Dios, ug ikaw usa gayud sa mga kinaiyahan sa Dios nga Iyang gilitok. Bueno, kung dili man, mahibulong ug maglibog ka lang, ug mopaingon ka lang *dinhi* ug *didto*, ug bisan asa na lang, ug dili gayud mahidangat ngadto sa kahibalo sa Kamatuoran. [Blangko nga bahin sa teyp—Ed.] Pero kung ikaw usa man niadto, ang mga daang butang siguradong mangahanaw gyud sa gilayon, kita n'yo, ug mamahimo ka na nga bag-o, ug ang plano sa kaluwasan kumpleto na. Andam ka na nga motuman sa matag Pulong nga gisulti sa Dios mahitungod kanimo, kita n'yo, nga pagabuhaton mo. Masinugtanon ka na sa Iyang Pulong. Ang kontrata, eksakto gayud, ang abstract ngadto sa maong kontrata, imoha na gyud ang titulo. Gibayran na ang tanang mga utang. Bug-os nang gipanas ang maong mga utang, ug pareho sa nahitabo kaniadto sa Adlaw sa Pentecostes.

¹²⁹ Karon atong tan-awon ang maong mga paghatag og kinabuhi, kining Espiritu nga nagahatag og kinabuhi diha sa ubang mga tawo.

¹³⁰ Bueno, nagsulti na man ko kaninyo nga dili ako mamulong og dugay, ug aduna ko'y baynte na lang ka minuto aron tumanon ang akong gisulti, kung madugay man ko, bantayi ninyo, nga magpabilin ra gyud sa oras nga akong gikasulti, nga mga—mga usa ka oras.

Matikdi karon kining gahum nga nagahatag og kinabuhi. Nagaabot lang kana . . .

¹³¹ Bueno, daghan kaayo ang pagsundog-sundog Niini. Daghan kaayong mga tawo nga nanagdahum nga aduna sila Niini, apan wala diay. Daghang mga tawo ang nagabuhat niana tungod kay aduna man sila'y pipila ka sayup nga panghunahuna mahitungod sa kung unsay ilang nakita nga ginabuhat sa ubang mga Cristohanon. Mahimo man ni Satanas ang pagsundog-sundog sa bisan unsa niana. Nasayod kita niana. Ug ingon nga mga misionaryo, makita man ninyo Kini nga gisundog-sundog:

ang mga pagsinggit, pagsayaw-sayaw, pagsulti og laing mga dila, og tanan niining mga butanga. Makita ninyo Kini nga gisundog-sundog sa bisan asa na lang. Mao gyud. Taliwala sa mga pagano ug sa mga tawo nga nagapanghimakak nga adunay ingon-anang butang nga sama ni Jesus Cristo nga Anak sa Dios. Kita n'yo? Ug ginabuhat nila mismo ang tanan nianang mga butanga, sila mismo.

¹³² Apan ang matuod, og tinuod nga Espiritu nga nagahatag og kinabuhi nga nagakunsad sa magtotoo, ginabuhi siya ngadto sa Pulong sa Dios, ginapabalik siya ngadto sa pang-agilang Pagkaon, pabalik ngadto mismo kon diin siya mabuhi. “Ang tawo dili mabuhi sa tinapay lamang, kondili sa matag Pulong nga nagagula sa baba sa Dios.”

¹³³ Atong himatikdan karon kining Espiritu nga nagahatag og kinabuhi sa diha nga nagakunsad Kini sa uban pang mga tawo, sama sa gibuhat Niini sa—sa Adlaw sa Pentecostes.

¹³⁴ Matikdan nato ang Pentecostes, kung giunsa nila pagpanglihok kaniadto, ug atong hibaloon kung nadasig ba gyud sila pinaagi niining gahum nga nagahatag og kinabuhi nga atong ginahisgotan. Sa Adlaw sa Pentecostes, nanaghulat silang tanan didto. Sa kinasuloran nila mismo, nangahadlok sila. Ang maong mga Judio, sumala sa kung unsa gyu'y buhaton nila, nangahadlok sila. Apan unsa ma'y nahitabo? Sa dihang mikunsad na kining gahum nga nagahatag og kinabuhi gikan sa Langit, miabot kanila ang kaisog. Adunay butang, usa ka pagsabot, diin dili pa kaayo sila sigurado niadto pipila ka oras sa wala pa kadto. Nasayod sila nga Siya'y—namatay na Siya.

¹³⁵ Nasayod sila nga nabanhaw na Siya. Ngani nakapakig-estorya diay sila Kaniya didto sa ilang panaw. “Apan para ba gyud kaha kanila kadto nga butang, o para lang kadto kanila, para kang Jesus Mismo?”

¹³⁶ Apan didto sa Adlaw sa Pentecostes, ang Balaang Espiritu, ang abstract miabot ngadto sa mga magtotoo. Nagpahinungdan kadto kanila nga mahimong kabahin sa Iyang pagkabanhaw, nagpahinungdan nga mahimong kabahin sa pagpakig-fellowship Kaniya. Mikunsad ang Balaang Espiritu ug nagpanghimatuod kanila nga pagabanhawon sila, tungod kay potensyal man silang gibanhaw na, gikan sa pagka-talawan ngadto sa pagka-maisogon nga mga tawo.

¹³⁷ Sila'y—sila'y nangahadlok sa mismong Pulong nga ilang gipalandungan. Ayaw kini ipalagpas lang kaninyo. Nangahadlok sila. Bisin nasayod sila nga Siya mao kadtong Pulong.

¹³⁸ Bisin ang mga Judio kaniadto miangkon man niana. Miingon si Nicodemo, “Rabbi, nasayod kami nga usa Ikaw ka magtutudlo nga nagagikan sa Dios. Walay tawong makabuhat sa mga butang nga Imong ginabuhat gawas lamang kon ang

Dios anaa uban Kaniya. Karon, hingsayran namo kana. Naila namo kana.”

¹³⁹ Busa ang mga tinun-an. . . Nanumpa pa gani si Pedro diha sa Iyang Atubangan. Gisalikway nilang tanan Siya didto sa paglansang na Kaniya sa krus.

¹⁴⁰ Apan sa dihang atua na sila niadtong hataas nga lawak, sa Presensiya sa Dios. Dayon, sa kalit lang, mikunsad kining Balaang Espiritu gikan sa Langit, ug gidasig sila Niini. Ug sa dihang nahitabo ang maong pagkadasig, wala na sila nangahadlok nga magpamatuod mahitungod sa Mensahe nga ilang gitooan ug hingsayran nga mao ang Kamatuoran. Kay kon wala pa sila gidasig, nangahadlok pa gihapon sila mahitungod Niini.

¹⁴¹ Pila ba ka mga Presbyterian, pila ba ka mga Methodist, pila ba ka mga Baptist, pila ba ka mga Pentecostal, sa kalibutan karong panahona, ang nasayod unta sa Kamatuoran pero nahadlok lang nga barugan Kini? Kumbinsido hinoon ako nga maghunahuna, kung unsa kaha ang mikunsad kaninyo? Kabahin gyud kaha mo sa Iyang pagkabanhaw? Mangahas ba kaha mo nga harongon ang teorya ug ideya nga iya sa tawo? O, aduna kaha mo’y tinuod nga kaisog ug tinuod nga—nga magpakalalaki, aron barugan ug tawgon ang husto nga “husto,” ug ang sayup “sayup”? Kabahin ba gayud kamo sa Iyang pagkabanhaw, o magsisimba lang kamo sa usa ka hugpong sa mga kredo? Miyembro lang ba gyud kamo sa iglesia, nga nasulat ang inyong ngalan dinha, ug patay na sa sala ug mga kalapasan?

Siya nga dili nagatoo sa bug-os nga Pulong sa Dios usa ka makasasala.

¹⁴² Ang mga Fariseo kaniadto nanagtoo man sa daghang mga butang, ingon nga Kamatuoran. Miingon sila, “Mga anak kami sa Dios.” Ug mga anak bitaw sila, hangtud nga naiwali ang Pulong. Apan sa diha nga giwali na ang Pulong ug gipanghimatud-an, nangahimo hinoon silang mga makasasala, tungod sa pagsalikway sa maong Butang nga hingsayran unta nila nga husto, ug nasaksihan mismo kadto. “Nasayod kami nga usa ikaw ka magtutudlo nga nagagikan sa Dios, kay walay tawong makabuhat sa mga butang nga Imong ginabuhat kon wala ang Dios uban Kanimo.”

¹⁴³ Naghunahuna ako, kon asa na kaha kita sa karon? Pangutan-on ko kamo. Asa kaha kita makaplagnan niining pagkabanhaw? Mangahas kaha mo nga mogawas? Mangahas kaha mo nga toohan ang Dios sa Iyang Pulong? Kung kamo’y gitagana-nang-daan ngadto sa Kinabuhi, siguradong buhaton gyud ninyo kana. Kung kamo agila, dili n’yo mapugngan nga buhaton kana, tungod adunay sa kung unsang Butang diha sa sulod n’yo. O, gusto n’yo lang ba nga mag-alagad sa usa ka kredo sa kung asa man, og moingon, “Nagasimba ako. Pareho ra

ako ka buutan nimo”? Kita n’yo? Kung wala kanimo ang katungod sa pagkapanganay, dili mo gayud makita kini, dili ka makakita niini. Apan kung anaa kanimo kining katungod sa pagkapanganay, nan dili mo gyud mapugngan nga makita kini, tungod kay kabahin man kini kanimo ug kabahin ka usab niini.

¹⁴⁴ Unsaon ko man paglimod sa inahan nga naghimugso kanako? Unsaon ko man paglimod sa amahan, nga ang mismo niyang dugo ania man kanako? Unsaon ko man paglimod kang Charles Branham ingon nga akong amahan? Dili ko mahimo kana. Andam kong barugan ang iyang kaulawan o unsa pa man, tungod kay iya akong anak. Alleluyah!

¹⁴⁵ Dayon ingon nga usa ka anak sa Dios, ug Siya mao ang Pulong sa Dios, unsaon ko man paglimod nianang Biblia nga mao ang Kamatuoran, nga si Jesus Cristo dili mao sa gihapon kagahapon, karon, ug hangtud sa kahangturan? Ug ingon nga makita ang panahon nga atong gikinabuhian, gikinahanglan gyud nato ang Pasko sa Pagkabanhaw sulod sa iglesia. Pagkabanhaw mismo! Nagkinahanglan kita og pagkabanhaw, para sa gahum sa pagtoo, mga kalalaken-an ug mga kababayen-an aron mabarugan kanang gipanghimatud-an nga Pulong sa Dios.

¹⁴⁶ Moingon, “Bueno, nagapahigayon man kami og Kabatan-onan alang kang Cristo.” Maayo man kana. “Ang among iglesia nagapahigayon man og mga panagtigum. Gusto man gud namo og *ingon* ka daghan nga mga miyembro.” Wala ko’y unsa man nga batok niana. Maayo man kana. Apan kahimtangan ra man kana. Mahimong mga balahibo ra kana sa usa ka tigulang nga himongaan. Apan kung makalumlom ka sa husto sa ingon niana nga kahimtangan, makapapusa gyud kana og agila kung usa ka gyud ka itlog sa agila. Ug kung gitagana ka nang daan sa Dios nga makita kana, dili mo mapugngan nga makita kana, mobangon gyud ka diha sa pagkabanhaw. Sa ingon-ana man nga paagi nahimugso ang Baptist, sa ingon-ana nga paagi usab nahimugso ang Methodist, sa usa ka pagkabanhaw niadto nga panahon, apan nangahimo man hinoon silang manok imbis unta nga agila.

¹⁴⁷ Sama sa akong gikasulti dili pa lang dugay, sa nagabiyahé ako gikan sa Tucson, nakita ko ang usa ka talagsaon kaayo nga butang. Nakita ko ang usa ka banog nga nagatugdon didto ibabaw sa kabli. Dugay nang giwala nianang banog ang pagkaila sa iyang kaugalingon. Usa kini ka langgam nga suod sa agila kaniadto. Dili kini makasunod sa agila; dili, sa unsa mang paagi. Walay bisan unsa man ang makasunod sa agila. Apan usa siya ka banog.

¹⁴⁸ Si Cristo mao ang Agila, ug ang iglesia mamahimo bisan na lang unta og usa ka banog. Makalupad sila nga mas hataas kay sa uban pa nga mga langgam. Apan ang maong banog nahimo na

nga huyang. Giwala na niini ang pagkaila sa iyang kaugalingon. Nagatugdon na lang siya sa mga kabli sa telepono ug nagapaabot na lang nga adunay patay nga rabbit. Nagalukso siya nga sama na lang sa usa ka buitire, imbis nga magalupad unta ingon nga usa ka banog.

¹⁴⁹ Oh, igsoon kong lalaki, igsoong babaye, kamong Pentecostal, nga ako mismong minahal nga mga kaigsoonan! Ginawala na sa iglesia ang pagkaila sa iyang kaugalingon. Paingon na kini ug nagadepende na lang sa usa ka patay na og pormal nga kredo, imbis nga magalupad unta sa Kalangitan, didto paitaas, alang sa lab-as nga manna.

¹⁵⁰ Ang banog kaniadto nagapangita sa kaugalingon niyang manna, apan sa karon nagakaon na lang siya sa kung unsay maligsan sa mga sakyanan ug kung unsay ginakaon sa mga buitire. Nagalukso siya nga sama na lang sa usa ka buitire. Mao nga mora na siya og buitire kon tan-awon.

¹⁵¹ Ginadayandayanan pud kaayo nato ang atong mga kaugalingon sa moderno nga kalibutan, ang atong mga kababayan-an nagapaputol na sa ilang buhok, ug nagasul-ob og mga purol, ang atong mga kalalaken-an usab wala na'y igong dugukan aron mobarug sa pulpito ug isulti ang kamatuoran. Dugay na kitang nahimong huyang diha sa Pulong.

¹⁵² Oh Dios, sugoa ang Espiritu Santo ug ipapangita kadtong mga agila sa kon asa man, nga andam mobarug, bisan unsa pa ma'y mahitabo, nga andam molupad ngadto sa mga dapit nga wala-masayri, dili nga motugdon lang diha sa mga kabli sa telepono ug magahulat ra sa pang-Sunday school nga literatura nga moabot. Ihatag kanako ang Pulong, diha sa pagkalab-as sa gahum ug pagpadayag sa Espiritu Santo. Nagkinahanglan kami og Pasko sa Pagkabanhaw, usa ka pagkabanhaw nga mao ang mga potensyal. Higala ko, kung kontento ka na sa dubok-nanga-karne nga iya sa kalibutan, aduna gyu'y butang nga sayup.

¹⁵³ Igsoon kong babaye, igsoon kong lalaki, isulti ko kaninyo, kini, nga may diosnong kahadlok, ingon nga nasayod nga tingali'g dili na ako mabuhi nga makakita pa og usa ka Pasko sa Pagkabanhaw pag-usab. Apan adunay usa ka butang nga sigurado, sa diha nga ang usa ka matuod nga gitagana-nangdaan nga anak sa Dios, pinaagi sa Pulong sa Dios, pagmadungog niya kanang Tingog sa Dios, motindog gyud siya ug tagboon Kini. Mao kana ang mga potensyal, nga pagatagboon niya ang tinuod nga buhing Pulong. Sama sa kung unsa Siya kaniadto, pagatagboon pud sa Pangasaw-onon ang Pamanhonon. Siya'y kabahin man sa Iyang Lawas.

¹⁵⁴ Matikdi, dugay na natong, naiwala ang pagpaila kung unsa kita. Nagasimba og Miyerkules sa gabii, ang pipila kanato. Ang uban pud nagapabalin ra sa balay aron motan-aw og *Who Loves Susie*, sa mga telebisyon, og tanan nang matang sa kalibutanong

mga butang, tanang matang sa mga paglingaw-lingaw, nga nagapahilayo kaninyo sa iglesia. Dugay na natong naiwala kini.

¹⁵⁵ Ang atong mga seminaryo, ang atong mga tulonghaan, nagapagraduwar og usa ka pundok sa mga Ricky nga puno sa teolohiya, ug—ug mga lingaw-lingaw ug tanan na sulod sa iglesia, aron pulihan ang panagtigum sa pag-ampo. Nanagsul-ob kita og bisti ug gapaningkamot nga magsunod-sunod kung unsay ginapaningkamotan nga buhaton sa mga modernista, aron kono nga makabig ang mga niini. Dili n'yo gayud sila makabig pinaagi niana. Aduna sila'y mas daghan pa niana kay kaninyo. Wala kamo'y katungod nga sa inyong lugar. . . sa ilang lugar. Sila ang paadtoon n'yo sa inyong lugar, kon diin nagadnag ang tinuod nga bautismo, kon diin anaa ang tinuod nga gahum sa pagkabanhaw. Ayaw n'yo tinguhaa nga magtukod og usa ka iglesia nga sama sa ilaha. Ayaw n'yo tinguhaa nga magkaaduna kamo og pastor nga sama niana. Ayaw n'yo tinguhaa nga buhaton ang *ingon-ini*, *ingon-ana*, og *uban pa*, o kaha makigtimbayayong sa kalibutan. Nagakidlap sila tungod sa Hollywood.

¹⁵⁶ Ang tinuod nga Ebanghelyo nagasidlak tungod sa gahum. Kana ang ginapatalinghugan sa mga agila. Wala sila nagatan-aw sa sinaw. Sa sidlak sila nagatan-aw. Nagasidlak sa pagpaubos, nagasidlak sa gugma, nagasidlak sa gahum, ingon niana ang ginapangita sa agila. Dili lang nga magkakha ka diha sa nataran ug mapahimuot mo na siya. Dili gayud siya mahimuot niana. Dili mo siya masultihan niana, tungod kay dili man gihapon siya motoo niana.

¹⁵⁷ Pasagdi kanang Tingog nga mosinggit gikan sa Langit, “Ako Mao ang namatay, ug nabuhi pag-usab.” Aduna gyu'y mahitabo. “Ako mao sa gihapon kagahapon, karon, ug hangtud sa kahangturan. Ug mahitabo sa ulahing mga adlaw, nga igabubo Ko ang Akong Kaugalingon ngadto sa tanang unod.” Himaya sa Dios! “Pagahatagan Ko og kinabuhi ang inyong mortal nga pinulongan. Pagahatagan Ko og kinabuhi ang inyong mortal nga mga sinultihan. Ihatag Ko kaninyo ang kapanghimatuoran nga dalhon Ko kamo ngadto sa pagkabanhaw uban Kanako.” Ang mga agila nga gutom ang mga kasingkasing mangkab-ot gyud niana kutob sa ilang mahimo. Kini mao ang Mutya nga labing bililhon, nga ibaligya nila ang tanang uban pang butang, aron mapalit lang Kini. Amen.

¹⁵⁸ Tabangan unta kita sa Dios, higala. Ginawala na sa atong mga iglesia ang pagkaila kung unsa sila.

Agpas natong hisgotan ang pipila pa.

¹⁵⁹ Matikdi ang lihoc niadtong mga tinun-an, nangahadlok. Nasayod sila nga si Jesus mao ang Kamatuoran, apan, nakita n'yo, sukwahi man gud Kadto sa popular nga ideya, sa popular nga relihiyon niadtong panahon, nga pinaka-estrikto

nga relihiyon, Sar- . . . sa mga Fariseo, mga Saduceo, ug uban pa, sa ilang mga kulto, mga sekta, ug mga denominasyon. Sila’y—sila’y batok sa maong “laing-tinoohan.” Apan si Jesus mao man ang gipaila nga Pulong.

¹⁶⁰ Ug si Jesus mao ang Espiritu Santo, diha sa Espiritu. “Sa diriyut lamang panahon ug unya ang kalibutan dili na makakita Kanako. Kamo makakita Kanako,” dili ang lawas; kondili ang Kinabuhi nga atua Kaniya. Anaa sa Iglesia ang Dios, aron manawag og mga anak sama sa gibuhad Niya kaniadto, nga magmasinugtanon.

¹⁶¹ “Kanunay Kong ginabuhad ang makapahimuot sa Akong Amahan. Kinsa man kaninyo ang makapasangil nga Ako nakasala?” Sa laing pagkasulti, *sala* ang “dili-pagtoo.” “Unsa man ang giingon sa Pulong mahitungod Kanako, nga wala Ko buhata?” Tan-awa. “Ipakita Kanako ang gisulti sa Pulong nga Akong pagabuhaton, nga wala Ko buhata. Kinsa man ang makaakusar Kanako? Kinsa man ang makatudlo Kanako, ug moingon nga wala Ko tumana ang Pulong sa Akong Amahan?” Oh, makaabot lang unta ang iglesiang Pentecostal sa niana nga punto! “Kinsa man ang makapasangil Kanako og dili-pagtoo?”

¹⁶² Oh, mga Cristohanon, ayaw mo pagpaila ingon nga usa ka banog, kondili ingon nga usa gayud ka agila. Mahuyang kanang banog, anaa ra kana sa ubos. Wala ka’y makita nga usa ka agila nga ginabuhad kana. Dili gayud niya buhaton kana. Nagapangita siya sa kaugalingon niyang pagkaon, gikan sa kawanangan. Giandam na siya sa Dios aron nga makita niya kana. Nagakuha siya og presko nga manna, dili og usa ka butang nga patay na.

¹⁶³ Ang mga Hebreohanon, sa diha nga milabang sila sa kamingawan kaniadto, nanagkaon sila, misulay sila’g kaon og patay na nga manna. Baho na kadto. Aduna—aduna na kadto og mga waya-way. Kabalo na mo sa buut natong ipasabot. Kontaminado na gayud kadto, og dunot na. Aduna na’y mga ulod niadto.

¹⁶⁴ Nganong mokaon man ko og usa ka pagkaon nga dugay nang patay pipila na ka tuig ang milabay? Tingali’g okey pa ang porma ug hitsura niini, apan dili na gyud kini presko. Kinahanglan natong makakuha og bag-o nga pagkaon, sa matag henerasyon. Mao man usab ang agila nga nagapangita og ingon nianang pagkaon, sa matag henerasyon, samtang anaa kita sa atong panaw. Matikdi.

¹⁶⁵ Karon maghisgot na usab kita og pipila ka mga tawo. Hisgotan nato ang pipila ka mga propeta sa Daang Tugon, og hibaloon kung unsay ilang gibuhad.

¹⁶⁶ Atong susihon una si Esteban, kung unsa si Esteban sa taliwala niadtong Konseho sa Sanhedrin. Sa dihang gidala na siya niadtong konseho didto, sa dakung panagtigum sa mga magtotoo didto, o mga magtotoo kono, gidala siya

didto ug gipanguhaan siyang kondenahon. “Aba,” miingon siya, “kamong mga tikig og liog, mga walay sirkunsisyon sa kasingkasing ug sa mga igdulongog, kanunay gayud kamong nagapakigbatok sa Espiritu Santo.” Kanang Kinabuhing Walay Katapusan. “Maingon sa gibuhay sa inyong mga ginikanan ngadto sa mga propeta kaniadto, mao man usab ang inyong ginabuhay sa karon.” Ug nanagkagut sila sa ilang mga ngipon sa pagbatok kaniya. Ayaw nilang madungog kadto. Batok man gud siya sa ilang kredo. Batok ’sab siya sa ilang denominasyon. Ug mao nga gibato nila ang maong lalaki hangtud mamatay. Ug gipataas niya ang iyang mga kamot, mihangad ngadto sa Langit, nga nagaingon, “Nakita ko ang mga langit nga naabli, ug nagatindog si Jesus sa too.” Ngano man? Aduna na man kaniya ang pagkabanhaw, ang gahum nga nagahatag og kinabuhi sa sulod niya, nga mao’y nagdala kaniya ngadto sa sabakan ni Jesus.

¹⁶⁷ Matikdi, sa gilayon karon. Matikdi n’yo si Felipe, didto sa usa ka dakung rebaybal kaniadto. Sa gipahigayon nga usa ka rebaybal kon diin walay si bisan kinsa ang mangahas sa pagbuhay, aba, bisan pa og aduna siya’y dakung pagpakigtimbayayong taliwala sa mga kaiglesiahan ug tanan na didto. Nagpahigayon siya didto og dakung rebaybal. Ug ang gahum sa Dios nga nagahatag og kinabuhi nakigsulti ngadto kaniya, miingon, “Esteban. . .” Tingali’g ingon-ini ang gisulti Niini, “Nagapahigayon ka og usa ka dakung rebaybal, apan adunay usa ka tawo nga gusto Ko nga imong estoryahon.”

¹⁶⁸ Ug masinugtanon gyud si Esteban, bisan unsa pa kadto, bisan unsa pa ka daghan ang kritisismo. “Oh, Esteban, dili ka puedeng mobiya.”

“Apan, mamahimo ko. Mao ma’y giingon sa Dios.”

¹⁶⁹ Ug miadto siya didto sa disyerto, ug didto nakaplagan niya kining eunoco. Ug unsa ma’y nahitabo? Miingon siya, “Adunay. . .Kon ikaw nagatoo sa tibuok mong kasingkasing, nga si Jesus mao ang Anak sa Dios, bautismohan ko ikaw.” Sa gibautismohan na niya siya. . .

¹⁷⁰ Matikdi. Nadasig gayud siya tungod niining gahum nga nagahatag og kinabuhi, nga biyaan ang usa ka rebaybal sa liboan ka mga tawo, aron moadto sa disyerto, para sa usa ra ka tawo. Oh, mahimong sukwahi kana sa tanang pangatarungan. Kita n’yo? “Aba, adunay napulo ka libo nga nagkinahanglan nimo *dinhi*.” Apan aduna ma’y usa nga nagkinahanglan, *didto*. Kita n’yo? Ug gipadala siya sa gahum nga nagahatag og kinabuhi ngadto sa gikatagana nga dapit sa Dios. Alleluyah!

¹⁷¹ Mga kalalaken-an ug kababayen-an, mahimo gyud kamong pabarugon Niini. Pabuhaton kamo Niini sa mga butang nga gusto sa Dios nga inyong buhaton. Dili ko igsapayan kung unsay ginaingon ni kinsa pa man mahitungod niini. Moingon

ang silingan, “Oh, kana nga tawo wala na siya sa husto niyang panghunahuna. Magsige’g ampo tibuok gabii; magsige sila’g basa og Biblia.” Dili ko igsapayan kung unsa ma’y ilang ginasulti. Ang importante kung unsay ginapabuhat sa Dios kanimo. Husto kana. “Oh, moingon man gud sila nga dili kono kita makapahigayon niining kinaraan, Pentecostal nga mga rebaybal.” Oh, oo, mamahimo nato, mismo. Mahimo n’yo kini diha mismo sa inyong kaugalingon. Ug ingon niana ka kadaghan, para sa Dios, bisan unsa pa’y hunahunaon sa tanang uban pa kanila.

¹⁷² Matikdi, human, sa iyang pagtuman. Paminaw mo og ayo karon. Human nga gituman niya ang Dios, ang Pulong sa Dios, sa dihang natuman na niya ang iyang misyon, gisakgaw siya niadtong gahum nga nagahatag og kinabuhi nga nadawat niya didto sa Pentecostes, og gihatagan og kinabuhi ang iyang lawas. Minilya ug minilya ang gilay-on, gidala siya sa Espiritu, ug nakaplagaan siya nga didto na sa ubang nasud sa kung asa man. Pagkaanindot nga gahum sa Dios nga nagahatag og kinabuhi! Ug kung kita mga pentecostal gayud, “Kadtong gahum nga nagbanhaw kang Jesus gikan sa mga patay, kung nagapuyo Kini sulod sa inyong may-kamatayon nga mga lawas.” Kita n’yo? Oo. Himatikdi.

¹⁷³ Hisgotan nato ang usa pa ka tawo nga aduna niining gahum nga nagahatag og kinabuhi. Adunay usa ka lalaki kaniadto, nga ginganlan og Enoch. Pag may motungha nga usa ka bag-ong butang, pag adunay moabot ug moingon, “Bueno, karon kinahanglan natong mobalik sa kinaraan nga paagi, o sa *ingon-ini*, *ingon-ana*, o sa *uban pa*,” naglakaw si Enoch uban sa Dios. Bisan unsa ma’y gisulti sa Dios nga pagabuhaton, walay ni usa ka Pulong nga wala gituman ni Enoch. Naglakaw siya uban sa Dios. Unsa man siya? Siya’y usa ka anak sa Dios. Usa siya ka agila nga tinawag para niadtong adlawa.

¹⁷⁴ Ug miabot ang panahon, nga napuno gayud siya niadtong gahum nga nagahatag og kinabuhi! Hinumdumi, nga nagkinabuhi siya sulod sa lima ka gatus ka tuig, o sobra pa, sa atubangan sa Dios, ug wala ni usa ka higayon nga gipakyas niya ang Pulong sa Dios. Wala ni usa ka higayon nga mibuhat siya og di-maayo. Wala ni usa ka higayon nga nagbuhat siya og unsa man nga gawas sa iyang pagpamatuod. Tanang butang nga gisulti kaniya sa Dios nga buhaton, miadto siya ug gibuhat kadto. Wala na’y pagpakiglantugi mahitungod niadtong, mipadayon lang siya ug gibuhat kadto. Bisan unsa ma’y gihunahuna ni kinsa pa man, mipadayon mismo siya ug gibuhat kadto. Ngano man? Puno man siya niadtong gahum nga nagahatag og kinabuhi. Ug sa miabot ang panahon nga mamatay na ang maong tigulang nga tawo, nagpadala lang ang Dios og hagdanan ug misaka siya Pauli. Gibuhi Niya siya ug gilalin

ang iyang may-kamatayon nga lawas diha sa pagsakgaw. Amen. Mao kana ang gahum nga nagahatag og kinabuhi.

¹⁷⁵ Matikdi usab si Elias, human nga natapos na ang iyang buluhaton sa yuta. Siya'y puno gayud niadtong gahum nga nagahatag og kinabuhi, gikondena niya kadtong pina-Jackie Kennedy nga mga alut sa iyang adlaw kaniadto. Gisultihan niya si Jezabel kung unsay iyang hunahuna mahitungod kaniya. Gisultihan 'sab niya ang mga magwawali ug mga sacerdote kaniadto kung unsa ang husto ug sayup, pero wala sila mitoo kaniya. Apan gikondena niya kadtong mga kababayen-an nga pinintalan-ang-nawong ug tanan na, sa hilabihan gayud. Ug puno kaayo siya niadtong gahum nga nagahatag og kinabuhi hangtud nga walay bisan unsa man ang makadaut kaniya. Gipakaon siya sa Dios gikan sa kalangitan, gikuha siya ug gihiklin siya. Ug siya'y puno gayud sa gahum nga nagahatag og kinabuhi, nga sa dihang miabot ang panahon nga mamatay na siya, naabli ang Jordan, ug miadto lang siya, gipadalhan og usa ka carro ug gilalin siya Pauli, nga puno gayud niadtong gahum nga nagahatag og kinabuhi. Nahimo man siyang usa ka tinuod, matuod nga anak sa Dios. Oo.

¹⁷⁶ Himatikdi, aduna siya'y usa ka manununod, ug Eliseo ang iyang ngalan. Ug doble ang kang Eliseo, sa niining gahum nga nagahatag og kinabuhi. Kita n'yo? Aduna siya'y dobleng bahin niini. Bueno, nagwali siya sulod sa halos otsenta ka tuig, o kaha siya'y mga otsenta anyos na. Nagmasakiton siya ug namatay. Pero, wala siya Mipauli nga sama kang Elias. Kita n'yo? Pareho silang girepresentar dinha sa Iglesia; ang ubang mga balaan diretsong gisakgaw, ug ang uban nanagpahulay 'usa. Apan matikdi sa diha nga gilalin na si Elias diha sa pagsakgaw; si Eliseo usab nahikatulog, diha sa Dios, nga puno sa gahum nga nagahatag og kinabuhi. Matikdi ang iyang propesiya sa wala pa siya namatay. Kita n'yo?

¹⁷⁷ Karon, ipakita ko kaninyo. Dili ko igsapayan kung patay ka na, o kon asa ka man, kanang gahum nga nagahatag og kinabuhi wala gayud nagabiya. Sa daghan nang mga katuigan human sa iyang pagkamatay, ang iyang unod nadugta na, og giut-ot na kini sa mga ulod. Apan sa dihang nagdala sila og usa ka patay na nga tawo, usa niadto ka adlaw, gibalibag kini ibabaw sa mga bukog ni Eliseo, ug hilabihan kaayo ang gahum nga nagahatag og kinabuhi nga atua didto hangtud nga ang maong tawo nabuhi pag-usab. Alleluyah! Nabanhaw siya gikan sa mga patay, tungod kay kadtong gahum nga nagahatag og kinabuhi nga atua niadtong balaan sa Dios, wala man mibiya kaniya, og nagpabilin ra mismo niadtong mga bukog.

¹⁷⁸ Oh, hinumdumi, nga kita'y unod sa Iyang unod, bukog sa Iyang mga bukog, kung kita usab Iyang Pangasaw-onon. Ang kamatayon dili gyud makababag nianang gahum nga nagahatag og kinabuhi. "Bisan pa kon ang mga ulod sa panit magaut-

ut niining lawasa, apan diha sa akong unod makita ko ang Dios.” Himaya sa Dios! Daw sa unsa ka . . .wala ako masayod sa akong ginasulti. Pagkamaanindot nga paglaum para sa usa ka tigulang na nga tawo sama nako, nga hingsayran nga makita ko na ang katapusan sa akong oras dinha sa umalabot, ingon nga singkwenta’y-sais anyos na ang panuigon.

¹⁷⁹ Sukad niadtong batan-on pa ako mibarug na ako dinhi, naningkamot nga isangyaw Kini. Apan nasayod ako nga sa kinasuloran ko, walay unsa mang butang nga maayo kanako, wala gyu’y unsa mang butang nga akong nabuhat, apan sa kinasuloran ko anaa kanang gahum nga nagahatag og kinabuhi; gibuhi ko niini usa niadto ka adlaw gikan sa mga butang nga iya sa kalibutan, ingon nga usa ka batan-ong lalaki, ngadto sa Kinabuhing Walay Katapusan. Oh, pagkadaghan nang mga butang ang nangahitabo! Nakakita ako og mga panan-awon, og gisulti-nang-daan ang mga butang. Wala gyud Niya tugoti nga mapakyas ang unsa mang butang niini. Nakapagsulti na ako og laing mga dila. Nagropesiya ako. Nabuhat ko kadtong mga butang pinaagi sa Espiritu sa Dios nga nagapuyo sa sulod nako. Gahum kana nga nagahatag og kinabuhi. Nasayod ako nga sa umalabot. . .

¹⁸⁰ Buhi ang akong Manunubos karon. Ug sa umalabot pag moanhi na Siya, mabanhaw kining mga bukog, aron mokayab ug tagboon Siya diha sa kawanangan. Mahimo n’yo akong ilubong sa dagat, sunogon man kini, bisan asa man nga gusto ninyo. Eternal gyud kanang gahum nga nagahatag og kinabuhi. Whew! Mabati ko ang Pasko sa Pagkabanhaw karon mismo. Oo, sir. Nabati ko Kini sa dugay na nga mga katuigan. Anaa Kini sa kinasuloran ko.

¹⁸¹ Anaa usab Kini sa sulod ninyo. Kung, kamo, ang gahum nga nagbanhaw kang Jesus gikan sa mga patay nagapuyo sulod sa inyong may-kamatayon nga mga lawas, gibuhi na kamo Niini gikan sa mga butang nga iya sa kalibutan, ngadto mismo sa Pulong sa Dios. Gibuhi kamo Niini gikan niini nga kinabuhi ngadto sa Kinabuhing Walay Katapusan. Kamo nga mga patay pa tungod sa sala ug mga kalapasan gibuhi na karon, aron magalingkod sa Langitnong mga dapit diha kang Cristo Jesus, nga nagakaon og Manna nga gikan sa Kahitas-an, nga nakita ang kamot sa Dios nga napadayag, og gipamatud-an ang saad alang niining adlaw.

¹⁸² “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo. Nanagpangaon sila, nanag-inom, nanagpangasawa, nanagpamana. Ug maingon sa nahitabo kaniadto sa mga adlaw ni Lot, mao man usab ang mahitabo sa mga takna nga ang Anak sa tawo igapadayag na sa yuta,” dili ang Anak sa Dios, dili na. “Anak sa tawo,” nga nagabalik ingon nga mao ang Mensahe nga iya sa propeta alang sa kaulahiang adlaw sa diha nga nagalupad

na kanang agila; dili ang leon; dili ang laking-baka niadtong kapanahonan sa pagsakripisyo. Kita n'yo?

¹⁸³ Sa matag higayon, nagatungha ang gahum pang-relihiyon aron atubangon ang hagit sa pulitikanhong gahum sa kalibutan. Sa diha nga mitungha ang leon, nga gahum pang-relihiyon, mitungha kini aron atubangon ang Romanong gahum.

¹⁸⁴ Ug sa dihang miabot na ang kapanahonan sa pagsakripisyo, mitungha ang laking-baka, tungod kay kini man mao ang Mananap nga panghalad nga iya sa Ginoo.

¹⁸⁵ Dayon miabot ang mga repormador, diha sa mga kapanahonan sa iglesia, nga dagway sa usa ka tawo. Ug aduna na'y mga repormador sukad pa ni Luther, Wesley, oh, ni Calvin, og hangtud, hangtud sa, pentecostal nga kapanahonan.

¹⁸⁶ Apan sa kaulahiing Mensahe nga mitungha, adunay nagaabot nga usa ka nagalupad nga agila. Kini mao'y panahon sa agila, ang panahon sa pagpadayag, ingon nga nahipadayag ang Pulong sa Dios, og gipamatud-an ang Pulong sa Dios. Oh, mga kaanakan, lumakaw kamo pasulod ngadto niining bautismo sa Balaang Espiritu. Sumulod kamo ug toohi Kini, sa tibuok ninyong kasingkasing, pagapun-on kamo sa Dios.

¹⁸⁷ Matikdi n'yo dinhi karon. Hingsayran nato karon, hinumdumi, "Kita'y unod sa Iyang unod, ug bukog sa Iyang bukog." Maingon nga gibanhaw sa Dios ang Iyang mga bukog ug unod gikan sa lubnganan, dili gayud nila mapugngan ang tawo nga aduna og ingon nianang potensyal. Dili makapugong kaniya ang kamatayon. Miingon si Jesus, "Ang tanan nga gikahatag Kanako sa Amahan magaari Kanako. Pagabanhawon Ko sila sa kaulahiing adlaw." Oh, grabe! Pasko sa Pagkabanhaw! Aba, ania na kita mismo sa Pasko sa Pagkabanhaw. Kaniadtong nabanhaw Siya, nabanhaw pud kita uban Kaniya. Gipadala Niya balik ang maong abstract. Ginatoohan nato kini, ingon nga bautismo sa Espiritu Santo. "Siya'y buhi sa walay katapusan; ang mao sa gihapon kagahapon, karon, ug hangtud sa kahangturan." Mga Hebreohanon 13:8 ang nagapamatuod niana. Siya'y mao gayud sa gihapon.

¹⁸⁸ Ang Iyang mesias-non, nga mga dinihogan nagatoo niana. Unsa ba ang mesias? Unsa diay ang mesias? Ang *Mesias* mao'y "Usa ka dinihogan." Ug bueno kung Siya mao ang Mesias, ingon nga Usa ka dinihogan alang niadtong adlaw, aron tumanon ang Pulong sa Dios, aron mamahimong Manunubos ug Usa ka dinihogan, ug gibanhaw sa Dios kana nga lawas; ang Iyang Pangasaw-onon usa usab ka dinihogan alang niining panahon. Gibanhaw na Kini uban Kaniya diha sa pagkabanhaw, tungod kay, "Kining duruha usa ra." Amen.

¹⁸⁹ Gusto kong—kong masulti unta kini sa paagi nga nakita ko kini. Aduna lang unta ko'y edukasyon aron sa pagbuhat niini. Kita n'yo? Ako—ako nagalaum nga unta masabtan ninyo

kini. Nagalaum ko nga, ang Dios, ang Espiritu Santo mokunsad dinha ug ipahimutang kini sulod sa inyong kasingkasing, aron masabtan n'yo ang buut kong ipasabot.

¹⁹⁰ Ang pagkabanhaw, ania na kita karon sa pagkabanhaw. Nagalingkod na kita uban Kaniya diha sa pagkabanhaw, apan sa mga kadto lamang nga aduna na'y Kinabuhi.

¹⁹¹ Dili sa kadtong mga walay Kinabuhi. Dili man sila mahibalo Niini. Dili gayud nila masayran Kini. Padayon silang maghunahuna nga nadawat na nila ang Espiritu Santo, ingon nga luwas na, ug ang Pagsakgaw nahitabo na diay ug tapos na. Miingon, "Si Elias nahianhi na, ug ingon niini ang gibuhat nila kaniya, ug wala kamo mahibalo niini." Kita n'yo?

¹⁹² Matikdi. Ang kamatayon dili makapugong sa gahum sa Dios nga nagahatag og kinabuhi. Matikdi. Ang kamatayon dili makapugong niini.

¹⁹³ Moingon ka, "Bueno, ang akong inahan usa man ka babaye nga puno-sa-Espiritu. Ang akong amahan, wala pa gyud ko nakakita og usa ka tawo nga puno kaayo og gahum maingon sa akong amahan. Apan namatay siya, Igsoong Branham." Oo. Dili man kana makapaundang sa maong gahum nga nagahatag og kinabuhi.

¹⁹⁴ Aduna usab si Moises og nianang gahum nga nagahatag og kinabuhi. Nagatoo ba kamo niana? [Nagaingon ang kongregasyon, "Amen."—Ed.] Wala gayud ni usa ka tawo nga sama kaniya sa yuta, hangtud kang Jesus. Kay dili lamang siya nakakita og mga panan-awon, kondili nakigsulti mismo siya nga nawong-og-nawong sa Dios.

¹⁹⁵ Bisan ang babayeng propeta, nga si Miriam, nga nakiglantugi sa iyang pulong usa niadto ka adlaw. Miingon ang Dios, "Wala ba kamo nahadlok sa Dios? Isipa ang Akong alagad, nga si Moises. Walay si kinsa man sa kalibutan nga sama niya, niini nga panahon. Wala gayu'y si bisan kinsa nga sama ni Moises. Nagapakigsutli Ako mismo kang Moises. Unsa ba'y gisulti niya, nga dili tinuod? Kita n'yo? Nagapakigsulti Ako kang Moises. Wala ba kamo nahadlok sa Dios? Ayaw gyud kamo pagsulti ni usa ka pulong batok kaniya." Ug niadtong tungora mismo gihampak siya og sanla ug—ug hapit mamatay. Wala siya nabuhi og dugay, pagkahuman niadto. Ngani miampo pa si Moises para kaniya.

¹⁹⁶ Ug misaka si Moises sa bukid, nga may usa na ka gatus ug baynte ka tuig nga pagministerio, o otsenta ka tuig nga pagministerio; usa ka gatus ug baynte ka tuig sa kinabuhi, misaka sa kabukiran ug namatay, ug gilubong didto sa walog. Apan kadtong gahum nga nagahatag og kinabuhi atua ra gihapon kaniya. Mga walo ka gatus ka tuig human niadto, atua siya, nagatindog sa Bukid sa Pagkabalhin. Amen. Unsa man siya? Nahiapil siya niadto nga pagkabanhaw. Oo, nahiapil siya.

Aduna siya'y gahum sa Dios nga nagahatag og kinabuhi. Atua siya, nga nagatindog didto.

¹⁹⁷ Matikdi usab si Job, si Abraham, si Isaac, ang mga balaan niadtong adlaw sa pagkabanhaw, niadtong halangdong buntag nga si Job ug silang tanan nasayod na kung unsay mahitabo. Sa dihang, miingon siya, “Nasayod ako nga ang akong Manunubos buhi,” gatusan ug gatusan ka mga katuigan sa wala pa si Cristo. Kini'y, sa tinuod lang, ang Basahon ni Job nahisulat na sa wala pa ang Genesis, nga ingon nila, mao ang pinaka-karaan nga Basahon sa Biblia.

¹⁹⁸ Ug diha sa iyang mga pagsulay, nga sama sa atong ginaagian sa karon. Ug bisan ang iyang asawa, gani, nga tawong pinaka-suod unta kaniya ibabaw sa yuta, miingon, “Nganong dili mo na lang tunglohon ang Dios ug mamatay na?”

¹⁹⁹ Miingon si Job, “Ikaw nagasulti nga sama sa usa ka babayeng buang. Ang Ginoo mihatag, ang Ginoo mikuha, bulahan ang Ngalan sa Ginoo.”

²⁰⁰ Ug dayon sa dihang mikunsad ang Espiritu sa Dios nganha kaniya, ug misugod siya sa pagpropesiya, ingon siya, “Nasayod ako nga ang akong Manunubos buhi, ug sa kaulahiang mga adlaw Siya motindog ibabaw sa yuta. Bisan pa kon ang mga ulod sa panit magaut-ut niining lawasa, apan diha sa akong unod makita ko ang Dios.” Ug naghimo pa siya og usa ka dapit nga pagalubngan sa iyang kaugalingon. Ingon siya, “Paliton namo kini nga yuta.” Gipalit niya kadto ug gipalubong ang iyang kaugalingon.

²⁰¹ Pagkahuman niadto, miabot ang usa ka tawo nga ginganlan og Abraham. Ang iglesia nga nagatubo, og padayon nga nagatubo. Si Abraham, bueno, kaniadto, aduna siya og mga potensyal sa Dios, usab, Kinabuhing walay katapusan, Eternal, tungod kay gitawag man siya sa Dios. Karon matikdi. Sa dihang namatay na siya, o namatay na si Sarah, mipalit siya og yuta didto sa Palestina, duol sa lubnganan ni Job, ug gilubong si Sarah. Namatay si Abraham ug gilubong usab uban ni Sarah. Kang Abraham natawo—natawo si Isaac.

²⁰² Ug si Isaac, sa dihang namatay siya, nahikatulog siya uban ni Abraham, sa mao gihapon nga luna sa yuta. Karon, sa dihang, natawo si Jacob kang Isaac. . .

²⁰³ Namatay si Jacob, didto sa Egipto. Apan ingon nga usa ka propeta, kaniadto, nga aduna niining potensyal, niining gahum nga nagahatag og kinabuhi, siya miingon, “Ayaw gyud ako ilubong dinhi, Joseph. Umari ka, anak kong propeta. Ipandong ang imong kamot niining bat-ang nga gipiangan sa Dios. Manumpa ka ngadto sa Dios sa Langit nga dili mo ako ilubong dinhi.” Unsa man ang anaa niadto nga tawo? Dili ba ingon man ka maayo ang Egipto sama sa uban nga dapit? Usa man gud siya ka propeta. Nasayod siya kon diin mahitabo ang pagkabanhaw.

Dili kini mahitabo sa Egipto; kondili sa Palestina. Miingon, “Ipandong ang imong mga kamot sa akong piang nga bat-ang, ug manumpa ka sa Dios nga akong ginaalagaran. Ikaw ang anak kong propeta, nga, dili mo ilubong ang akong mga bukog dinhi. Dalha ako didto ug didto ako ilubong.”

²⁰⁴ Si Joseph, ingon nga usa ka propeta, usab, gipandong niya ang iyang mga kamot ngadto sa bakul niyang amahan. Miingon, “Ginapanumpa ko sa Dios ni Abraham, ni Isaac, og ni Jacob, dili ko ikaw ilubong dinhi.” Gidala nila siya ug gilubong niadtong yutaa. Ngano man? Ngano kaha?

²⁰⁵ Kaniadtong namatay si Joseph, miingon siya, “Ayaw ko ninyo ilubong dinhi. Ayaw ako ilubong dinhi.” Ngano man? Ang Dios mao’y Dios sa bisan asa, apan aduna Siya’y plano. Usa ka propeta si Joseph. Miingon siya, “Sa umalabot nga adlaw,” paminawa, ang iyang mga pulong, “ang Ginoong Dios modu- . . . moduaw kaninyo, ug pagakuhaon kamo gikan niining yutaa. Ug sa pagbiya n’yo, dalha usab ang akong mga bukog.”

²⁰⁶ Kadtong gahum nga nagahatag og kinabuhi atua niadtong mga bukog. Oh! “Kung ang Espiritu Niya nga nagbanhaw kang Cristo gikan sa mga patay, nagapuyo sa sulod ninyo, hatagan Niya usab og kinabuhi ang inyong may-kamatayon nga mga lawas.”

²⁰⁷ “Ayaw n’yo ipahimutang ang akong mga bukog dinhi. Ilubong kini didto kauban niadtong mga adunay saad.”

²⁰⁸ Kaniadtong mianhi si Jesus, dinhi, aduna ko’y usa ka Kasulatan dinhi, Mateo 27:51. Sa diha nga nabanhaw si Jesus gikan sa mga patay, hingsayran na ni Job nga mahitabo kadto, og miingon, “Nasayod ako nga ang akong Manunubos buhi. Sa kaulahiang mga adlaw, Siya motindog ibabaw sa yuta. Bisan kon ang mga ulod sa panit giut-ut na kining lawasa, apan diha sa akong unod makita ko ang Dios. Makita ko Siya.” Nasayod gyud sila. Usa kadto siya ka propeta. Si Abraham usa ka propeta. Si Isaac usa ka propeta. Si Jacob usa ka propeta. Si Joseph usa pud ka propeta. Ug aduna sila’y kapadayagan sa Dios, sumala sa Iyang Pulong. Ug niadtong buntag sa Pasko sa Pagkabanhaw, sa diha nga miabot kadtong Usa ug gitubos ang tanan nga mitoo Kaniya, sila’y nangabanhaw, usab, sumala sa Biblia.

²⁰⁹ Mikunsad kadtong gahum nga nagahatag og kinabuhi sa lubnganan ni Job, kon diin wala na’y bisan usa na lang ka kutsara sa abog sa iyang mga bukog ang nahibilin. Human niadtong gatasan, ug gatasan, ug gatasan ka mga katuigan, ang iyang mga bukog natun-as na. Nahibalik kini—kini, ug mibalik na ngadto sa mga gas sa yuta, ug yanong abog na lang nga napahimutang didto. Apan, bisan pa niana, sa dihang ang gahum nga nagahatag og kinabuhi, sumala sa Pulong sa Dios, sa saad, bisan nga gatasan ug gatasan na, oo, linibo na ka mga katuigan human niadto, sa diha nga mitungha kadtong

gahum nga nagahatag og kinabuhi gikan sa lubnganan; si Job, si Abraham, si Isaac, si Jacob, silang tanan, nanggula gayud gikan sa lubnganan uban Kaniya.

²¹⁰ Ingon niana ang gisulti sa Biblia. San Mateo, sa ika-27 nga kapitulo ug sa ika-51 nga bersekulo, kini ang gikaingon, “Daghan sa mga balaan nga nangatulong sa abog sa yuta, ang nangabanhaw ug nanggula gikan sa mga lubnganan uban Kaniya, sa diha nga mibangon Siya niadtong buntag sa Pasko sa Pagkabanhaw.” Ngano man? Aduna man sila niana nga potensyal. Aduna pud sila nianang gahum nga nagahatag og kinabuhi, kita n’yo, ug nangabanhaw gikan sa mga patay, ug miuban Kaniya diha sa pagkabanhaw. Nakatagamtam og pagkabanhaw uban Kaniya, tungod kay puno man sila niadtong gahum nga nagahatag og kinabuhi. Aduna kanila kanang matuod nga selyo sa Pasko sa Pagkabanhaw.

“Bueno,” moingon ka, “Nabuhi unta ako kaniadto sa Daang Tugon.”

²¹¹ Kadali lang. Sa Unang Mga Taga-Tesal... Mga Taga-Tesalonica, sa ika-4 nga kapitulo, sa ika-16 nga bersekulo, gusto ko nga basahon ninyo kana. “Dili namo buut nga dili kamo mahibalo, mga igsoon, mahitungod sa mga nangatulong na, aron dili kamo managsubo, bisan ingon sa uban nga walay paglaum. Kay kung kita nagatoo man nga si Jesus namatay, ug nabanhaw sa ikatulong adlaw,” dili nga too-too lamang, kondili nagatoo gyud kita niini, “ingon man usab sila nga mga nangatulong diha Kaniya pagadad-on ra sa Dios uban Kaniya.”

²¹² Ang mga balaan sa Bag-ong Tugon nga aduna nianang gahum nga nagahatag og kinabuhi, mabanhaw man, usab, sa Iyang ikaduhang Pagbalik; sa ingon ka sigurado gayud sama sa mga balaan sa Daang Tugon nga aduna niadtong bug-os nga gahum nga nagahatag og kinabuhi diha sa ilang mga bukog, ug ang mga paglalin ug mga gahum, ug uban pa, nga nagpasundayag sa Dios. Silang mga propeta kang kinsa miabot ang Pulong sa Dios, nangabanhaw pud sila uban Kaniya niadtong buntag sa pagkabanhaw; ug pinaagi sa saad sa Dios nga ang matag usa nga anaa kang Cristo Jesus mahiuban usab Kaniya sa Iyang pagkabanhaw, ang maong gahum sa Dios nga nagahatag og kinabuhi maanaa usab sa ilang mga bukog.

²¹³ Dili ikatingala, nga nagapandong kita og mga kamot nganha sa mga may sakit. Dili ikatingala, nga ginahigugma nato ang usa’g usa. Managsoon kita nga mga lalaki ug mga babaye. Dili nato angay’ng dumtan ang usa’g usa tungod kay ginatul-id kita sa Pulong sa Dios. Kinahanglan natong higugmaon ang usa’g usa, ug magrespetohanay sa usa’g usa. Kabalo mo, kung dili kamo ingon niana, nan dili kini motabang kaninyo.

²¹⁴ Aniyay usa ka luoy’ng lalaki nga nagalingkod mismo dinhi, nga, ania niining iglesia karon. Pipila na ka adlaw ang

milabay. . . Nagatoo kana nga lalaki. Ang luoy'ng lalaki adunay kanser sa iyang dalunggan, ug wala siya'y unsa man nga gisulti mahitungod niini. Nakatrabaho siya didto sa balay. Nakauban ko na siya sa usa ka pagpangayam, didto kauban ang mag-igsoong Moseley, ug si Igsoong Dawson nga taga-dinhi. Nangayam kami didto, sa anak ni Igsoong William. Ug nahitabo nga nakatan-aw ko sa iyang dalunggan, ug nakita ko ang iyang dalunggan nga naghubag na. Ingon ko, "Unsa ma'y nahitabo, Donavon, nianang imong dalunggan?"

215 Ingon siya, "Igsoong Branham, dugay na man gud kini. Wala ako mahibalo."

216 Basta ko lang—siyang gihawiran sa kamot kaniadto. Usa kadto ka dakung kanser sa iyang dalunggan. Wala ko'y gisulti ni usa ka pulong; gihawiran ko lang siya, ug naghunahuna, "Igsoon ko!" Usa o duha ka adlaw human niadto, wala na gyu'y bisan usa ka uwat nga nahibilin niadto. Tungod kadto sa iyang pagtahud sa Dios sa Langit, nga pinaagi sa gahum sa Dios nga nagahatag og kinabuhi, gipatay kadto nga kanser ug gilugwayan pa ang kinabuhi ni Donavan Weerts dinha. Husto kana.

217 Unsa man kining mga butanga? Tan-awa dinhi, kamong mga taga-Phoenix. Tan-awa ang mga tawo nga mitoo niini. Tan-awa ang mga tawo nga aduna niini, nga ginapandong ang ilang mga kamot kaninyo. Matikdi kung unsay mahitabo. Gahum kana nga nagahatag og kinabuhi. "Kini nga mga ilhanan maganunot kanila nga mga nagatoo." Kung pandongan nila sa ilang mga kamot ang mga masakiton, kanang gahum nga nagahatag og kinabuhi, agila ngadto sa agila, aduna gayu'y mahitabo. Bueno, kon usa ka agila ngadto sa usa ka buitre, dili gyud magpulos. Agila ngadto sa agila, nga nagapaitaas gikan sa nataran, ngadto sa Kalangitan. "Kini nga mga ilhanan maganunot kanila nga nagatoo," kon pareho sila nga anaa sa pagtoo.

218 Tan-awa n'yo kanang mao ra nga gahum sa Dios nga nagahatag og kinabuhi nga girepresentar sa niining duha ka propeta, si Elias ug si Eliseo. Matikdi, parehas ra nga pulong; ang usa niini mao ang *paglalin*, ang usa pa mao ang *gilalin*. *Paglalin* ug *gilalin*. Kita n'yo? Gilalin siya. Pagalalinon pud kita; pagalalinon uban kanila, og sugaton sila diha sa kawanangan. "Pagalalinon aron sa pagsugat kanila diha sa kawanangan."

219 Matikdi, ang langgam kinahanglan adunay duha ka mga pako, aron ma-balanse ang iyang kaugalingon. Husto ba kana? [Nagaingon ang kongregasyon, "Amen."—Ed.] Si Elias mao ang pako sa paglalin, si Elias mismo. Si Eliseo mao pud ang pako sa pagkabanhaw. Kita n'yo? Silang duha, magkauban, nga ginarepresentar ang mga balaan nga buhi ug ang mga balaan nga mitaliwan na.

220 Hinumdumi, gibuhi aron makita ang luyo, sa mga tabil. Daw sa unsa nga gibuhi kini nga mga tawo kaniadto aron makita ang

luyo sa tabil ug makita hangtud niini nga panahon; sa maong mga propeta!

221 Matikdi si Pablo, nga miingon nga sa kaulahiang mga adlaw kini nga mga tawo, managpanglihok ug magatawag sa ilang mga kaugalingon nga mga Cristohanon. Usa siya ka propeta, nga puno sa gahum nga nagahatag og kinabuhi, og nakita na kini nga mahitabo. Nagatoo kita niana. Dili ba? [Nagaingon ang kongregasyon, “Amen.”—Ed.] Nadawat niya ang gahum nga nagahatag og kinabuhi.

222 Tan-awa ang gahum nga nagahatag og kinabuhi karong panahona, nagapropesiya og mga butang, nga walay ni usa ka panghitabo nga napakyas. Wala gyud ni usa ka higayon nga napakyas kini. Gahum nga nagahatag og kinabuhi; dili nga gahum sa usa ka tawo; kondili gahum sa Dios. Ang gahum, ang abstract sa Pasko sa Pagkabanhaw, ang nabanhaw nga si Jesus nga gipadala og balik ang maong abstract, aron igarantiya kanato nga gibuhi na kita uban Kaniya.

223 Matikdi. Mahinumduman n’yo ba ang hamubong libro, sa Business Men dinhi, *Pagtan-aw Sa Luyo Sa Tabil Sa Panahon?* Nagakatigulang na ako, og nasayod ko nga nagakamubo na ang akong mga adlaw. Ako gayu’y nagaka. . .

224 Gipatukar ko kanang hamubong awit nga gikanta niadtong mga babaye kaganina. Aduna ako niini sa halos dise-otso, o baynte na ka tuig karon. *I Want To Talk It Over, Lord.* Ug migawas ako didto ug nag-ampo, dayon mikunsad kanang gahum nga nagahatag og kinabuhi. Nagpahulay ako. Paghangad ko Didto. Nakaingon ko, “Tan-awa gani kanang sa unahan.”

225 Mahinumduman ko kadtong buntag, nga gilalin ako. Ug ang akong asawa, atua didto, nga nagahigda sa mao rang higdaanan tupad nako niadtong buntaga. Mibangon ko, ug mihangad. Ug atua ang akong asawa, nga tulog. Ingon ko, “Kung aduna man ko’y buhaton nga unsa mang butang alang sa Ginoo, mas maayo nga dalion mo, na. Tungod lagpas singkwenta ka na.” Dayon gilalin ako sa Balaang Espiritu, ug mitan-aw ako Didto. Nakita ko kadtong mga balaan, sa ingon ka sigurado nga nagatindog ako dinhi niini nga pulpito, uban niining sagrado’ng Basahon nga napahimutang dinhi, ug ingon nga usa ka ministro sa Ebanghelyo.

226 Aduna ba ko’y gisulti kaninyo sukad og bisan unsang butang diha sa Ngalan sa Ginoo nga wala nahitabo? Kung aduna man, gusto ko nga isulti n’yo kini kanako. Sa matag higayon, ingon ba ka hingpit kini, diha sa entablado? Sa matag higayon, nahitabo ba kini nga sama gayud sa Iyang gisulti? [Nagaingon ang kongregasyon, “Amen.”—Ed.] Kini ang MAO KINI ANG GINAINGON SA GINOO.

227 Nagtindog ako didto, og nagtan-aw ra niadtong higayona. Nakita ko ang napulo ka linibo ka pilo nga nanagduol, batan-

ong mga kalalaken-an ug mga kababayen-an, nanagdagan, migakus sila kanako, og misinggit. Milingi ako ug nakita ang akong kaugalingon nga nagahigda sa higdaanan. “Oh Ginoo, tugoti akong makita ang luyo sa tabil sa panahon.”

228 Unsa man kini? Gahum kini nga nagahatag og kinabuhi nga magpasakgaw kanato. Kanang dakung gahum nga nagahatag og kinabuhi. Nagakunsad ang maong gahum nga nagahatag og kinabuhi sa niining kaulahiing mga adlaw.

229 Mao kana’y hinungdan kon nganong ania ako sa Arizona, mismo karon. Daghang mga tawo nga nagalingkod dinhi, nagatindog dinhi mismo sa Phoenix, ug nakadungog kanako nga ginasulti kaninyo dinhi mismo niini nga entablado, “MAO KINI ANG GINAINGON SA GINOO.” Pila man ang nakahinumdom niini? “Karon umadto ka. Adunay butang nga andam nang mahitabo.”

230 Nakita ko ang pito ka Manulonda nga nagaabot. Dili ba gimantala kini sa *Life* magazine, sa diha nga milutaw ang panganod Niini mismo didto, baynte-siete ka milya ang kahabogon, ug traynta ka milya ang kalapdon? Dili ba si Fred Sothmann, kadtong uban pa, si Gene Norman, og sila, atua man didto? Nagtindog sila mismo didto sa diha nga mitungha kadtong pito ka Manulonda didto sa bungtod. Giuyog Niadto ang mga bungtod, og minilya, sama niana. Atua didto ang pito ka Manulonda. Ug nagbutang og espada sa akong kamot, miingon, “Pauli na ug ablihi kining gihatag nga Pito ka Selyo.” Ug ania kini, ang tinuod nga misteryo mahitungod sa kaminyoon ug panagbulag, ug ang binhi sa serpente, ug tanan niining mga butang nga dugay nang gikalibogan. Kini ang MAO KINI ANG GINAINGON SA GINOO.

231 Unsa man kini? Ang gahum nga nagahatag og kinabuhi nga nagaabot sa Iglesia, nga ginapaandam Siya, alang niining takna nga atong ginapaabot. Gahum nga nagahatag og kinabuhi!

Oh Dios, tabangi kami nga madawat Kini. Tabangi kami nga toohan Kini.

232 Kita n’yo, nagadepende ra kini kung unsa ang inyong taras ngadto Niini, kon Kini magahatag ba kaninyo og unsa man nga kaayohan, o dili, bisan pa man. Kita n’yo? Kinahanglan n’yong toohan Kini. Kung dili ninyo Kini toohan, nan dili gyud Kini makahatag og unsa man nga kaayohan kaninyo.

233 Daw sa unsa nga mitindog didto ang tigulang nga si Samuel sa atubangan niadtong mga tawo kaniadto, ug miingon, “Aduna ba ko’y gisulti kaninyo sukad og bisan unsang butang diha sa Ngalan sa Ginoo nga wala mahitabo? Nanglimos ba ako kaninyo og salapi, aron mabuhi?”

“Wala, apan gusto namo og hari, bisan pa man.”

234 Ingon niana usab ang iglesia karong panahona. Gusto nila ang kaugalingon nilang mga ideya. Dili sila mohatag bisan og diyutay'ng pagtagad kanimo. Manghawa sila dayon. Bueno, nagapakita lang kana nga, wala gyud dinha ang gahum nga nagahatag og kinabuhi.

235 “Oh,” moingon ka, “Bueno, nagasulti man ko og laing mga dila. Milukso ako ug misinggit ako.” Maayo man kana.

236 Apan kung anaa dinha ang gahum nga nagahatag og kinabuhi, nan maila mo gayud kana. Sama niadtong gamay'ng agila; nga naila nga mao kadto ang iyang mama. Mao kana ang Pulong. Kana'y MAO KINI ANG GINAINGON SA GINOO. Mao kana ang gikasaad sa Dios. Mao kana ang gisulti-nang-daan. Eksaktong ingon niana ang nahitabo. Wala kita'y unsa man nga landong sa pagduhaduha, nga kita sa potensyal anaa na sa pagkabanhaw karon, nga ang mga balaan nagapangandam nang pagalalinon diha sa kawanangan.

237 Busa, si Jesus, nga puno kaayo niining gahum nga nagahatag og kinabuhi, miingon, “Kung mahimo n'yong gubaon kining templo; nga gigahinan ninyo og kuwarenta ka tuig, sa pagtukod, sa hunahuna n'yo; Akong patindogon kini sa ikatulo ka adlaw.”

238 Ngano man? Nganong masulti man ni Jesus ang ingon-ana? Gusto kong mangutana kaninyo. Nganong masulti man ni Jesus ang ingon-anang butang? Nasayod man gud Siya kung unsa Siya. Amen. Unta ako gyud kining maipatuhop. Nasayod Siya kung Kinsa Siya. Nasayod Siya nga, ang matag Pulong, nga gisulat sa Dios dinha mahitungod Kaniya, natuman Niya kana. Nasayod pud Siya nga Siya Mao ang gihisgotan kaniadto ni David.

239 Nahibalo ba mo nga kamo usab mao ang ginahisgotan diha sa Biblia? [Nagaingon ang kongregasyon, “Amen.”—Ed.] Nahibalo ba mo nga ang inyong posisyon anaa diha kang Cristo? Kung anaa kamo kang Cristo, usa na kamo ka bag-ong linalang. Nahibalo ba mo nga kining Pulong sama lang sa matag adlaw nga kinabuhi, para kaninyo? Aba, oo. Inyoha Kini. Usa ka ka agila. Mao kana ang imong Pagkaon.

240 Nasayod gyud Siya nga, pinaagi sa gahum sa Dios, buhaton Niya kana, tungod kay gipropesiya na man nga Iyang buhaton kana. Mao kana'y hinungdan nga wala Siya nahadlok nga moingon, “Gub-a kining templo. Akong patindogon kini sa ikatulong adlaw, tungod kay ang ingon ni David, ‘Dili Ko pagabiyaan ang Iyang kalag didto sa sheol, ni motugot Ako nga ang Akong Balaan makakita og pagkadunot.’” Nasayod Siya nga wala ni usa ka selula sa Iyang lawas ang madunot. Nagakadunot ang lawas sa tawo sulod ra sa setenta'y-dos oras. Ingon Siya, “Gub-a kining templo. Akong patindogon kini pag-usab, sa tulo ra ka adlaw.” Ngano man? Siya'y puno gayud niadtong gahum nga nagahatag og kinabuhi nga nagpahimong buhi sa

matag Pulong. Milingi Siya ug nakita ang matag Pulong sa Dios nga nasulat mahitungod Kaniya, ug miingon ang propeta nga tumanon Niya kana. Nasayod Siya nga mamatuman kana, usab.

²⁴¹ Bueno, sa matag Pulong nga gisulti sa Dios, ang inyong espiritu misulti ba og “amen” ngadto Niini, natuman ba Kini sa inyong kinabuhi, ingon nga usa ka magtotoo?

²⁴² Aduna ba’y nagapugong kanimo, moingon, “Bueno, lahi man gud ang ginatudlo sa akong iglesia”? Kung ingon-ana magbantay gyud, banog.

²⁴³ Matikdi. Nagatoo gayud ang mga agila. Walay pagduhaduha, nganha kanila. Nagatoo sila Niini. Matikdi.

²⁴⁴ Bueno, nasayod na Siya nga mahitabo ang ingon niini tungod kay misulti man ang Pulong nga mahitabo Kini. Ug ang matag Pulong nga nasulat mahitungod Kaniya kinahanglan mamatuman gyud. Nasayod Siya nga nasulat Kini pinaagi sa gahum sa Dios, pinaagi sa mga balaang propeta nga nanagpropesiya nga buhaton Niya ang ingon niana.

²⁴⁵ Ug ang propesiya wala gayud nagakapakyas. Dili kini mahimong mapakyas. Dili mahimong mapakyas ang Pulong sa Dios. Ug nahisulat kini diha sa . . . pinaagi sa Espiritu nga . . . Ug karon, usab, ang Espiritu nga nagbanhaw kang Jesus gikan sa mga patay, kung nagapuyo Kini sulod sa inyong pagkatawo, sa inyong lawas, magahatag usab Kini og kinabuhi sa inyong mortal nga lawas. Busa, pusilon man kini, sunogon man kini, buhaton ang bisan unsang butang nga gustohon n’yo, biaybiayan man kini, sawayon kini, isalikway kini, og buhaton kung unsa ma’y gusto n’yong buhaton. Pagabanhawon kini sa Dios, kay misulti man Siya nga Iyang banhawon. Ug ang matag balaan sa Dios nga aduna nianang saad diha kaniya, nasayod gyud nga Kamatuoran kana. Busa, ayaw’g kahadlok, igsoon, tungod anaa na kita sa Pasko sa Pagkabanhaw.

²⁴⁶ Matikdi karon ang pagkabalhin, sa dili pa kita matapos. Pagbalhin, pagkabalhin, girepresentar kitang tanan didto sa pagkabalhin. Tan-awa kung unsa ang atong makita sa karon. Matikdi kung unsa gayud ang atong makita sa karon, ang gahum sa Dios nga nagahatag og kinabuhi. Atua kitang tanan didto. Atua ang namatay na nga mga balaan, nga girepresentar ni Moises; atua ang pagkabanhaw; ug si Jesus Cristo nga nahimaya. Si Eliseo . . . si Moises, si Elias, ug si Jesus, ang tanan nanagtindog didto sa bukid; ang namatay na nga mga balaan, ang gisakgaw nga mga balaan; ug si Jesus nga gihimaya. Oh, grabe!

²⁴⁷ Bueno, moingon mo . . . nadungog ko ang usa ka tawo nga miingon. Moingon sila, “Kamong mga tawo, aba, kung aduna man kamo og ingon niana nga matang sa gahum, kinahanglan manggawas kamo ug sultihan ang mga tawo kung unsay mahimo ninyo.” Ipahilayo lang unta sa usa ka tinuod nga Cristohanon,

nga mosulti og ingon nianang butang. Kita n'yo? Sa tinuod lang, wala kita nagaangkon og unsa mang gahum. Aron . . .

²⁴⁸ Apan nagabuhat kita og usa ka butang. Pagtan-aw nila kaniadto, nga aduna kanila kining bug-os nga gahum, “Si Jesus lang ang nakita nila.” Ug dili igsapayan sa matuod, tinuod nga magtotoo kon siya ba’y nagasuporta sa usa ka denominasyon, o walay unsa man nga kahilambigitan niana. Usa lang ka butang ang gusto niya, para kaninyo nga makita kanang nahimaya nga Cristo, kana ang importante kaniya. Ang usa ka tinuod, matuod nga Bukid sa Pagkabalhin nga kasinatian lamang ang nagapahimaya kang Jesus Cristo. Dili si Moises ang nahimaya niini, dili si Elias ang nahimaya, dili ang ilang mga kaugalingon ang nahimaya, walay si bisan kinsa man ang nahimaya, kondili si Cristo ang nakita nilang nahimaya. Ug ang si kinsa mang tinuod nga magtotoo, mao kana ang anaa sulod sa iyang kasingkasing, ang himayaon si Jesus Cristo. Mao kana ang ginatinguha sa magtotoo nga makita unta sa mga tawo.

²⁴⁹ Dili moingon nga, “Bueno, kung moadto ka ug magpamiembro sa among grupo, kung moadto ka ug buhaton ang *ingon-ini* o buhaton ang *ingon-ana*.” Oh, ayaw n’yo buhata ang ingon-ana. Ayaw n’yo buhata kana.

²⁵⁰ Kita n’yo ang Pulong sa Dios, mao si Cristo, nga nahimaya; ug ginatuman ang saad sa niining pahahon, sa niining halangdong takna sa pagkabanhaw. Matikdi. Ug nagahatag kini kanila og kalipay, ang mahibaloan nga kauban Niya kita, ingon nga unod sa Iyang unod, ug bukog sa Iyang mga bukog. Grabe nga kalipay! Mao lang kana ang bugtong butang nga adunay kahingawa ang usa ka tinuod nga magtotoo.

²⁵¹ Wala sila’y pagtagad sa denominasyon. Wala sila’y pagtagad sa organisasyon. Wala sila’y pagtagad sa kung unsa ma’y ginahunahuna sa ubang mga kababayan-an. Wala nila kana ginatan-aw. Wala gayud. Dili nila pagabuhaton kining mga butang nga . . . ginabuhat sa niining ubang mga kababayan-an. Sila . . . Kini nga mga kalalaken-an dili pud magabuhat nianang mga butanga. Dili sila magpakighugoy-hugoy ug bebi-bebihon ang unsa man nga organisasyon, aron lang dili mapalagpot, ug tungod sa kahadlok nga basin wala na sila’y panginabuhian. Wala sila’y pagtagad nianang mga butanga. Mga walay pulos kana nga mga butang para kanila.

²⁵² Aduna lamang sila og usa ka tinguha sa kasingkasing, kana mao, ang makita si Jesus nga nahimaya. Ang ilang linihokan kinahanglan sumala sa Dios. Kini kinahanglan bug-os gyud, nga wala na’y unsa pa man, kondili alang gayud sa kahimayaan ni Jesus Cristo. Ug unsa man si Jesus? Ang Pulong. Husto ba kana? [Nagaingon ang kongregasyon, “Amen.”—Ed.] Karon, matikdi, ug ingon nga nakita ang Iyang mao sa gihapong gipanghimatud-an nga pamaagi, nga ginapamatud-an ang Iyang pagkabanhaw.

Bueno unsa man kana? Ang makita ang inyong kinabuhi, pinaagi sa Iyang gisaad nga Pulong nga Iyang gisulti, “Siya mao sa gihapon kagahapon, karon, ug hangtud sa kahangturan,” nagapamatuod nga Siya’y buhi sa gihapon.

²⁵³ Dili ko igsapayan kung ang tanang pultahan sa nasud gisirhan na para kanako. Nga, ako’y... Sa gikaingon ko na, singkwenta’y-sais na ako, niadtong miaging adlaw. Mahimo na akong mamatay. Anaa na ako sa pangidaron nga mahimo nang atakihon sa kasingkasing. Anaa na ako sa tanan niining uban pa nga anaa niining pangidaron, ug tanang uban pa. Bueno, unsa ma’y kalahian niana? Wala kana nagahatag og kalahian para kanako bisan kaniadtong batan-on pa ako. Wala pud kana nagahatag og kalahian sa karon, kung unsang taknaa na pagatawgon ang akong turno, ug pagakuhaon ang akong kard gikan sa butanganan. Dili ko igsapayan kung nasayod man sila nga nagpuyo diay ko sa yuta. Wala kana’y sapayan para kanako. Dili nila kinahanglan nga magpatindog og dagkung mga estatwa ug dagkung mga bilding aron lang masulti nga nabuhi diay ko sa yuta.

²⁵⁴ Usa lang gyud ka butang ang gusto kong masayran nila, ang masayran nga, “Si Jesus Cristo mao sa gihapon kagahapon, karon, ug hangtud sa kahangturan.” Ug sa akong kasingkasing gikuptan ko na ang Iyang abstract. Ug nasayod ako nga sa umaabot nga adlaw... Bisan pa, tingali’g malumos man ako sa dagat. Mapatay man ako didto sa Africa. Wala ako masayod kung unsa ma’y mahitabo kanako. Apan usa ra ka butang ang hingsayran ko, gikuptan ko na ang abstract. Alleluyah! Pagasirhan man ang tanang pultahan. Wala kana’y bisan gamay’ng kalahian para kanako. Wala ako gapaninguha nga himayaon ang si kinsa man nga tawo o unsa man nga organisasyon, ni ang kaugalingon ko, o ni usa man sa mga pundok, o unsa pa man. Gusto ko nga makita sa mga tawo nga si Jesus Cristo nabanhaw gikan sa mga patay, ug buhi ang Iyang Espiritu. “Siya mao sa gihapon kagahapon, karon, ug hangtud sa kahangturan.”

²⁵⁵ Dili ikatingala, nga miingon si Jesus, “Ayaw’g kahadlok. Ako Mao ang namatay, apan buhi Ako hangtud sa kahangturan.”

²⁵⁶ “Kay karon gitubos na Niya kita, ug nabanhaw uban Kaniya, ug karon nagalingkod na (dili nga magalingkod pa lang) sa Langitnong mga dapit diha Kaniya.” Bueno, pag aduna kita niining Espiritu sa sulod nato, ang abstract, nagapakita nga ang tanang mga pagduhaduha giwagtang na. Unsa? Si Cristo ang nagakinabuhi. Dili na *ako* ang nagakinabuhi; dili *ako*. “Si Cristo na nga nagapuyo sa sulod ko.” Dili nga *ikaw* ang nagakinabuhi, kondili si Cristo na nga nagapuyo sa sulod mo; tungod kay ang Iyang buhi nga Pulong nagapuyo man kanimo, nagapakita nga ang tanang mga pagsaysay sa tanan mong pang-Methodist, ug

pang-Baptist, ug Pentecostal nga mga ideya, ang tanang uban pa, imbalido na. Ug si Jesus Cristo . . .

²⁵⁷ Sama kaniadto sa Bukid sa Pagkabalhin, ang tanang mga propeta ug tanang uban pa tapos na. Ang tanang mga adlaw sa Lutheran, sa Methodist, sa Presbyterian, maayo man kana, apan, “Kini mao ang Akong Anak nga pinalangga. Patalinghugi ninyo Siya,” ang Pulong sa niining panahon, ang panahon sa mga Selyo. Sa diha nga, ang tanang mga mysteryo kaniadto, nga dugay nang gililong sulod sa niining daghang mga katuigan, ug kana mao’y . . .Kadtong halangdong panahon sa piramide gitabas na, ang pangulong-bato, gitapyas na kini aron nga ang Bitoon ni David mapahaum na sa puwesto Niini. Ug ang halangdong Iglesia sa buhi nga Dios pagabayawon na sama sa mga pako sa usa ka agila, magalupad paitaas ngadto sa Himaya. Oo.

²⁵⁸ Sa karon, karon sulod, sa atong mga lawas: ang pagsulti’g mga bag-ong sinultihan; pagpropesiya, ug pagkakita-nang-daan; pagpandong og mga kamot nganha sa mga may sakit, nga mangaayo sila; ang kalibutan, patay na, ug ang tanang mga butang nga iya sa kalibutan. Miagi na kita gikan sa kamatayon ngadto sa Kinabuhi, ug ginakuptan na nato ang maong gahum. Alleluyah!

Sa nianang buntag sa pagkabanhaw,
Sa diha nga ang mga selyo sa kamatayon
pagabadbaron na,
Mangabanhaw kita, (Alleluyah!)
mangabanhaw kita. (Amen!)

²⁵⁹ Wala gayu’y igong mga yawa sa impiyerno ang makababag kanato sa pagkabanhaw. Kita’y gitagana-nang-daan sa Dios alang niining panahona. Ang Pulong sa Dios nahipadayag Mismo pinaagi kanato. Ug nagakinabuhi kita diha sa Presensiya sa Dios, pinaagi sa saad nga Pulong sa Dios. Walay ni usa ka yawa sa impiyerno ang makababag kanako sa pagkabanhaw. Walay ni usa ka pultahan ang mahimo niyang sirhan sa akong atubangan, nianang buntaga. Gibadbad na ang mga selyo. Alleluyah!

²⁶⁰ Gawasnon ako. Usa ako ka agila. Wala na ako sulod sa hawla, kondili gawasnon na ako. Nabanhaw na ako gikan sa mga patay, ngadto sa bag-ong Kinabuhi nga iya ni Jesus Cristo. Dili lang ako, kondili ang matag lalaki, mga kababayen-an, lalaki o babaye nga nagalingkod dinhi, nga napuno sa Espiritu sa Dios, nga usa na ka bag-ong linalang diha kang Cristo. Ug kamo’y mga agila.

²⁶¹ Kita’y buhi, karon, ug ginatagamtam ang pagkabanhaw hangtud sa kahangturan. Tungod kay buhi Siya, kita’y buhi, usab. Ug nagapuyo Siya kanato, og gipangbuhi kita. Ug ang Espiritu nga nagbanhaw Kaniya gikan sa mga patay, nga

nagapuyo sa sulod nato, magahatag og kinabuhi sa atong may-kamatayon nga mga lawas, sa nianang mahimayaong Eternal nga Pasko sa Pagkabanhaw. Himaya sa Dios!

²⁶² Oh, angkona ang kalibutan, angkona ang bisan unsang butang nga gusto ninyo, apan ihatag kanako si Jesus. Amen. Gihigugma ko Siya. Siya ang tanan-tanan, alang kanako.

²⁶³ Ug tungod nga kabahin man mo Kaniya, kabahin usab ko ninyo, ug kabahin mo kanako. Ug, kitang tanan, kabahin kita Kaniya.

²⁶⁴ Oh, Cristohanon, pagkamaanindot nga kahigayonan nga aduna kita! Aduna kanato ang mga kahigayonan nga wala gayud ni San Pablo mabatonan bisan man lang sa damgo. Aduna kanato ang mga kahigayonan nga wala gayud kaniadto kang Enoch, ug kang Elias, ug nilang tanan kaniadto, kining mga kahigayonan nga anaa kanato karon.

²⁶⁵ Ug aduna pa’y usa ka gamay’ng karnero sa kung asa man, ug dili Siya malipay hangtud nga makasulod kanang usa ka karnero sa panon. Pinaagi sa tabang sa Dios, ug pinaagi sa usa ka pananawon, ug sa MAO KINI ANG GINAINGON SA GINOO, mobalik ako sa ubang nasud. Kanang kaulahiing karnero tingali’g usa kana ka itum nga karnero didto, sa akong nahibaloan, diin wala man lang nila mahunahuna nga aduna diay sila og kalag. Apan nasayod gyud ang Dios. Magapangita ako hangtud sa kaulahiing adlaw sa akong kinabuhi, aron makaplagan kanang usa, kung asa man kana.

²⁶⁶ Nagalaum ako nga wala unta ako nakapasakit sa kang kinsa man sa akong mga kaigsoonan tungod sa pagsulti niining mabagison nga mga butang. Ako. . . Dili ingon nga dili ko gusto nga mosimba kamo. Oo, gusto ko nga mosimba kamo. Simba kamo sa kon asa man mo nagatambong. Apan ayaw ninyo himoa kana nga inyong paglaum, moingon, “Bueno, miyembro man ko *niini*, o miyembro man ko *niana*.” Oh, igsoong lalaki, igsoong babaye, pagpasakop kamo kang Cristo. Pagsimba mo, apan pagpasakop mo kang Cristo. Amen.

²⁶⁷ Tugoti kanang—tugoti kanang potensyal, nga maghatag og Kinabuhi kaninyo karon mismo, kung wala pa kana kaninyo. Mahimo n’yo ba nga dawaton Kini karon?

²⁶⁸ Kini nga lawak puno mismo Niini. Mabati ko Kini sa tibuok kong lawas. Nasayod ko nga ania Kini karon, ang gahum sa Dios, ang gamhanang Magtatan-aw sa mga panan-awon, ang gamhanang Manalagna nga mahimong isulti ang mga butang ug dili gayud nagakapakyas, ang Maong gamhanan nga magasulti ug walay si binsa kinsa man nga makasulti og “dili,” ang maong Lalaki nga nagaabli ug walay si bisan kinsa nga makasira. Ang Maong namatay kaniadto nga buhi na sa karon, ug buhi, karong adlaw, dinhi sa Phoenix, nga nagalakaw taliwala sa bag-ong-nahimugso nga mga bulak.

269 Dili ikatingala, nga niadtong buntag sa Pasko sa Pagkabanhaw ang gagmay'ng mga tulo sa yamog midagayday sa aping sa matag lirio ug matag rosa. Ngano man? Nasayod kini nga mitubo kini sa yuta, ug sa kung asa man aduna gyu'y usa ka Eternal nga bulak nga nagalimbukad. Mahitabo kana sa umaabot nga adlaw. Husto kana.

270 Dili ikatingala, nga ang mga luha sa kalipay magadagayday usab sa atong mga aping. Dili ikatingala, nga ang atong mga kasingkasing molukso-lukso ug mangurog pag mabati nato ang mao mismong gahum nga makapabag-o nga nagakunsad sa atong mga kinabuhi ug ginapuno kita, bisan na lang sa pagpasulti kanato og pinulongan nga nagagikan sa Langit.

271 Gibuhi gayud kita ngadto sa Iyang Presensiya, nagapropesiya, makita nang daan ang umalabot, nanagpanagna, ug ang tanan nga bug-os gayud nagakatukma sa Pulong. Kung ang propesiya sukwahi Niana, nan ayaw n'yo toohi kana. Apan kung tukma kana sa Pulong, misulti na Kana og, MAO KINI ANG GINAINGON SA GINOO.

272 "Ayaw kahadlok. Ako Mao ang namatay ug buhi hangtud sa kahangturan." Mao kana ang selyo sa Dios sa Pasko sa Pagkabanhaw nga nagaselyo sa matag letra niining Pulong nganha sa inyong kasingkasing. Unsa ba ang selyo? "Kamo ang mga sinulat nga sulat, nga ginabasa sa tanang mga tawo." Nasayod kamo niana. Apan sa diha nga gipanag-iyu ka na sa Dios, nan giselyohan ka na Niya sa selyo sa Pasko sa Pagkabanhaw, ingon nga nabanhaw ka na uban ni Cristo, ug usa ka na ka bag-ing linalang.

273 Kung wala pa kamo naselyohan niining buntaga, nan buhata na ninyo samtang ginaduko nato ang atong mga ulo.

274 [Usa ka igsoong lalaki ang nagasugod sa pagsulti og laing mga dila. Blangko nga bahin sa teyp—Ed.] . . . Ginoo. Nadungog n'yo ba kana? [Nagaingon ang kongregasyon, "Amen."]

275 Palandunga karon, samtang nakaduko ang inyong mga ulo. Mga Taga-Roma 8:11, "Kung matuod nga nagapuyo sa sulod ninyo ang Espiritu nga nagbanhaw kang Cristo gikan sa mga patay, magahatag usab Kini og kinabuhi sa inyong may-kamatayon nga mga lawas."

276 Unsa ma'y mahimo natong lauman, mga higala? Unsa na ma'y nahibilin? Matikdi n'yo ang Formosa ug ang tibuk kalibutan. Ug mga misel atomika ug tanang uban pa nga andam nang mohampak sa kalibutan, ug grabe na ang mga pagkanerbyos, ug nangahadlok na, ug nanagsinggit. Ug kining padayon nga pagsundog-sundog sa mga pelikula, dinha, nga nagaestorya og tanan nang matang sa mga pagpakatawa, sama na lang sa usa ka batang lalaki nga nagaagi sa lubnganan, nga nagataghoy-taghey nianang gabii, naningkamot

nga patoohon ang mga tawo nga okey lang ang tanan. Ayaw kamo pagpalimbong. Haduol na ang Pag-abot sa Ginoo.

²⁷⁷ Namatikdan ninyo, niadtong miaging adlaw, usa ka mangingisda ang miduol ug nakig-estorya kanako, nga nagalingkod ako didto sa may luuk, nga, medyo batohon nga bahin o ingon niana didtong dapita. Ug kung unsa kono, nga, sa kaniadtong wala pa mitay-og ang linog didto sa Greece, ang tanang mga isda nga kasagaran nagakaon unta niadtong mga orasa sa buntag, wala na kono sila nangaon. Unsa man kadto? Wala sila mipaibabaw. Sa ikaduhang higayon nga nahitabo kadto, mao gihapon ang nahitabo. Hingsayran na niya niadtong tungora mismo nga aduna gyu'y mahitabo. Wala na man nangaon ang mga isda niadtong orasa.

²⁷⁸ Ug ang tanang mga kanaway usab ug uban pa nga nagakaon og isda, wala na pud sila nangaon. Sa sayo sa buntag, ingon niadtong orasa unta sila kasagaran nagakaon. Nanagtugdon ra sila didto sa tapi, nagpahilayo sa mga pangpang ug mga ingon niana. Tungod, pagkataudtaud, ang mga lumot sa dagat hinay-hinay nga mipaibabaw gikan sa yuta, gikan sa ilalum sa dagat. Kita n'yo? Nasayod na mismo ang mga isda sa wala pa kadto mahitabo.

²⁷⁹ Sa pag-adto ko sa India, nagbasa ko sa mantalaan, ang ingon, "Siguradong human na ang linog." Kay pipila na kono ka adlaw, nga wala namalik ang gagmay'ng mga langgam ngadto sa ilang mga salag diha sa dagkung mga bato. Ang mga baka wala na pud nag-alirong sa mga silonganan ilalum sa. . . nga makapasilong unta, sila sa kainiton sa adlaw. Ang mga karnero nagpabilin ra didto sa tunga-tunga sa umahan, nga nagsindaganay sa usa'g usa. Wala na sila nagpaduol niadtong dagkung mga bato, duha o tulo ka adlaw sa wala pa mahitabo ang linog.

²⁸⁰ Ngano kaha? Ang mga karnero nasayod na man niadto. Nasayod sila nga aduna gayu'y mahitabo. Kadtong mga langgam nasayod na nga adunay mahitabo. Kadtong mga kanaway nasayod na nga adunay mahitabo. Kadtong mga isda nasayod na usab nga aduna gyu'y mahitabo. Ang mao sa gihapon kadto nga Dios nga nanguna niadtong mga hayop pasulod sa arka kaniadto.

²⁸¹ Dili ba ninyo makita, mga tawong puno-sa-Espiritu, nga aduna gyu'y butang nga andam nang mahitabo? Ayaw mo pagpaabot sa kung unsang bantugang pang-tibuok kalibutan nga *butang* nga nagakaylap; wala na'y lain gawas sa Pag-abot ni Ginoong Jesus. Timan-i, og hinumdumi lang ang mga Pulong ug saad sa Ginoo.

²⁸² Mahimo n'yo bang moduol sa gilayon? Pahilayo na mo nianang dagkung mga paril. Ang pagkabanhaw haduol na gyud. Kung aduna ma'y ania dinhi nga wala nasayod kon mahiuban ba

silang nianang pagkabanhaw, ug dili sigurado nga aduna diay sila nianang gahum sa pagkabanhaw nga anaa na kanila!

²⁸³ Bisan pa kon ang mga ulod sa panit magalaglag niini, bisan pa kon may usa ka bomba atomika ang mobuto mismo sa taliwala nimo, dili gyud kana makapatay nianang gahum nga nagahatag og kinabuhi, gahum sa pagkabanhaw. Dili, gayud. Igsoong babaye, igsoong lalaki, ang bililhon mong ngalan nahisulat na didto sa Basahon sa Kinabuhi sa Cordero. Walay tawo ang makapapas niana. Wala gyu'y igong mga elemento nga pangpapas, sa kalibutan, ang makapanas sa imong ngalan gikan Nianang Basahon nga gipalit na sa Iyang Dugo.

²⁸⁴ Kung dili ka man sigurado niana, ayaw—ayaw na pagpamasin niana karon. Kita n'yo? Tingali'g makapamasin ka nga lutsan ang usa ka barikada sa kon asa man ug dili mapatay, apan dili mo gyud malutsan kini nga barikada. Dili, dili. Tungod mabarikadahan gyud ka. Apan dili mo kinahanglan nga buhaton kana. Aduna ma'y pula nga suga nga nagakidlap karon. Ihiklin, ihiklin na ang kaugalingon n'yong mga ideya, ihiklin n'yo na ang mga butang sa kalibutan.

²⁸⁵ Dumuol kamo. Dungan kitang magpabanhaw sa niining halangdon nga panahon sa Pasko sa Pagkabanhaw, ang halangdon nga pagsaulog sa Pasko sa Pagkabanhaw. Mahimo n'yo bang saulogon kini diha sa inyong kasingkasing niining semanaha? Kung dili man, mahimo n'yo bang ipataas ang inyong kamot ngadto sa Dios?

²⁸⁶ Moingon, “Dios, dili pa ako sigurado niana. Wala ako mahibalo kon bug-os ko ba nga mahimo kana o dili. Mahimo Mo bang tabangan ako? Ipataas ko ang akong kamot nganha Kanimo, Ginoo. Tabangi ako.” Panalanginan ka sa Dios. Panalanginan ka sa Dios. Maayo kana. “Akong—akong—ginatinguha ko Ikaw, Ginoo. Tabangi ako. Ako—gusto ko—gusto ko nga mabanhaw. Ako—gusto ko gayud nga mabanhaw. Gusto kong mabatonan ang maong mga potensyal karon mismo. Gusto kong masayran nga husto kini. Gusto kong masayran nga husto kini, Ginoo. Nasayod ako, dili ko mahimong dili masa- . . .” Dili n'yo man gustong masayup. Dili kini mahimong . . . mahimong ulahi na kini kaayo. Karon na ang adlaw. Grabe! Karon na ang adlaw. Ayaw na paglangan pa.

²⁸⁷ Dili pa lang dugay, nga nagwali ako. Adunay usa ka tigulang itum nga tawo nga miadto didto sa luyo sa bilding, og miduol kanako. Miingon, ang ingon, “Reverend, gusto kong sultihan ka. Moingon ko nga husto ka.” Ingon siya, “Gisultihan ko na ang Ginoo, dugay na nga panahon ang milabay, gusto ko nga gikuptan ko na ang akong tiket nianang buntaga. Gusto kong mahibaloan nga namarkahan kini nga husto.” Miingon, “Basin man gud magkaaduna pa'y dakung problema didto sa suba.” Ingon siya, “Ako—ako—pag didto na ako, nianang suba.” Ingon

pa siya, “Ako—dili ko gustong magkaaduna pa og unsa man nga problema didto. Gusto kong tul-id na kining tanan dinhi pa lang.” Husto kana.

²⁸⁸ Aduna na ba kamo’y visa? Kung wala pa kamo nakaangkon og visa . . . Mahimong aduna na kamo og pasaporte, apan, kung wala pa kamo nakaangkon og visa, dili gyud kamo makasulod sa maong Yuta. Kabalo na mo niana. Nahiandam n’yo na ba ang tanan? Kung wala pa, nan karon na mismo ang oras para buhaton kana.

²⁸⁹ Ayaw’g kahadlok, kung medyo nahadlok man mo. Karon, aduna na og mga usa ka gatus ka mga kamot ang naipataas dinhi. Busa kung medyo nahadlok man mo, bueno ipahiluna ’sa nato kana.

²⁹⁰ Karon, nasayod ko nga aduna kita’y nagkalainlaing mga pamaagi. Ang ubang mga tawo moingon, “Umari ka, palamanoha ako kanimo.” Ang uban moingon pud, “Umari ka, pagluhod sa altar.” Bueno, maayo man kana. Wala ko’y ni usa ka pulong nga isulti batok niana, man lang, wala gyud ni usa ka butang, sa kung unsa ma’y ilang isulti.

²⁹¹ Apan tugoti kong isulti kaninyo ang akong pamaagi. “Sumala sa tanan nga mitoo, sa ingon ka daghan nga . . .” Ang pagduol ngadto sa altar dili makapahimo kanimo nga magtoo. Ang pagpakiglamano sa ministro dili makapahimo kanimo nga motoo. Apan kung tinawag ka sa Dios, ug ikaw usa ka agila, sa sugod pa lang, usa lang ka singgit mahibaloan mo na. Motoo ka gyud. Kung nagatoo kamo niini, magaampo ako uban kaninyo.

²⁹² Mahunahuna n’yo ba kanang gamay’ng agila nga mopabilin pa og dugay diha nianang nataran? Dili na, gayud. Huhuh. Dili. Ayaw na pagpabilin dinhi og dugay, higala. Magpasakgaw na kita—kita karon. Ania ang grasya sa Dios aron buhaton kana.

²⁹³ Langitnong Amahan, naamgo namo nga nagapaingon na kami sa takna sa pagtapos. Dili na kami magdugay pa dinhi. Dili tungod sa among pangidaron, kondili sumala gayud sa panahon. Nagatoo kami nga daghang mga batan-on nga nagalingkod dinhi, nga buhi pa sa diha nga mahitabo kini. Mahimong mahitabo kini karong adlaw. Wala kami nasayod sa minuto o takna. Apan, Ginoo, gisultihan Mo man kami, “Inigkakita ninyo niining mga butanga nga nagakahitabo na,” ug nagakahitabo na kini sa dugay na nga panahon karon.

²⁹⁴ Nasayod kami nga milagpas na kami, sumala sa mga siyentista. Unom, pito na ka tuig ang milabay, tres minutos na lang kono nga paingon na sa tungang-gabii. Wala kami masayod kung unsa pa kana ka dugay nga, padayon nga magatuyok ang oras, apan nasayod kami nga anaa na mismo kami dinha.

²⁹⁵ Oh Dios, aduna kami niining kasiguradohan: ingon nga makita nga ginapuntohan sa among kasingkasing ang matag

saad sa Dios og “amen,” ang makita nga ang Espiritu Mismo, nga nagakunsad kanamo, ang nagahatag og kinabuhi sa among pagkatawo.

²⁹⁶ Dios, itugot nga makita pud kana sa akong mga kaigsoonan, niining buntaga. Itugot nga makita kana sa akong mga kaigsoonan, nga kanang Espiritu ang nagakunsad ug nagahatag og kinabuhi sa Pulong. Itugot nga makita sa mga igsoon kong babaye ang mao ra nga butang, Ginoo. Ug dayon, kung makakita man sila og usa ka butang nga makababag kanila aron mahatagan og kinabuhi ngadto nianang Pulong, Oh Dios, hinaut nga malikayan nila kana sa gilayon. Itugot kini, Amahan. Anaa na kining tanan diha sa Imong mga kamot karon. Nasayod ko nga napakyas ako sa daghang mga butang, ug padayon nga nagakapakyas, apan, Ginoo, gibuhat ko na ang tanan nga nahibaloan kong buhaton. Karon anaa na kini diha sa Imong mga kamot. Imoha na sila. Sa Ngalan ni Jesus, dawata sila, Amahan.

²⁹⁷ Karon kamo nga ania dinhi nga nagkinahanglan og kaayohan para sa inyong lawas. Pila man ang mga magtotoo nga ania dinhi? Ipataas ang inyong kamot. “Usa ako na magtotoo, kutob sa nahibalon ko sa akong kasingkasing.” Pila man ang nagapanag-iya na? Kabalo ba mo, sa wala gayu’y pagduhaduha, nga sa inyong kasingkasing, karon mismo, nabanhaw na kamo gikan sa mga patay? Kabalo ba mo? Oh, grabe! Unsa kaha’y mahimong mahitabo sa ingon niini nga panagtigum kung ingon-ana? Nasayod ko nga ulahi na ako, apan unsa kaha’y mahimong mahitabo karon mismo? Hunahunaa gayud kung unsay mahimong mahitabo. Ang mga potensyal anaa na mismo diha kaninyo. Kita n’yo? Kamo, nga nagapataas sa inyong kamot, mora—mora na kamo og nanumpa, ngadto sa Dios, nga, “Nasayod ako nga aduna gayu’y nahitabo kanako. Tingali’g wala pa ako sa kahimtang kon asa ako angay’ng mapahimutang.”

²⁹⁸ Ako man usab. Wala pa, sir. Halayo pa ako sa kon asa ako angay’ng mapahimutang. Apan nasayod gyud ko niining usa ka butang, miagi na ako gikan sa kamatayon ngadto sa Kinabuhi. Nasayod ko nga adunay butang nga nahitabo na kanako. Daghang. . . Dili ingon nga usa na ka tigulang nga tawo karon, apan daghan, daghan nang mga tuig ang milabay, nga nahitabo kadto.

²⁹⁹ Ug nasayod ako, niadtong adlawa nga naglakaw ako pasulod niadtong ospital, kaniadtong aduna ako og dakung pagsulay. Nakita ko ang akong asawa nga namatay; mihangyo gayud ako nga mabuhi pa unta siya. “Ug unsa ba’y nabuhat ko gawas lamang sa pagtindog didto sa kanto sa dalan ug magwali, ug mag-ampo para sa mga may sakit?”

Ug dayon miingon si Satanas, “Bueno, dili na Niya tubagon ang imong pag-ampo.”

³⁰⁰ Nakita ko ang asawa ko nga namatay, apan nasayod ako nga diha kaniya anaa kadtong gahum sa pagkabanhaw. Kadto nga mga bukog mabanhaw ra gayud.

³⁰¹ Nakita ko usab ang akong batang babaye nga nagahigda didto. Ug gipandong ko ang akong kamot, miingon, “Dios, ayaw intawon kini kuhaa.”

³⁰² Daw sa gipaubos ra Niya ang tabil, og miingon, “Dili Ko na gayud ikaw dunggon.”

³⁰³ Miingon si Satanas, “Tan-awa. Usa lang ka pulong...” Nasayod gyud siya kay sa nga sultihan ako nga walay Dios, tungod kay nasayod man ko nga aduna gyu’y Dios. Apan ang ingon niya nga wala na kono nahigugma ang Dios kanako, wala kono Siya’y kahingawa para kanako. Kita n’yo? Ang tanang pagpangatarungan, gisulti niya, “Batan-on ka pa gayud, baynte anyos pa lang ang pangidaron. Atua na nagahigda ang imong asawa didto sa usa ka morge. Ug ania pud ang imong gamay’ng bata nga motaliwan na. Ug—ug basta... Miingon man kaha ka nga usa Siya ka gamhanang Mananambal, ug Siya man kaha *ingon-ini*. Ug, tan-awa, unsa ma’y gibuhay Niya? Usa ra unta ka pulong, dili na gani Niya kinahanglan pang isulti kana, motan-aw lang dinha ug moingon. Motando lang Siya, mao lang kana ang buhaton, ug mamaayo na kana. Apan, nakita mo, wala gyud Siya nahigugma kanimo. Wala Siya’y kahingawa para kanimo. Gipasagdan lang nga mamatay ang imong gamay’ng bata dinha mismo, ug nagdumili pa gani nga dunggon ang imong pag-ampo sa niining mangitngit nga takna.”

³⁰⁴ Ang tanan niyang gisulti bug-os gayud nga kamatuoran. “Unsa diay ang imong nabuhat? Nagapamuhat ka sa tibuok adlaw, hangtud nga dili ka na gani halos makatindog. Ug dayon mata ka pa sa tibuok gabii, hangtud sa alos-dose ug ala-una. Motindog pa diha sa mga kanto sa dalan, nga nagawali. Nagaduaw ka pa ngadto sa mga ospital. Igo ka lang makauli ug molingkod, sa lingkoran, molingkod dinha ug matulog og usa ka oras o duha, ug mobalik na usab sa pagpamuhat. Pagkasunod gabii, mao sa gihapon. Ug ania ka, nga mga baynte-uno, baynte-dos pa lang ang pangidaron. Ang tanang higala, ang tanang batan-ong babaye, ang tanang batan-ong lalaki nga imong nakauban, gitawag ka na nga usa ka buang-buang. Unsa ba’y imong nabuhat? Gitinontohan mo lang ang imong kaugalingon. Dili mo ba makita kana?” Hapit na akong mouyon kaniya kaniadto.

³⁰⁵ Ug adunay Butang sa kinasuloran ko, mao kadto ang gahum nga nagahatag og kinabuhi. Miingon ko, “Ang Ginoo mihatag, ug ang Ginoo mikuha. Bulahan ang Ngalan sa Ginoo.”

Sa diha nga mahanaw ang tanan kong
paglaum,

Nan Siya mao ang tanan kong paglaum ug
tabang.

Kay diha kang Cristo, ang. . .

[Blangko nga bahin sa teyp—Ed.] . . . balas nga
nagakaunlod.

Oh, Siya moabot nga may tingog sa kadaugan,
Busa hinaut nga nianang panahona diha—diha

Kaniya ako mahikaplagan,

Nga naputos sa mga bisti sa Iyang
pagkamatarung.

³⁰⁶ Dili sa kaugalingon kong bisti; wala gyud ako’y bisan unsa. Ang akoa mao’y mahugaw, bulingon nga mga bisti. Dili ko gustong maningkamot nga makaadto sa Langit tungod sa akong pagwali. Dili ko gustong maningkamot nga makaadto sa Langit tungod sa akong mga panan-awon. Moadto ako sa Langit tungod kay nabatonan ko ang Iyang grasya dinhi sa akong kasingkasing. Tungod sa Iyang grasya, mao kana’y hinungdan nga makaadto ako. Sa ingon niana nga paagi nga kita makaadto.

³⁰⁷ Oh, higala, kabahin mo niini nga Lawas. Mga anak kamo sa Dios. Bueno, ginasulti ko kini aron nga malig-on ang inyong paglaum. Kung nakakaplag kamo. . .

³⁰⁸ Kung nakakaplag man ko og kahimuut kaninyo, sa pagsulti kaninyo sa Kamatuoran. . . Ug ang gisulti ko kaninyo, mao—mao ’sab ang gisulti sa propeta, sa nangaging mga katuigan. Dili ko ginahimo ang akong kaugalingon nga Iyang propeta. Dili, sir. Apan Kamatuoran ang ginasulti ko kaninyo. Aduna ba Siya’y gisulti sukad og bisan unsang butang gawas sa kung unsa lang ang tinuod? Naila ko kamo nga lagpas sa baynte na ka tuig, dinhi sa Phoenix, tungod nianang awit, *I’d Like To Talk It Over With Him*, didto sa iglesia ni Igsoong Outlaw, ug ni Igsoong Garcia, nagtoo ko nga didtoa. Aduna ba ko’y gisulti kaninyo sukad og bisan unsang butang diha sa Ngalan sa Ginoo nga wala mahitabo?

³⁰⁹ Hinumdumi, adunay usa lamang ka paglaum. Dawata n’yo kining gahum nga nagahatag og kinabuhi. Pagakuptan kamo Niini. Sa diha nga ang tanang uban pang butang mangahanaw, pagakuptan kamo Niini.

³¹⁰ Ang uban kanila miingon, “Gikuptan mo ba ang imong relihiyon, Igsoong Branham?”

Ingon ko, “Wala. Kini ang nagkupot kanako.”

³¹¹ Kini ang nagkupot kanako. Dili ako ang nagakupot niini. Dili nga kung makakupot ba ako, o dili. Kondili kung nagakupot ba Siya, o wala. Siya mismo ang nagakupot kanako.

312 Dili man Niya kinahanglan kaniadto. Ang mga Manulonda atua mismo napahimutang sa matag kahoy didto, miingon, “Ipagawas lang ang imong mga tudlo. Ipunting lang; dili mo man kinahanglang tangtangon kana sa krus. Ipunting lang ang imong tudlo, ug matikdi.” Kita n’yo, kadtong pundok sa mga mabiyabiayon. Apan kung gibuhat man Niya kadto, wala unta ako nagkaaduna niini nga pagpamatuod sa karon; wala pud unta kamo nagkaaduna niini. Apan tungod kay nagpabilin Siya sa krus, nagpabilin gayud Siya didto, mao kana kon nganong nagapabilin ako uban Kaniya.

Kang Cristo, ang malig-ong Bato, ako nagabarug;
Ang tanang ubang dapit balas na nga nagakaunlod.

313 Karon, kung aduna mo’y sakit, mahimo n’yong ipandong ang inyong mga kamot sa usa’g usa. Mag-ampo kita. Ipandong lang ang inyong mga kamot sa kang kinsa man nga tapad ninyo. Bisan unsa pa’y problema diha kaninyo, magmaaduna lang og pagtoo. Kung gisulti ko na kaninyo ang Kamatuoran, nan sultihan ko kamo karon. Kita n’yo? Miingon si Jesus, “Kini nga mga ilhanan maganunot kanila nga nagatoo.” Ug mga magtotoo man kamo, ipataas lang ninyo ang inyong mga kamot. Ayaw pagduhaduha. Adunay luoy’ng nagaantus nga tawo ang ginapandongan sa inyong mga kamot. Aduna usab og nagapandong sa ilang mga kamot nganha kaninyo.

314 Hinumdumi n’yo kanang gahum nga nagahatag og kinabuhi, kanang gahum nga nagbanhaw kang Jesus gikan sa lubnganan. Karon magmaaduna kamo og pagtoo sa kung unsa ma’y anaa sa inyong—sa inyong kaugalingong lawas. Makatabang kana sa tawo nga gipandongan n’yo sa inyong mga kamot. “Kung nagapuyo Kini sa sulod ninyo, magahatag usab Kini og kinabuhi sa inyong may-kamatayon nga mga lawas.”

315 Minahal nga Dios, samtang nagatindog ako dinhi niining buntaga, nga haduol na ang kaudtohon, sa diha nga mga ingon niining taknaa sa adlaw usab nga mituaw si Jesus, “Dios Ko, Dios Ko, nganong gibiyaa Mo Ako? Nagakauhaw Ako.” Dili ikatingala, nga nakita na kini sa propeta, ug miingon, “Ang tanan Kong mga bukog, nagatutok sila Kanako. Gipalagbasan nila ang Akong mga kamot ug Akong mga tiil.” “Apan giisip Siya uban sa mga malinapason. Apan Siya gisamaran tungod sa atong mga kalapasan. Siya napangos tungod sa atong kasalanan. Ang silot sa atong pakigdait diha sa ibabaw Niya, ug tungod sa Iyang mga labod kita nangaayo.” Ginaangkon namo kana, niining buntaga, Dios. Ginaangkon namo kana.

316 Sa niini nga buntag sa pagkabanhaw, matikdi, kining gipanghimatud-an nga Kamatuoran nga akong gisulti, Ginoo, sumala sa Imong Pulong, diha sa Presensiya sa Dios. Siya mao

ang Maghuhukom, ug kami mao ang mga saksi nga gitubos Niya kami. Ug sa sulod namo napahimutang, pinaagi sa grasya sa Dios, kanang gahum sa pagkabanhaw. Ug masakiton ang among mga higala, kining mga gipandongan og mga kamot.

³¹⁷ Oh Dios, ginahagit namo ang yawa, sa taliwala sa among pagtoo niining buntaga, samtang ginapandong ang mga kamot nganha sa mga tawo, ug ako usab nga ginapandong ang akong mga kamot nganha sa mga tawo. Itugot nga manghawa, ang matag balatian ang tanang pag-antus nga nagasulay sa paghawid sa mga tawo, diha sa presensiya niining gipanghimatud-an nga Kamatuoran, manggula na. Sa Ngalan ni Jesus Cristo, hinaut nga kining mga tawo mamahimo nang gawasnon karong adlaw. Ingon nga, ang Biblia, ang mga Pulong sa among Dios miingon, “Kung pagapandongan nila sa ilang mga kamot ang mga masakiton, mangaayo sila.” Ug gipataas namo ang among mga kamot, nganha Kanimu, Dios.

³¹⁸ Sama sa matag tanum sa yuta nga nagainom sa Imong tuburan, ug sa ingon ka sigurado gayud nga ang maong tanum, nga mitubo, nagainom gikan sa Imong tuburan, hinay-hinay kana nga nagagitib. Hinay-hinay kana nga nagatubo. Ang lindog sa mais, sa bulak, og unsa pa man nga nagainom sa Imong tuburan, nagatubo kana nganha Kanimu.

³¹⁹ Ug niining buntaga, mitubo usab kami, og pipila ka pulgada, Ginoo. Mahimo kaming motubo pa. Tungod nagainom man kami sa Imong tuburan. Kami’y Imong mga linalang, nga may gahum sa pagkabanhaw sa kinasuloran namo, Ginoo. Ug ginaampo namo nga dunggon Mo ang among pag-ampo alang sa among mga igsoong lalaki ug mga igsoong babaye. Ug hinaut nga ang tanang pag-antus, nga nagababag niining minahal nga mga tawo dinhi nga nagkaaduna niining gahum, Ginoo, buhii sila, aron nga makapangalagad sila sa Dios. Ug mamaayo na sila, Ginoo. Sa Ngalan ni Jesus Cristo. Amen.

³²⁰ Nagatoo ba mo Kaniya? [Nagaingon ang kongregasyon, “Amen.”—Ed.] Biyaan ang ingon niining butang? Unsaon man ninyo pagbuhat niana? Daw sa, mora og, may nagabira kaninyo. Ingon niana ba ang inyong ginabati? [“Amen.”] Ako—ako—ako... Tingali’g ako lamang, nga akong... Apan aduna ko’y nabati, usa ka talagsaon gayud nga pagbati sa diha nga miduol ako taliwala sa mga tawo, diin nagalingkod kamong tanan nga ingon niini. Nasayod ako, sa kon asa man, adunay dili-makita dinhi; sama nianang sa radyo, telebisyon, unsa man kana, nga nagaagi niini nga lawak; ania si Cristo niini nga lawak. Palandunga lang gayud, ang atong Manunubos! Tony, ania Siya dinhi. Amen.

³²¹ Ug si kinsa pa ba ang mas malipayon kaysa sa mga tawo nga nagapanag-iya, nga may kapanghimatuuran sa Biblia mahitungod sa matag Pulong sa Dios nga napadayag, bisan sa

pagkakita og mga Manulonda ug sa Iyang Persona, maingon sa nahitabo sa tanang mga—mga kapanahonan! Ug ania, ang mga Pulong sa mga magtatan-aw, nga nanagpanagna ug nahitabo gayud sa ingon ka eksakto. Ug ania na kita sa bisperas sa Iyang Pag-abot. Oh, daw sa unsa ka maanindot nga panahon!

³²² Makita na nato Siya. Usa sa niining mga adlaw, mania na Siya dinhi. Hangtud nga moabot Siya, mahimo n'yo ba akong iampo? [Nagaingon ang kongregasyon, “Amen.”—Ed.] Aduna gayu'y makuyaw nga mga katalagman nga akong ginaatubang. Nasayod ako niana. Kita n'yo? Ug nakatagbo na ako og mga pagano nga mahimong mopusil kanimo, nga mora lang og nag-inom og tubig, ug gibayran na diay ka. Pagmoanha ka sa ilang dapit, mga yawa makighagit kanimo mahitungod sa Biblia, nga ingon ra ka sayon. Apan wala pa gayud ako nakasaksi ni usa ka higayon nga wala nagmadaugon ang Dios. Nagapangmisyon ako diha sa Iyang Ngalan, sa Ngalan ni Ginoong Jesus Cristo, ang paglaum alang sa Kinabuhing Walay Katapusan, ang pagkabanhaw ug ang Kinabuhi. “Siya nga buhi ug nagatoo Kanako, bisan siya mamatay mabuhi siya. Ug ang tanan nga buhi ug nagatoo Kanako dili na gayud mamatay.” Nagatoo gyud ako niana ingon nga mao ang Eternal nga Pulong sa Dios. Nagatoo ba usab kamo? [“Amen.”] Mahimo n'yo ba akong iampo? [“Amen.”] Iampo ko usab kamo. Hinaut nga bantayan kita sa Dios hangtud nga magkita kita pag-usab.

³²³ Karon manindog kita, sa makadiyut. (Aduna ka ba'y gustong isulti?)

Iduko nato ang atong mga ulo.

³²⁴ Mahimong dili husto para kanato kon dili nato awiton kining hamubo nga awit, dili ba? Mahinumduman n'yo ba ang atong awit, *I Love Him*, anaa ba kana sa matag kasingkasing? Awiton nato kini. Igsoong babaye, pinangga, mahimo mo ba... gusto kong isulti, nga ginapasalamatan ko ang imong pagtugtog, usab, igsoon. Oo.

I love Him, I love Him
Because He first loved me
And purchased my salvation
On Calvary's tree.

Karon atong ilisdan ang kanta.

My faith looks up to Thee,
Thou Lamb of Calvary,
Saviour divine;
Now hear me while I pray,
Oh, take all my guilt away,
Oh, let me from this day
Be wholly Thine!

³²⁵ Dili ba kana nakapadasig kaninyo? Pila man ang ganahan nianang tinuod gayud...ako—ako—ganahan ko og mga awit

pang-sadya. Oo, ganahan gyud ko. Apan pag anaa gani kamo diha sa espiritu sa pagsimba, dili ba gusto ninyo kanang karaan og malumo nga mga himno? Nagatoo ko nga nanglihok gayud ang Balaang Espiritu kaniadto kang Eddie Perronet ug niadtong mga nagsulat nianang maanindot og karaan nga mga alawiton. Dili ba mo nagatoo niana? Si Fanny Crosby, sa dihang misulat siya.

Ayaw ako'g labyi, Oh, maloloy-on kong
Manluluwas,
Dungga ang mapainubsanon kong pagtuaw;
Samtang nagapanawag Ikaw sa uban,
Ayaw gyud ako paglabyi.
Ikaw mao ang Sapa sa bug-os kong
kahupayan,
Labaw pa sa kinabuhi alang kanako,
Kinsa man ang dalangpanan ko sa yuta gawas
Kanimo?
O kinsa man sa Langit kondili Ikaw?

³²⁶ Dili ba pagkaanindot niana? Nagapahimo kana kanato nga moawit og *I Love Him*. Dili ba? [Nagaingon ang kongregasyon, "Amen."—Ed.] Karon, samtang nagaawit kita niining higayona, og *I Love Him*, atong... Gihigugma nato ang usa'g usa. Kay kung wala nato ginahigugma ang usa'g usa, nan dili pud nato mahimo nga higugmaon Siya. Karon maglamanohay kita sa usa'g usa. Tindog lang mo, ug abota lang ang pikas linya sa kon asa man, ug maglamanohay, sa usa'g usa.

I...[Si Igsoong Branham mitalikod sa mikropono ug nagapakig-estorya sa usa ka tawo—Ed.]...?
And purchased my salvation
On Calvary's tree.

Iduko nato ang atong ulo karon.

³²⁷ Akong hangyoon si Igsoong Williams, ang batan-ong si Igsoong Williams, nga moanhi dinhi sa makadiyut. Hangyoon ko siya kung mahimo ba niya nga paulion na kining mga mananambong diha sa pag-ampo.

³²⁸ Gihigugma ko si Igsoong Williams, usa ka batan-ong Cristohanon, nga nagatoo ko nga usa gayud ka alagad ni Cristo, ang iyang gamay'ng pamilya. Daghan na ako og pagpakig-fellowship uban kanila. Ug silang bililhon nga mga batan-ong Moseley ug silang tanan, dugay na kaming nagkauban, ug daghan kaayong mga minahal kong higala dinhi sa Phoenix, nga gihigugma ko gayud sa tibuok kong kasingkasing. Nahunahuna ko hinoon, ang maong panan-awon niadtong buntaga, miingon Siya, "Ang tanan nga imong gihigugma, ug ang tanan nga naghigugma kanimo, gihatag sa Dios kanimo."

³²⁹ Nagatoo ko nga may usa ka tawo dinhi nga nagahinulsol sa iyang sala, nagaluhod diha sa salog, usa ka batan-ong babaye nga nagahilak.

Iduko nato ang atong mga ulo sa makadiyut para kaniya.

³³⁰ Minahal nga Dios, mao na ba kanang gamay'ng karnero nga nahibilin sa Phoenix? Wala ako masayod, Dios. Ikaw ang nasayod. Apan, sa umalabot nga adlaw, mahitabo ra kana. Apan, Amahan, kini, sa walay pagduhaduha, mao na gayud kanang usa. Busa ginaampo ko nga Imo siyang tabangan, karon mismo. Ablihi nga may pagkamalulot ang ganghaan, moingon, "Umari ka, Akong anak. Sumulod ka na gikan sa makapoy, og mahago nga panaw. Napandol ka dinha sa mangitngit. Mitungha Ako, karong adlawa, aron kuhaon ka. Akoa Kining Espiritu ang nagapakigsulti kanimo ug dalhon ka na pasulod sa panon karon." Itugot kini, Dios. Hinaut nga kining batan-ong babaye . . . nga anaa mismo sa kinasang-an nga dalan sa iyang kinabuhi karon. "Siya nga nagapatalinghug sa Akong mga Pulong, ug nagatoo Kaniya nga nagsugo Kanako, may Kinabuhi nga Walay Katapusan." Itugot kini, minahal nga Dios, alang niining batan-ong Cristohanon. "Siya nga nagaduol Kanako, dili Ko gayud igasalikway." Samtang nagatindog ang mga balaan dinha dapit sa batan-ong babaye, nga nagaampo.

³³¹ Akong mahinumduman, bisan si Pablo kaniadto, nga gibato gayud sa hilabihan hangtud nga naghimalatyon na siya, ug sa diha nga nag-alirong ang mga balaan ug nag-ampo, mibalik ang kinabuhi. Tungod kay, sa kinasuloran niadtong mga lawas sa mga balaan atua man ang gahum nga nagahatag og kinabuhi nga nagpabalik sa espiritu sa kinabuhi ngadto kang Pablo. Dios, mahimo gayud niini nga igaampo ang pag-ampo, sa kamatayon gikan sa . . . o ang kamatayon gikan sa tawo, pinaagi sa pag-ampo nga inubana'g pagtoo, ngadto sa kinabuhi. Itugot kini, minahal nga Dios.

³³² Panalangini kami karon samtang nagahulat kami Kanimo. Sa Ngalan ni Jesus Cristo, kami nagaampo.

³³³ Karon samtang nakaduko ang inyong mga ulo, akong hangyoon si Igsoong Williams.



ANG SELYO SA PASKO SA PAGKABANHAW CEB65-0410

(The Easter Seal)

Kining Mensahe ni Igsoong William Marrion Branham, una giwali sa Ingles niadtong Sabado sa buntag, Abril 10, 1965, para sa pang-pamahaw nga tigum sa Full Gospel Business Men's Fellowship International sa Ramada Inn sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org